



WANTOK

Great Quality

Affordable Price



Niuspepa bilong yumi ol PNG stret!

Wan Wik,

Jenuari 13 - 19, 2005

NAMBA 1591

K1 tasol

Harim laiv dro bilong kalaring kompetisen na ol wina long Yumi FM wantaim Dame Carol Kidu long Jenuari 18, 2004 Tunde moning 10 kilok na lukim nem sapos yu win long Wantok Fonde 20 neks wik!

Catholic Reporter bilong dispela mun i stap insait!

Ol bodi i lus

Neville Choi i raitim

PLANTI bodi bilong ol manmeri husat i indai long sunami o bikpela solwara i bin bagarapim ol kantri long Saut Is Esia nau i wok long lus na planti manmeri bai i no inap long painim ol famili bilong ol.

Dispela hevi nau i wok long kamap bikpela long Thailand we ol manmeri i no bin stretim na lukautim gut ol bodi bilong ol manmeri i bin indai long dispela sunami.

Ol saveman bilong yusim blut na tit bilong painim ol manmeri nau i painim hat tru bilong wanem planti bodi bilong ol indai man ol manmeri i kukim pinis bihain long sunami i kamap.

Kotaro Hara, man i go pas long ol saveman bilong Japan husat i wok long helpim long painim ol bodi bilong ol manmeri i dai i tok ol i wok long glasim ol bodi i stap, tasol i luk olsem bai ol lain manmeri husat i painim ol wanfamili bilong ol bai i mas wet inap long wanpela yia bipo ol i ken painim ol.

"Ol atoriti long Thailand i no mekim gut wok bilong ol, na infomesen ol i kisim bihain long sunami i kamap i no gutpela tumas. Na sapos mipela i nogat gutpela rekod, mipela bai no inap long makim ol bodi wantaim ol nem bilong ol manmeri i lus i stap," Hara i tok.

Grup bilong Hara i wok bung wantaim ol savemanmeri bilong ol arapela kantri long traim makim ol indai manmeri wantaim ol manmeri i lus yet.

Sampela handet bodi bilong ol indai manmeri i bin stap long ol matmat ol i kukim pinis bihain long matmat i pulap.

Wanwan long ol dispela bodi i wok long go bek long mok o haus bilong ol indai man long glasim klos, tatu o mak long skin na ol kainkain bilas olsem iauring samting. *I go moa long pes 2*



Givim helpim...

Wanpela helikopta bilong US Ami i karim kaikai na wara i go long ol lain turangu long Panga, wanpela taun long Aceh provins long Indonesia. Dispela provins i stap klostu tru long ples we bikpela guria i bin kamap. Namba bilong ol manmeri i dai i winim olgeta arapela ples i kisim bagarap. *POTO: Panos Pictures/DermotTatlow*

STRONGPELA TRU

Colgate

Toothpaste bilong PNG stret!

Polis Ripot

Kavleng:

POLIS i mekim wok painimaut long tupela man bilong ol ovasis kantri husat i bin dai insait long wanpela paia long Kavieng, Nu Ailan provins long Nu Yia.

Provinsel Polis Komanda Inspekta Benedict Bensir i tok wanpela long ol daiman i bilong Fiji na narapeola i bilong Saut Afrika. Tupela man i bin wok wantaim MAP Tuna kampani long Kavieng.

Inspekta Bensir i tok tupela i bin dai bihain long haus ol i stap long en i paia long Nu Yia nait.

Ripot i tok paia i bin stat long haus kuk na kilim tupela man.

Em i tok nau ol i kisim pinis tupela polisman long kam helpim ol Kavieng polls long wok bilong painimaut rot we paia i bin kamap long en.

Ol bodi i lus

...I kam long pes 1

Ol patolojis i kisim ol pinga mak, hap blut bilong tit o bun, na ol eksrei piksa bilong maus bai ol i ken makim wantaim ol tit. Olgeta dispela samting ol i putim insait long wanpela liklik maikrosip na i go bek insait long maus bilong wanwan bodi.

Dispela wok wanwan man i mas mekim insait long 30 minit tasol. Hevi nau i stap bilong wanem ol i mas mekim long sampela tausien bodi.

Ol savemanmeri bilong Thailand, Briten, Japan, Portugal, Canada, Italy na Switzerland i wok long wok bung long traimekim dispela wok.

Mista Hara, husat i save wok olsem wanpela polis man long Tokyo, i tok gavman bilong Thailand i tok olsem ol bai inap painim olgeta bodi na ol lain i lus yet insait long 2-pela mun tasol.

Em i tok olsem dispela i no stret bilong wanem ol bai i mas wok inap long wanpela yia bilong wanem ol i wok long painim yet ol manmeri i lus na bai ol i no inap long painim olgeta manmeri i dai bilong wanem sampela long ol i nogat famili.

Lukim moa stori long helpim PNG i givim long Pes 3 na ol arapela stori na piksa long Pes 16.

Helpim Esia

SAPOS yu laik givim liklik mani long halivim ol turangu i kisim bagarap, yu ken putim mani bilong yu i go long ol dispela ples:

PNG RED CROSS SOCIETY

Akaun Nem: PNG Red Cross Society Asia Tsunami

Benk/Akaun #/Brens:6000 947 066, WESTPAC Waigani

1001 035 135, BSP. Port Moresby

Telepon namba: 325 8577 / 325 0617

Kontak Manmeri: Jacqueline Boga (Secretary General PNGRCS), Vini Talai o Hilda Wayne

CARITAS PNG

Akaun Nem: Southeast Asia Tsunami Appeal

Benk/Akaun #/Brens: 717856801, WESTPAC, Waigani

Telepon namba: 325 6255 / 325 6485

Fax namba: 325 9626

Kontak Manmeri: Raymond Ton (Deputy National Director, CPNG)

Wok redi long Bogenvil ileksen i wok long go gut

...Nesenel na Bogenvil Gavman mas givim sapot mani

Veronica Hatutasi i raitim

OL WOK redi i go het nau long sanapim nupela otonomi gavman bilong Bogenvil.

Tasol singaut i go long ol Bogenvil lida na ol pipel long pinisim kwik ol wok bilong rausim ol gan na tu, long Nesenel na Bogenvil Gavman i givim hap mani i go long Bogenvil llektorel opis bilong karimaut ol wok redi bilong ileksen.

Ileksen Menesa wantaim llektorel Komisn long Buka Mathias Pihei i tok ol i mas gat K5 milien long karimaut ol wok redi bilong otonomi gavman bilong Bogenvil.

Em ol wok olsem redim ol gaidlain bilong ranim ileksen bilong otonomes gavman, redim ol trening progrem bilong ol opisa bai karimaut ileksen, apdetim komon rol long wei bai inapim Seksen 10 bilong Bogenvil Konstitusen. Ol bai karimaut wok apdet long tripela rijen long Bogenvil we i karamapim Not, Sentral na Saut.

Mista Pihei i tok opis bilong em i wokim

plen pinis na olgeta wok redi we i gat long em wok bilong apdetim Komon rol na ol ilektorel baunderi bai pinis long mun Epril sapos gutpela sapot i kam long sait bilong fanding na wok bilong rausim na bagarapim ol gan long ailan i pinis.

Long sait bilong fanding bilong karimaut ol wok redi, Mista Pihei i tok ol i makim K5 milien we bai kam long AusAID, Nesenel gavman na Bogenvil Interim Provinsel Gavman.

AusAID i givim pinis hap mani bilong em inap long K501,000.

Mista Pihei i tok opis bilong em i wetim Nesenel na Bogenvil gavman long givim hap mani bilong ol na em i askim ol long givim hap mani bilong ol long helpim opis i karimaut gut ol wok redi.

"Long sait bilong karimaut wok, mipela i orait na sapos mipela i kisim ol fanding long sapotim ol wok na tu, wok bilong rausim ol gan i go gut, bai mipela inapim taget long pinisim ol wok long Epril.

"Mipela i mas pinisim ol wok long wanem bai mipela i givim aut ol rit o notis

bilong karimaut ileksen long mun Epril bilong dispela yia," Mista Pihei i tok.

Mista Pihei i wari long wok bilong rausim ol gan i no wok long go hariap bikos dispela em mi bikpela samting we i mas kamap pastaim bipo long ileksen bilong sanapim otonomi gavman i ken kamap.

Mista Pihei i luksave long sapot na helpim we PNG llektorel Komisn na wok-lain i givim long ol na tu llektorel Komisn bilong Australia long helpim ol i kamapim ol polisi na ol woksop long helpim ol i redim ol wok i sut long ileksen bilong otonomi gavman.

Em i tok Bogenvil Interim Provinsel Gavman bai makim wanpela lleksen Menesa long go pas long ol ileksen wok bilong otonomi gavman.

Dispela em long inapim hap lo i karamapim dispela insait long nupela Konstitusen bilong Bogenvil, em i tok.

Mista Pihei i bitip strong olsem sapos olgeta samting i go gut, ileksen bai kamap long mun Jun long dispela yia.

Singaut i kamap long harim krai bilong pipel

APIL i go long ol Bogenvil pipel na ol lida i lusim ol i no wanbel pasin namel long ol na harim krai na laik bilong ol putim han wantaim na ol i ken hariap na sanapim nupela otonomi gavman, lleksen Menesa long Bogenvil Mathias Pihei i tok.

"Wok bilong bagarapim ol gan i no pinis hariap bikos i gat sampela liklik pasin bilong i no luksave (mistrust) namel long ol Bogenvil pipel. Tu sampela ausait pilai politiks i kam insait na dispela i kamapim sampela hevi long stoim ol wok. Olsem na mi laik apil i go long ol pipel

bilong Bogenvil long lukluk strong long laik na krai bilong ol pipel na wok wantaim long sanapim nupela otonomi gavman. Mi askim gen ol lida long lusim tingting long ol wari bilong ol na tingim laik na krait tru bilong ol pipel," Mista Pihei i tok.

Em i askim ol lida long pusim wok bilong bagarapim ol gan bikos sapos dispela i pinis, em i gat strongpela bilip olsem ol bai givim rit o toksave pepa long ileksen bilong otonomi gavman long mun Epril. Na ileksen i ken stat long mun Jun.

Bogenvil i kisim fainel ripot bilong Konstitusen tude

Veronica Hatutasi i raitim

BOGENVIL bai kisim fainel ripot bilong Konstitusen o Mama lo bilong nupela otonomi gavman insait long wanpela seremoni long Arawa .

Eking Praim Minista Sam Akoitai i go long Bogenvil tude wantaim Inta Gavman Rilesens na Bogenvil Afeas Minista Sir Peter Barter long prisenim Konstitusen i go long Gavana John Momis na Presiden bilong Bogenvil Pipel's Kongres na Siaman bilong Bogenvil Konstitusenel Komisn Joseph Kabui, bihain long Kabinet i tok oraitim, Gavana Jenerel i givim blesing bilong em na ol i putim i go long Nesenel Geset.

Bikpela samting i stap nau long han bilong ol Bogenvil pipel na lida long pinisim wok bilong rausim na bagarapim ol gan na ol i ken sanapim nupela gavman bikos Nesenel Gavman i wokim olgeta

samting long inapim askim na laik bilong ol Bogenvil pipel.

"I nogat samting moa long wokim bikos samting i stap nau long han bilong ol Bogenvil pipel na ol lida we i karapim tu ol eks paif lida. Nesenel Gavman i givim olgeta samting we ol Bogenvil pipel i laikim na askim long en. Nau mipela i tok oraitim Konstitusen na givim long ol. Tasol bikpela samting nau em Bogenvil i mas rausim na bagarapim ol gan na pinisim dispela wok bipo ol narapela bikpela samting olsem holim ileksen na kirapim nupela otonomi gavman. Tu, ol pipel bilong Bogenvil i mas strongim wok ikonomi long sapotim otonomi gavman," Sir Peter i tokim Wantok olsem.

Tupela eria tasol em i no bagarapim olgeta gan em ol lain bilong Thomas Tari long Buin, Saut Bogenvil, ol liklik lain long Siwai husat nau i holim gan long lukautim

U-Vistrak papa Noah Musingku na No Go Zon eria long Sentral Bogenvil.

I bin gat ol ripot olsem Tari na lain bilong em i holim pas yet ol gan bikos Nesenel Gavman i no inapim sampela tok promis em bin mekim long 1996 taim ol i negosiet long ol BRA i lusim ol ami we ol bin kalabusim long Laguai long Buin.

Tasol ol toktok we Wantok Niuspepa i kisim i tokaut olsem Nesenel Gavman em inapim askim bilong ol bikos em i givim pinis mani long karimaut ol projek long Laguai. Dispela mani, ripot i tok, nesenel gavman i bin givim long Bogenvil Edministresen pinis na ol i bilong ol projek long Buin na Laguaia.

Ripot i autim toktok gen olsem Bogenvil na ol lida na pipel i mas putim han wantaim na toktok long ol pipel bilong ol na wokim samting kwiktaim long rausim olgeta gan na ol arapela wok i ken go het.



Dame Carol Kidu na Wantok Niuspepa strongim pikinini

MINISTA bilong Komyuniti Dvelopmen Dame Carol Kidu na Wantok Niuspepa bai go pas long wok bilong strongim ol PNG pikinini.

Namba wan wok ol bai mekim em long tokaut long ol wina bilong bikpela Kalaring Kompetisen i bin kamap insait long Wantok Niuspepa stat long las yia yet na bai i pinis long tete. Ol pikinini long olgeta hap bilong kantri i bin traim dispela kalaring resis. Tripela pikinini i traim dispela resis bai i gat sans long winim K500 bilong helpim ol wantaim skul fi, na tupela i gat sans long winim

tupela skul bek i pulap wantaim ol samting bilong skul.

Dame Carol bai tokaut long dispela 5-pela wina long wanpela redio so we bai i kamap long redio stesen YUMI FM long 10 kilok moning long neks wik Tunde (Jenuari 18). Yu ken harim ol nem bilong ol wina bilong dispela resis tu long Katolik Redio long Fonde moning Wantok So.

Long wankain taim Dame Carol bai opim wanpela nupela niuspepa kempen bilong Wantok Niuspepa yet long daunim pasin bilong bagarapim ol pikinini.

Dispela kempen bilong Wantok Niuspepa bai i ron long dispela yia. As tingting bilong em bai skulim pablik long dispela hevi i wok long bagarapim ol yangpela pikinini tete na traim long daunim na rausim dispela kain pasin insait long komyuniti.

Bihain long lonsing bilong dispela kempen, Wantok Niuspepa bilong Fonde, Jenuari 20, bai soim nem bilong ol wina bilong kalaring kompetisen na statim niuspepa kempen bilong rausim pasin bilong bagarapim ol pikinini.

Helpim strongim ol pikinini.

Gavman laikim pipel long opim han

Neville Choi i raitim

NESENEL Gavman i singaut long wanwan manmeri insait long kantri long opim han na givim mani bilong salim i go long Saut Is Esia long helpim ol turangu i kisim bagarap long hap.

Praim Minista Sir Michael Somare i bin toktok long Tok Bek Redio program bilong FM100 redio stesen long Mande taim em i makim maus bilong gavman na opim Nesenel Apil bilong bungim mani bilong go long ol lain i kisim bagarap long Saut Is Esia.

"Mi singaut long olgeta manmeri bilong Papua Niugini long givim liklik wan toea bilong yu, liklik 10 toea o 50 toea. Nau em i taim bilong givim helpim, na yumi mas soim truru lewa bilong yu na givim.

"Tingim, sapos yu givim liklik mani bilong yu, em bai i ken helpim ol lain i kisim bagarap. Maski liklik mani tasol, em bai bikpela halivim yu givim.

"Long olgeta wok manmeri, mipela i ken givim. Long ol bikpela bisnis, mipela i askim yupela long halivim. Na sapos ol bisnis i givim long mak bilong K100,000, gavman bai luksave na givim takis malolo long ol," Sir Michael i tok.

Em i toktok long redio na askim olgeta manmeri insait long kantri long tingim olsem mipela ol manmeri long wol, mipela ol brata susa tasol bilong wanem mipela olgeta i stap aninit long wanpela bikman tasol.

Sir Michael i bin opim dispela Nesenel telepon apil wantaim Oposisen Lida, Peter O'Neill, Minista bilong Komyuniti Dvelopmen Dame Carol Kidu, Tsunami Apil Komiti Siaman Dokta Puka Temu, na bisnisman Sir Brian Bell.

Oposisen Lida O'Neill i tok em i amamas long wok bung wantaim Sir Michael na gavman long kamapim dispela bikpela wok bilong helpim ol brata susa long Saut Is Esia.

"PNG i save long hevi dispela kain bagarap i ken kamapim taim wankain hevi i painim

...takis malolo bilong ol bisnis

Aitape. Mipela i mas wanbel wantaim ol pipel long Saut Is Esia. Mipela olgeta i mas lus tingting long kros na wok bung wantaim long halivim," em i tok.

Dame Carol Kidu i toktok strong long givim bek helpim ol arapela manmeri long wol i bin givim mipela taim solwara i bin bagarap Aitape long 1998.

Em i singaut long ol komyuniti, yut grup na

hauslain insait long kantri long givim han na helpim mani.

Dokta Temu i bin tokaut long olgeta helpim wanwan grup insait long kantri i wok long kari-maut long bungim mani.

Long wankain taim Siaman bilong Telikom, Dokta Florian Gubon i givim K90,000 i go long Nesenel Tsunami Apil bilong Gavman, K10,000 i go long fanresing bilong Aceh provins long Indonesia na K50,000 bilong Manam.

Sir Brian Bell i givim K10,000 i go long Nesenel Tsunami Apil na Intanesenel Childrens De Komiti i givim K2,000.



• Sir Michael long Tok Bek Redio program. Foto: NEVILLE CHOI



WANPELA wanwok i bin bungim Sir Brian Bell long dispela wik. Taim em i sikan na stori wantaim Sir Brian i stap, musik bilong stua bilong em i kamap long redio.

Man, wanwok ya i no bilip. Em i tok, "mi no ting mi bai gat sans long bungim wanpela kain man olsem gen taim musik bilong bisnis bilong em i wok long pairap long redio tu." Win bilong yu, brats.

SAPOS yu stap long Mosbi Siti, soim wanbel bilong yu na bung wantaim ol Kristen na ol arapela lotu tu long Sir John Guise indo kompleks long nau nait. Bikpela misa bai kamap wantaim olgeta dispela sios. Em bai stat long 6 kilok. Yusim dispela wanpela aua long askim bikman long luksave long hevi bilong ol manmeri long Saut Is Esia.

PASIN bilong ol man i gutpela na nogut wantaim. I gat planti manmeri long kantri i pilim sori long hevi ol manmeri long Saut Esia i karim. Tasol tok lukaut i mas i stap long ol dispela gutpela lain long lukluk gut pastaim na givim mani. I gat sampela giaman lain husat bai traim na mekim mani long dispela hevi. Bai i gutpela sapos yu givim mani i go long ol bikpela benk akaun bilong ol lain olsem Red Cross, Caritas PNG na ol lain Indonesia.

GODENS Maket na bas stop i bin gutpela taim i bin gat ol dispela manki i save raun na stopim long salim buai ausait long maket, o tromoi pipia, o smok na kaikai buai na kalap long bas. Maket i bin klin tru na ol manmeri i save raun long hap i save pilaim seif liklik. Tru olsem i bin i gat sampela ol giaman man husat i save laik kisim mani nating tasol, tasol planti bilong ol i bin mekim wok gut. Hevi em bin olsem i bin nogut wanpela gutpela yunifom o pepa we i ken soim olsem ol tru, tru wokman husat i wok long lukautim dispela hap. Sapos dispela senis i kamap, na ol i ripot stret i go long polis stesen na i no karim ol manmeri i go long saif tasol na laik kisim mani bilong ol, i bai gutpela long lukim ol dispela manki i kam bek gen.

2005 Diaries!

BEST PRICE - BEST RANGE
ONLY FROM YOUR FAVOURITE STATIONERY SUPERMARKET!

THEODIST LTD
THE STATIONERY SUPERMARKET

Port Moresby - Waigani Drive)
Tel: 325 6500. Fax: 325 0302
Lae - Milfordhaven Rd
Tel: 472 5488. Fax: 472 7696

Hap Hap Nius

Askim long ol Saina i holim ol gan

Planti manmeri insait long Is Nu Briten provins i wok long askim long wanem as tru na ol manmeri bilong Saina i wok bisnis insait long provins i holim ol bikpela pait gan. Ol dispela askim i kamap bihain long wanpela bikpela kros i bin kamap namel long ol sampela manmeri bilong Saina na ol manmeri bilong taun. Sampela manmeri i tok taim dispela kros i bin kamap, sampela manmeri bilong dispela Saina stua i bin sut long gan bilong ol. Wanpela long taim bisnis man i stap long Rabaul i bin tokaut olsem dispela samting i bin kamap tupela taim pinis.

Hargy kamap ejensi bilong RDB

Bikpela wel pam kampani long Kimbe, Wes Nu Briten provins, Hargy Oil Palm Limited (HOPL) nau bai i ken givim kredit o dinau i go long ol wel pam fama bihain long em i sanim wanpela agrimen wantaim Rurel Developmen Benk (RDB). Aninit long dispela agrimen, Hargy i kamap olsem wanpela ejensi bilong RDB. Em i ken givim kredit mani i go long ol wel pam fama na kisim bek ol mani ol i bekim. Minista bilong Agrikalsa, Mathew Siune i givim tok orait bilong em pinis long dispela agrimen namel long ol.

Namatanai laikim win mani bilong maining

Maisan Pahun i raitim

GAVMAN sevis insait long Namatanai distrik long Nu Ailan provins i stat long bagarap na Presiden bilong Namatanai Lokel Level Gavman (LLG), Alfred Elisha, i tok dispela i no gutpela. Em i tok tu olsem provinsel gavman i kisim olgeta royalti o win mani bilong Lihir Gol Main na i no save skelim gut i go long ol distrik i stap klostu long Lihir Ailan. "Namatanai Distrik Baset Plening Komiti i orait pinis olsem Lihir maining royalti i go olsem Namatanai bai kisim 50 pesen (%), Kavieng 40% na provinsel gavman 10%," Mista Elisha i tok. Na long dispela 50% royalti i go long Namatanai distrik 33% bai i bilong Namatanai Distrik LLG

husat i gat 89 wod memba. Narapela 33% i go long Distrik Infrastraksa program na las 33% bai i go long Namatanai Open Memba Distrik program. "Dispela baset bilong provinsel gavman i no save lukautim laik bilong pipel. Em i kamap wanpela samting bilong politiks na gavman sevis i no save go insait long ol ples," Mista Elisha i tok. Tasol Gavana bilong Nu Ailan provins, Ian Ling Stuckey, i no amamas long dispela askim i kam long Mista Elisha. Em i tok olsem dispela provinsel baset bilong nau i gutpela na ol Namatanai distrik LLG plen bilong royalti i no inap wok gut bihain. Olsem na nau ol dispela tingting na toktok bilong royalti i stap long han bilong Minista bilong Maining, Sam

Akoitai. Ol Namatanai LLG presiden nau i askim Mista Akoitai long hariap long stretim dispela bel hevi bilong royalti. Opis bilong memba bilong Namatanai, Byron Chan, i bin tokim Wantok Niuspepa olsem olgeta toktok bilong Namatanai LLG long kisim hap mani bilong royalti i stret tasol i no kamap wanpela lo yet. "Dispela em i toktok nating bikos nau yet em provinsel gavman i save kisim olgeta royalti bilong Lihir Gol Main na nogat wanpela distrik o LLG klostu long maining eria i kisim kain royalti ol Namatanai LLG i tokaut long kisim," Guise Toaliguire bilong opis bilong Memba bilong Namatanai i tok.

NBC Kimbe wok developmen i go het

Paulus Tali i raitim

WES Nu Briten provins bai kisim midium frikwensi (MF) siknel bihain long wok i kamap las yia long wanpela 80 mita transmista insait long provins. Dispela projek i gat manimak inap long 5.8 milien Kina na i kam aninit long Wes Nu Briten provinsel gavman na Japanese Intanesenel Koporesen Ejensi (JICA). Nau yet dispela projek i stap long namba tu hap bilong em we wok i go het long pulim ol radio transmisen siknel i go long ol ples bus insait long provins. Namba wan hap long dispela projek i bin kamap long klinim samting olsem 6 hekta long sanapim dispela projek. Dairekta bilong Nesenel Brodkasting Koporesen (NBC) long Kimbe, Vafuka Lowa i tok em i gat bikpela laik long mekim moa wok developmen long dispela radio

stesen. Em i tok radio stesen nau i wok long ron tasol long sot wev ben we siknel bilong radio i no go long olgeta liklik hap ples. Tasol dispela midium frikwensi siknel bai i go klostu moa long mak bilong ol bikpela radio stesen transmista bilong ol stesen olsem 93 FM, NAU FM we ol i ken brodkas long san na long nait tu. Mista Lowa i tok siknel bilong MF bai pairap long ka tu long klostu olsem sot wev ben. Em i singaut long provinsel gavman long ol i mas lukluk na sapotim gutpela ron bilong radio stesen bai wok developmen i ken go het. Em i tok olsem bikpela samting tru em ol manmeri long ples i laik harim nius na ol stori long ol samting i kamap, long ol arapela hap bilong kantri na wol tu.



Arawa Maket...Pastaim ol manmeri bilong Arawa taun i save salim ol maket kaikai bilong ol long Independens Oval long Arawa taun olsem long dispela foto. Tasol nau ol i gat nupela ples bilong salim kaikai long Arawa Maket we ol i bin opim long pinis bilong las yia. Foto: VERONICA HATUTASI



Is Nu Briten bai kisim mobail telepon sevis long 2006

IS NU BRITEN provins bai inap long kisim mobail telepon sevis olsem ol arapela bikpela taun insait long kantri long pinis bilong dispela yia. Dispela toksave i kam long bosman bilong Pacific Mobile Communications (PMC), Noel Mobiha, husat i bin go raun lukim provins long wiken i go pinis. Mista Mobiha i tokaut olsem Rabaul na ol arapela hap insait long Is Nu Briten provins bai i ken yusim ol mobail telepon sevis long pinis bilong dispela yia. Em i tok PMC bai sanapim tripela mobail sel ples long Kenabot estet long Kokopo, Tamavatur long Toma/Vunadidir na Malmaluan long sentrel Gazelle. Provinsel gavman bai givim mani bilong sanapim bilong tupela moa ples we bai i karamapim Not Kos, Watom Ailan, Toma/Vunadidir, Vudal na Baining.

Mista Mobiha i tok Gavana bilong Is Nu Briten, Leo Dion, i gat bikpela wari olsem planti manmeri insait long provins i nogat sans long yusim telepon bilong wanem pe bilong sanapim telepon wantaim Telikom i dia tumas. Mista Mobiha i bin wokabaut raun long sekim ol ples we PMC bai sanapim ol sel sait o ples bilong kisim siknel bilong mobail telepon sevis. Em i singaut tu long ol bikpela bisnis long stat long aplai wantaim PMC long sampela agrimen na tok orait long salim ol mobail telepon. Long wankain taim, Mista Mobiha i bin tokaut olsem Lihir Ailan long Nu Ailan bai nambawan hap insait long kantri long kisim siknel bilong mobail telepon i kam long setelait. Em i tok olgeta wok rere i kamap pinis na ol i wet tasol long pulim dispela siknel i go long Lihir. Mobail telepon sevis isi isi i wok long kamap bikpela long planti hap bilong kantri.

Kot bilong Gavana Yali bai kamap long neks wik

KOT bilong Gavana bilong Madang, James Yali i surik i go moa long Jenuari 17, 2005, bihain long kot bilong em i bin kamap long Madang Distrik Kot long Mande dispela wik.

Distrik Kot Haus long Madang i tokim *Wantok Niuspepa* olsem dispela kot bilong Mista Yali i bin kamap wantaim tu kot bilong meri bilong em yet Helen Daniels long dispela Mande.

Tasol kot i surikim taim bilong kot i go moa long kisim moa ripot na moa toktok long kamapim dispela tupela kot.

Kot haus i tok em i samting bilong polis long

Drekikir kisim nupela haus lotu

Joe Roszynski SVD i raitim

TOKTOK bilong Yumi yet i sois i kamap tru long taim bilong blesing bilong nupela haus lotu i kamap long Drekikir long Is Sepik provins long Trinde, Jenuari 2005.

Dispela haus lotu i kamap taim Pater Alois Tapi wanpelea daisesen Pater bilong Wewak daioses i stap paris pris. Tingting i akmpa taim Bisop Ray Kalisz SVD i stapyet long Wewak na em i painim smpelamari long Amerika tasol bikpela helpim i kam tu logn ol pipel bilong Drekikir paris na mamba bilong ol Tony Aimu.

Planti pipel long kainkain hap i kampa lng dispela de. 20 Pater bilong Daioses na ol SVD husat ol istatim wok long dipela hap bipo tu i bin kamap.

Bisop Tony Burges i go pas long dispela bikpela selebren na Bisop Austin bilong Aitape tu i stap wantaim. Ol pipel i amamas long lukim mak bilong bili bilong ol na wok bung wantaim wantaim pater bilong ol. Ol misinari tu i amamas bikos em ol i akm long PNG long kirapim Katolik sios long dispela kantri na nau ol i ken lukim sios i strong pinis. Hau slout i kisim nem Holi Yukaris long tingim Jisas i stap long Santu Oikaristia.

PNG Waterboard i sainim agrimen wantaim RD Tuna

Steven Dama
i raitim

PNG Waterboard wantaim RD Tuna pis kampani i bin sainim wanpela agrimen long statim 2005 wantaim tok orait olsem tupela bai wokbung wantaim long kamapim wanpela bikpela projek long Madang provins. Tupela bai kamapim wanpela bikpela wara saplai we bai i stat long Madang Teachers College i go daun long tuna keneri bihainim not kos rot. Ol i bin pasim dispela wanbel long Jenuari 3, 2005.

General menesa bilong PNG Wara Bod mista Patric K. Amini na General menesa bilong Sauten Kros Pamps na Wara Saplai, Mista Andrew O'Brien i bin i go pas long dispela agrimen sain hia long Mosbi.

Projek Sief Enjinia, Mista Giamsa Yagas i bin tok moa long dispela wok karimaut olsem em i bilong RD-Tuna Keneri husat i

save yusim 1.5 i go inap long 2 litas long wanpela de. Dispela 3.8km na 200mm pipe bai givim tu saplai long ol pipel husat i laik kisim wara saplai. Em i tok Skul olsem Sagalau komyniti skul na ating long ol narapela wok kamap bilong ol haus bilong Ramu Nikel Projek tu bai kisim wara saplai long dispela projek behain.

Mista Giamsa i tok olsem kost bilong dispela projek K1.8m. Em RD-Tuna bai lukluk long dispela kain mani na PNG Wara Bod bai lukluk long balance.

Em i tok ol PNG Wara Teknikel sevis bai i go pas long dispela projek.

Sip Enginia i tok, ol i bin odaim ol wok samting long Disemba 2004 na ol i ting dispela samting bai i kam kamap long namel long Febuari 2005 na wok bai i stat long sem taim na wok bai pinis long April 2005. Em i ting ol dispela projek bai pinis bihain long 4-pela mun.

kamap wantaim ol evidens na ripot long kamapim dispela kot long neks wik.

Mista Yali i sanap long kot long asua bilong bagarapim (reip) yangpela tambu meri bilong em yet long Oktoba las yia.

Polis i sasim em long 4-pela asua olgeta insait long dispela bikpela asua bilong bagarapim yangpela skul meri we krismas bilong em i 17.

Tasol susa bilong dispela meri na meri bilong Mista Yali, Elizabeth Daniels, tu i bin kisim sas long traim stopim polis long wok bilong ol long lukluk insait long dispela asua bilong man bilong em na

yangpela susa bilong em.

Polis i sasim Misis Daniels long dispela pasin em i mekim.

Yangpela dispela meri i bin mekim toktok bihain olsem Mista Yali i no bagarapim em. Tupela i bin slip wantaim we i stret bikos Gavana i no pusim em o holim em. Em yet i bin bin wanbel wantaim Mista Yali na tupela i mekim dispela pasin pamuk.

Kot bilong ol bai kamap long neks wik 17 Jenuari 1005 na planti manmeri long Madang na ol narapela hap bilong kantri bai lukluk gut long lukim wanem bai i kamap.

Gavana Luther Wenge laik kamap Oposisen lida

GAVANA bilong Morobe provins Luther Wenge i tok em i redi long kamap lida bilong Oposisen long holim strong bung bilong palamen.

Mista Wenge i mekim dispela toktok bihain long ol toktok na senis i kamap we ol mamba bilong Oposisen i wok long go joinim Gavman sait long las mun i kam. Sampela Oposisen memba i go bek joinim ol pati memba bilong ol husat i stap long Gavman sait. Kain olsem Pipels Eksen Pati (PAP), PNG Nesenel Pati na Pipels Progres Pati (PPP). I gat toktok olsem Pipels Nesenel Kongres (PNC) bai inap joinim Gavman bilong Somare na kamapim wanpela bikpela Gavman tasol.

Mista Wenge i tok insait long stail bilong politikis ol i kolim Wesminista sistem we Papua Niugini i save bihainim, i mas i gat Oposisen. Taim i gat Gavman i mas i gat Oposisen long mekim ron bilong palamen i ron stret.

Mista Wenge i tok Oposisen em i bikpela samting tru wankain olsem Gavman. Gavman na Oposisen em wankain tasol. I nogat wanpela man i kam daun long heven o olsem ensel na mekim sait bilong Gavman i bikpela moa winim Oposisen. Tupela sait wantaim i wankain, Mista Wenge i tok.

Em i bikpela samting em disisen bilong palamen long kamapim lo na polisi tasol em i bikpela samting tru. Bikos dispela bai kamapim senis long laip na sindaun bilong ol pipel bilong kantri. Na sapos dispela disisen na polisi i gutpela bai pipel i sindaun gut na sapos em i no gutpela bai sindaun na laip i bagarap. Olsem na long skelim gut na glasim gut dispela hevi long noken kamap insait long lo na polisi bilong Gavman, i mas gat Oposisen long stretim dispela samting i ron gut. Sapos nogat, kantri bai bagarap na pipel bai kisim taim, Mista Wenge i tok.



Senis...Komanda Lutenen Kenel William Janguan (rait) i sikan wantaim nupela Komanda Lutenen Kenel Mark Goina (lephan) long Moem Bareks long Wewak long makim nupela senis bilong kisim posisen na wok long 2005 i go. Lutenen Goina i senisim Lutenen Janguan olsem Komanda bilong Moem Bareks.

Hap Hap Nius

Ol tisa long Madang i kros

Moa long 300 tisa long Madang i brukim provinsal edukesen opis long las Fraide. Dispela hevi i kamap bikos ol tisa i kros long ol i no kisim balus tiket na poket mani bilong holide bilong ol long 2004. Dispela bel hevi i kamap namel long ol tisa bilong narapela provins husat save wok na stap long Madang na i laik go long krismas holide long asples bilong ol tasol ol i nogat balus tiket na pe bilong ol. Ripot i kamap olsem Tisas Sevis Komisin i no kamapim wanpela rot yet namel long ol na Madang edukesen opis na dispela i kamapim dispela hevi namel long ol tisa. Madang edministreta i tokaut olsem ol bai traim long painim sampela rot long lukluk na traim stretim dispela hevi tu. Dispela hevi bilong tiket i no bilong Madang tasol. Planti arapela provins i komplem long dispela hevi. Planti singaut i bin go long Dipatmen bilong Edukesen tu long traim long stretim ol dispela hevi.

Amamas long gutpela baset

Olpele mamba bilong Finsafen Alfred Pogo i mekim bikpela tok amamas i go long Morobe Provins Gavman long kamap wantaim gutpela mani plen bilong provins long dispela yia 2005. Mista Pogo i tok longpela taim provins i nogat kain plen bilong ol rot na bris projek insait long provins. Na dispela i mekim planti pipel i save kisim taim long rot na sip long go long maket o ol sevis bilong gavman long go gut long ol ples. Mista Pogo i tok amamas long fainens siaman bilong provins Tim Bafenu wantaim ol presiden long wanbel wantaim na kamapim dispela gutpela baset bilong provins. Dispela kain baset bai kamapim trupela kaikai bilong provins i lukim ol developmen na sevis i ron gut na provins i senis gut, Mista Pogo i tok. Ol dispela kain ol baset i ken helpim gut sindaun bilong ol pipel, we ol i bai kisim ol sevis na lukim ol developmen i kamap long ol ples bilong ol. Em i laik lukim ol dispela kain baset i kamap yet long bihain taim.

Hap Hap Nius

Launa laik kirapim Karamui Kundiawa rot

Gavana bilong Simbu provins Peter Launa i tokim ol pipel bilong Karamui long las wik olsem bai em i strong long wokim rot long Karamui na Kundiawa pastaim long 2007 ileksen i kamap. Mista Launa i givim ol pipel sampela samting bilong yusim long brukim graun na klinim ples long statim wok bilong mekim rot. Dispela rot bai stat long Karamui stesen i go long Kilau Mogiagi pastaim na bihainim bungim wantaim Gumini Kundiawa rot. Mista Launa i tok dispela rot bai kos samting olsem K2 milien we em i stretim pinis tasol dispela mani bai i go antap moa sapos Nesanel Gavman i givim em sampela mani bilong provins long em. Taim olgeta bus na diwai i klia long rot bai wanpela kampani i kam na brukim graun na wokim rot long dispela hap i go. Ol dispela tuls o ol samting Gavana i givim long ol pipel i yusim long brukim ol diwai na bus i kos samting olsem K10,000.

K135,000 paul long Isten Hailans

Provinsel Edministreta bilong Isten Hailans, Munare Uyassi i tokaut olsem edministresin bilong em long provins bai go het yet long traim strongim gutpela wok bilong lukautim mani na bringim kamap gutpela wok long 2005. Mista Uyassi i tokaut olsem taim ol i stretim olgeta mani ripot insait long ol buks bilong provinsel gavman ol i painimaut olsem K135,000 i bin paul long han bilong ol ofisels bilong Treseri dipatmen. Mista Uyassi i tok tu olsem ol provinsal menesmen ripot we i go bek long yia 2003 em ol i givim pinis i go long han bilong Dipatmen ov Provinsel Afes. Dispela em bihainim lo bilong Ogenik Lo bilong Provinsel na Lokel Level Gavman. Insait long las tupela yia i go pinis provinsel gavman i bin lukluk i go insait long stretim wok bilong edministresin.

Toktok bilong Hela long kamap provins i kamap

OL PIPEL bilong Sauten Hailans provins i no sanap bung wantaim yet long wanpela bikpela tingting bilong kamapim narapela provins.

Bikpela toktok i bin kamap long kamapim Hela provins na Minista bilong Inta Gavman Rilesens Sir Peter Barter i bin tokaut olsem ol i mas mekim na stretim olgeta samting gut nau i go pastaim long 2007 nesanel ileksen i kamap.

Dispela toktok bilong Sir Peter Barter i kirapim tru bel bilong planti Hela pipel na ol mausman husat i kam aut long nius na tokaut long ol plen na tingting bilong ol.

Tasol Gavana bilong Sauten Hailans provins, Hami Yawari, i tokaut olsem dispela toktok o plen bilong kamap Hela provins insait long Sauten

Hailans i no stret olgeta.

Mista Yawari i tok dispela plen bai bagarapim tru gutpela sindaun na bung wantaim bilong ol pipel bilong Sauten Hailans.

Mista Yawari i tok nau yet ol pipel i sindaun gut na wok bung wantaim gut na wanem kain tingting bilong brukim provins bai kamapim bikpela bruk namel long ol pipel na provins olgeta we dispela inapim kamapim bikpela hevi long gavman na kantri tu wantaim.

Mista Yawari i tokaut tu olsem kain toktok na tingting olsem bilong kamapim narapela provins em ol lain i toktok long ausait long rot tasol na ol i no kam bung wantaim em na gavman bilong provins long tokaut long kain tingting na plen

olsem.

Olsem na em i tok dispela kain toktok bilong kamapim narapela provins em i no tru toktok na ol lain i toktok ya i no makim tru maus bilong olgeta pipel bilong Sauten Hailans provins. Olsem na olgeta dispela toktok i no tok tru.

Dispela toktok bilong kamapim narapela provins long Sauten Hailans i no nupela toktok.

Dispela toktok i bin kamap bipo na i bin kamap tu long palamen long taim bilong olpela Gavana Anderson Agiru.

Palamen i bin kamapim tu ol lilektorel Baundri Komisin long lukluk insait long kain wok olsem long glasim na makim ol baundi o boda bilong ol provins gen.

Uyassi tokaut long "Wok-Mak" sistem long ol Isten Hailans provins rot projek

James Kila i raitim

ISTEN Hailans provins bai lukim wanpela narakain program bilong "Wok-Mak" long lukautim na stretim rot insait long ol distrik bilong en stat long dispela yia 2005.

Provinsel Edministreta bilong Isten Hailans, Munare Uyassi i tokaut olsem edministresin bilong em bai lukluk long kamapim wanpela kain program we i lukluk long "Wok-Mak" sistem long stretim na lukautim gut ol rot insait long provins.


Isten Hailans Provinsel Gavman i luksave olsem rot em wanpela bikpela samting insait long ol developmen plen bilong en.

Olem na bikpela wok nau em long stretim ol rot na givim gutpela sevis i go long ol pipel husat i stap long ol rurel eria long bringim ol gaden kaikai bilong ol na tu kopi bilong ol i go aut long maket long salim na kisim mani long helpim sindaun bilong ol long viles na haus-lain komyuniti.

Mista Uyassi i tokaut olsem tupela rot we nambawan "Wok-Mak" program bai stat long en em Seigu-Megabo rot na Raipinka-Okapa rot. Dispela program bai stat long dispela yia 2005.

Edministreta Uyassi i tok tu olsem distrik rot impruvmen program (DRP) program em nesanel gavman i kamapim i tok long kamap gut insait long Isten Hailans provins. I gat bilip olsem moa rot projek insait long provins bai lukim wok kamap insait long dispela program.

Mista Uyassi i tokaut tu olsem



• Mista Uyassi (rait) i sanap klostu long Yanepa Provinsel Gavman bilding long Goroka.

Foto: JAMES KILA

K100, 000 bai i go long wan wan distrik insait long dispela DRIP program. Ol loka! MP bilong provins tu bai givim mani mak olsem K50, 000. Aninit long DRIP program tu bai lukim

provinsel gavman i putim K50,000 na nesanel gavman bai putim K200,000.

Em i tokaut tu olsem moa long K3-milien bai ol i putim long ol rot projek insait long Isten Hailans provins.

Mista Uyassi i tok olsem long las yia 3-pela rurel rot projek i bin kamap we mani i kam long provinsel gavman na Esien Developmen Benk (ADB) long helpim ol pipel.

Apa laik AVDA yusim K5.5 milien long gutpela wok developmen

James Kila i raitim

BIKPELA singaut nau i go long ol bod ov dairekta bilong Arona Veli Developmen Koporesen (AVDA) long yusim gut dispela K5.5 milien ol i kisim long PNG Pawa ino long taim i go pinis long mekim gutpela wok developmen long eria bilong ol.

Dispela singaut i kam long Siaman bilong Isten Hailans Blokholda Kopi Groas Asosiesen, Kollen Upa long Kainantu las wik.

AVDA em wanpela kampani bilong ol lain papagraun bilong Yonki eria we bikpela pawa saplai na dem wara i stap long en long Isten Hailans provins. Dispela pawa saplai em bikpela tru we i save givim ilektrisiti sevis long Morobe, Madang na ol Hailans provins. AVDA em wankain olsem ol papagraun kampani bilong ol lain Koiari long Sentral provins husat i save kisim moni bilong graun na ol narapela

samting long stet na PNG Pawa.

Mista Upa i tok olsem ol lain lida o ol dairekta insait long AVDA i mas yusim gut dispela mani ol i kisim long PNG Pawa long helpim ol liklik manmeri long ples na tu bringim ol gutpela sevis long helpim sindaun insait long hauslain na viles komyuniti. Ol bikpela sevis ol i mas traim long strongim em long sait bilong helt, edukesen na tu stretim ol rot i raunim Yonki Dem na ol eria klostu long en. Nau yet rot we i raunim Yonki Dem stat long Sasaura i go olsem long Aiyura stesen i no bagarap tru olsem na AVDA i mas traim long lukluk long helpim ol pipel na stretim rot long dispela eria.

Mista Upa i tok ol lain ADVA i noken traim long pilai politiks long dispela moni long ol narapela rot nogut. Dispela mani ol i mas tilim na yusim gut long gutpela wok long givim sevis long ol manmeri insait long Yonki na Arona Veli komyuniti.

Em i tok tu olsem wanpela bikpela samting ol lain AVDA i mas lukluk long en em long traim helpim ol kopi blok insait long Yonki na Arona veli we nau i lukim wok i pundaun go daun liklik.

Dispela ol eria long Yonki na Arona veli em planti lain i wok long go insait long wok kopi developmen olsem na sapos ADVA i gat gutpela tingting em i ken traim helpim ol na strongim wok bilong kopi bikos kopi em sasteinabel risos o samting we i ken stap longpela taim long helpim ol liklik manmeri long ples long kisim mani long helpim sindaun bilong ol, em i tok.

Mista Upa i tok olsem nau yet planti ol kopi blok na plentesen insait long Yonki eria i ran-daun olsem na AVDA i mas traim kirapim wanpela kain kredit fasiliti o rot bilong putim mani long dinau long helpim ol papa bilong ol dispela bloks o plentesen long kirapim gen long projek bilong ol.

Moroi opim rot i go long ol pipel long bus Rigo

Maisan Pahun i raitim

LONG 15 yia olgeta ol lain Maipiko na Gomavo i save yusim wara Oman na bus rot long karim ol siklain, kaikai na ol kago i kam daun long haus sik o Kwikila gavman stesen. Tasol nau klostu long 400 pipel bilong Gomavo na Maipiko eria long Rigo insait long Sentral provins bai i gat rot.

Wanpela rot projek we World Bank i kamapim aninit long District Road Improvement Projects (DRIP) bai i kamap long helpim dispela tupela bikpela eria na ol pipel i stap klostu long em.

Gavana bilong Sentral provins, Alphonse Moroi, i bin opim dispela rot projek wantaim Provinsel Edministreta bilong provins, Raphael Yibmaramba, las Fraide.


Wanpela kampani bilong China Jixin Industry i winim dispela kontrak long kamapim wanpela 50km-70km rot we bai i kostim klostu long K100,000 long statim.

"Long yusim bensin na karim ol dosa o masin bilong brukim rot i kam long dispela ples i kostim kampani klostu long K15, 000," Deputi Jenerel Menesa bilong Jixin Industry, Johnson Yao, i tok.

Jixin Industry em wanpela timba kampani we i stat wokim bisnis long Wewak long 1997 na bihain i kam olsem long Sentral provins na kamapim rot projek long Waimori insait long Mekeo sait.

Mista Moroi taim em i opim dispela rot i tokaut olsem dispela rot bai i helpim ol lain long bus karim kaikai samting kam salim long taun.

Tupela lida bilong Maipiko ples, Issac Gana na Daniel Jack, i amamas long Mista Moroi long harim kra i bilong ol lain long bus na stretim rot bilong ol.



• Mista Moroi (lephan), Mista Yibmaramba (namel) na Mista Yao (rait) i sanap antap long wanpela dosa long opim bilong rot. Foto: MAISAN PAHUN

"Mipela i amamas long Gavana Moroi bikos insait long ples em mipela planim kopi, kokonas na vanila we nau i redi tasol hat long mipela karim i kam long stesen," Mista Gana i tok.

Na tu i gat wanpela skul na klinik i stap insait long Maipiko tasol nogat tisa na nes long wok bikos nogat rot i go insait na ol gavman wokman i les long wokabaut i go insait, em i tok.

"Taim rot i kamap bai ol tisa na haus sik woklain

kam bek wok na ol pipel tu i ken strongim ikonomi bilong ol.

"Tasol wanpela samting em open memba bilong ol i stap we, kain wok bilong stretim ol liklik rot em wok bilong open memba long wokim," Mista Moroi i tok.

Dispela Maipiko-Gomavo rot bai i bung wantaim Magi Haiwe klostu long wara Oman insait long bus Rigo.

Oresi strongim ol projek long ol ples

OL AGRIKALSA projek long ol ples o viles long Sohe distrik long Noten provins bai kisim gutpela luksave long memba bilong Palamen bilong en Peter Oresi.

Mista Oresi i laik kirapim bek ol olupela plentesen na planim ol nupela sid long iilektoret bilong em.

I no long taim i go pinis, em i bin tilim K200,000 long ol kainkain agrikalsa projek na ol trening woksop long helpim long mekim dispela i kamap.

Bikpela hap bilong dispela mani mak, K50,000, i bin go long baim ol vanila kating (hap rop bilong planim) we ol i bin tilim namel long 3,500 fama husat i bin gat graun ol i redim pinis long

planim ol kaikai, na husat i bin planim ol diwai save haitim san na mekim ol narapela wok we ol i mas wokim long kisim ol dispela kating.

Dispela ol vanila kating i bin go long ol fama bihain long wok lukluk raun i bin kamap long fam o gaden bilong ol long lukim sapos ol i bin karimaut olgeta ol dispela wok. Dispela i bilong lukim olsem ol fama i planim ol kating gut long graun we i redi gut.

K40,000 i bin go long baim ol tripela rais mil masin bilong ol ples bilong Sui, Hurata na Sengi, husat i wok long groim rais long moa long 5-pela yia pinis nau.

Ol sekta bilong kopra, kakao na raba, olgeta i bin kisim

K300,000.

Dispela mani i bin go long baim ol kain samting olsem ol samting bilong wok wantaim, ol haus we wok i save kamap long redim ol dispela kaikai o krop.

Dispela kain helpim bai strongim gut tru agrikalsa long ol dispela ples na strongim tu ikonomi bilong kantri.

Mista Oresi i tok olsem em bai givim bikpela luksave long agrikalsa bikos em i wok we ol pipel bilong em i ken wok gut long helpim long kamapim na painim gutpela sindaun long en.

Bikpela luksave i bin go long agrikalsa yia i go pinis long traim long kirapim bek strong long ol provins na kantri tu.

Polis lukluk i go insait long dai bilong meri

POLIS i wok long mekim wok painimaut i go insait long dai bilong wanpela meri.

Man bilong dispela meri i bin painim em i hangamap long wanpela diwai ausait long haus bilong ol long Kerema, i no long taim i go pinis.

Sauten Rijon Divisenel Komanda na Asisten Komisina John Marru, i tok aste olsem wanpela de pastaim long dai bilong dispela meri, man bilong em i bin sutim tok long em olsem em i wok long prenim narapela man na polis i bin mekim wok long traim long stretim dispela hevi namel long tupela.

Man husat i bin prenim dispela meri i bin givim sampela mani olsem kompensesen long man bilong meri, na olgeta i bin wanbel na i go long haus, Mista Marru i tok.

Long moning man i bin painim meri hangamap long diwai.

Hap Hap Nius

Man reipim meri

Polis i wok painim yet man (saspek) husat ol i bilip reipim o holim pasim na bagarapim wanpela meri long Galp provins. Dispela meri, husat i gat 20 krismas, na bilong Galp provins yet, i bin bungim dispela birua taim em i bin go long wanpela danis long Malalaua stesen long Disemba 24 las yia, ol polis i tok. Ol i tok dispela birua i bin kamap namel long 7 na 8 kilok long nait long haus bilong saspek we danis i bin kamap long en tu. Sauten Rijon Divisenel Komanda na Asisten Komisina John Marru, i tok olsem dispela birua i bin kamap long dispela danis taim nogat man i wok long lukluk. Em i tok olsem saspek i bin pretim dispela meri wantaim wanpela liklik naip na pulim em i go insait long ol bus i stap klostu long haus na reipim em.

Planim ol dai man

St John Ambulance Volunteer Services i bin planim bodi bilong tripela dai man husat i bin stap long mog o haus we haus sik save putim ol dai man bilong Pot Mosbi long 1983 i kam inap nau. Ol i bin planim ol long 9 Mail matmat long Pot Mosbi las Fraide. Wanpela mausman bilong St John Ambulance Volunteer Services, Fred Buyoka, i tok namba bilong ol bodi bilong ol dai man ol i planim pinis em inap long 20 olgeta na moa yet i stap long mog.



Land Cruiser 78 Series 4WD Troop Carrier

Advantage :

- Powerful 4.2L Diesel engine
- Proven Over 50 years
- 15 Branch Nationwide Backup
- Genuine Parts & Quality Service
- PNG's Only Quality Assured* Motor Dealer

*Quality
Performance
Proven
Reliability*

*QUALITY ASSURED AS/NZS ISO 9001 : 2000



Ela Motors

PNG'S Toughest 4x4
wheels for the Nation

Talasea LLG gat lo bilong lukautim ol samting long solwara

Veronica Hatutasi i raitim

TALASEA Lokel Level Gavman (LLG) insait long Wes Nu Briten provins i kamap olsem namba wan LLG insait long kantri long gat lo nau long lukautim ol marin risos o ol samting i stap long solwara bilong em.

Dispela i kamap bihain long tupela yia wok long redim ol na kamapim ol plen na toktok wantaim ol pipel, ol provinsel gavman atoriti na ol narapela lain we dispela lo bai karamapim ol. Ol i kolim lo long Talasea Marine Environment Management Law.

Taim Inta Gavman na Rilesens Minista Sir Peter Barter i kisim dispela lo long han bilong Alphonse Ngava husat i Siaman bilong Plening na Infomesen Komiti wantaim Talasea LLG, em bin tok em i gat bilip olsem ol arapela LLG na ol nambis provins bai bihainim Talasea LLG na kamapim lo long lukautim ol samting long solwara na ol pikinini na bubu i kam long bihain taim i ken lukim, amamas long ol na yusim.

"Mi tok amamas tru long Talasea LLG i kamapim lo long lukautim ol samting bilong solwara. Long save bilong mi, dis-

pela em i namba wan taim we wanpela LLG long PNG i kamapim long lukautim ol samting bilong solwara bilong bihain taim, na wanpela we ol asples pipel yet na komyuniti i sponsaim. Yumi lukim kaikai bilong hatwok nau we Talasea LLG i go pas long en na gavman long PNG na Nature Conservancy i sapotim.

"Yumi mas putim moa wok long lukautim envoirnmen na mi bilip ol arapela LLG long provins na ol nambis provins i wokim wankain na kamapim lo bilong lukautim ol samting long solwara na envoirnmen long ol lain bai i kam bihain," Sir Peter i tok.

Kimbe Be we dispela lo bilong lukautim solwara i karamapim i gat bikpela mak bilong ol korol rip long wol. Em i gat 60 ol kain kain korol insait long em. Na provins na eria i gat ol bikpela wel pam kampani we i ken bagarapim ol samting long rip na solwara.

Olsem na Talasea LLG i bin wok wantaim gavman, ol NGO na ol asples pipel long daunim hevi na dispela Marin Envoirnmen Menesmen Lo bai helpim long daunim ol hevi. Na dispela lo em i namba wan we wanpela LLG long PNG i kamapim long en.

Mista Ngava i tok ol i wokim dispela lo bihain long wari olsem ol pipel i wok long pinisim ol samting bilong solwara long Kimbe Bay eria.

"I gat planti developmen i kamap long werlpam bisnis. Olsem na mipela i bin lukim olsem i mas gat lo bilong kontrolim ol risos long Kimbe Be eria.

"Bikpela hevi long bagarap long Be i bin stap long ol pis, ol rifs na ol arapela samting insait long solwara na Nature Conservancy i bin salim wanpe,al konsalten o save man i kam long Talasea LLG long helpim wantaim wok bilong kamapim lo.

"Mipela bin kamapim lo bihain long planti toktok na wok plen we i kisim i kam insait konsevesen o pasin bilong lukautim gut ol samting na gutpela wok kamap long eria.

Dispela em i bikpela samting (milestone) long konsevesen na developmen long LLG level.

"Mipela i amamas tru long dispela projek na bai mipela i wok bung wantaim gavman, ol NGO na ol arapela lain i gat laik long dispela eria long kamapim gutpela samting we bai helpim olgeta lain," Mista Ngava i bin tok.

Lo bilong tambuim plastik beg i no gutpela

DISPELA lo bilong stopim na yusim plastik beg insait long kantri i no gutpela na bai i bagarapim planti bisnis na manmeri insait long kantri.

Wanpela ripot i kam long National Research Institute i tok olsem dispela lo bilong stopim wokim na usim bilong plastik beg i no gutpela na Gavman i mas sindaun gut na lukluk i go long sosol, ikonomik na envaromen bilong sait bilong dispela lo paslain long ol i putim stop.

Minista bilong Envaromen na Konsevesen, William Duma, i bin kamapim dispela lo bilong stopim platik beg insait long kantri stat long Epril 1 long kisim ovasis plastik beg na Jun 1 long yusim lokel plastik beg.

2005 i no inap kamap wanpela gutpela yia

Maisan Pahun i raitim

MEMBA bilong Wewak Open, Kimson Kare, i tok olsem dispela yia i no inap kamap gutpela sapos Gavman i wokim nogut disisen long stretim sindaun bilong ol manmeri.


Em i tok olsem kantri Papua Niugini bai 30 yia independens na nogat wanpela gutpela senis i kamap yet.

Em i tok PNG i olsem wanpela boi wok long gro yet i go kamap bigman. Lo na Oda pasin i

kamap bikpela tru na wanem taim bai ol manmeri i lainim long stap isi na tu ol lida long wokim strongpela lo long stretim kain pasin bilong kilim man na reip.

Kain pasin bilong kilim man i dai na reip i wok long kamap long olgeta dei na lo bilong dispela kantri i isi long ol lain i wokim kain trabel.

Mista Kare i tok kain pasin nogut i mas gat penalty bilong dai i stap long bagarapim ol lain husat i wokim kain pasin nogut.



Meri Rigo...Wanpela meri bilong ples Matairupu long Rigo distrik i salim pis long rot i stap taim Wantok Niuspepa i go kamap long Rigo long lukim Gavana bilong Sentral provins Alphonse Moroi i opim nupela rot projek long Maipoko.

Poto: MAISON PAHUNZ

Polis holim pasim pinis trabelman

Bustin Anzu i raitim long Honiara

POLIS long Honiara i holim pasim pinis wanpela man we ol i bilip i kilim i dai narapela polisman bilong RAMSI long kapitel siti Solomon Ailan long las yia.

Dispela man, husat i gat 29 kris-mas, i kamap long wanpela kot long Tunde apinun na bihain i go bek long banis kalabus long wetim taim bilong en long kamap long kot. Kot bilong em bai kamap long Jenuari 25.

Polis i sasim em long i dai bilong polisman na narapela sas long klostu kilim i dai wanwok bilong Dunning. Narapela tupela sas em long klostu laik kilim i dai narapela tupela PPF memba Oktoba 21, we ol i sutim ol long gan we ol i kisim liklik bagarap.

Polis i gat strongpela bilip olsem James Tatau bilong ples Ofaalomae long Malaita Provins, i bin kilim i dai polisman Adam Dunning, bilong Australian Federal Polis, tasol i wok wantaim Participating Police Force (PPF) aninit long lukaut bilong Regional Assistance Mission Solomon Ailan (RAMSI).

Namba tu Polis Komisina bilong RSIP na Komanda bilong PPF Sandi Peisley i tok: "Bihain long mipela i kisim trupela ripot long Tatau i stap long ples, ol polisman bilong RAMSI i bin igo long liklik Malaita na luksave long em.

"Dispela em i wanpela gutpela sain bilong wok bung bilong ol RSIP na PPF we kaikai i kamap. Ol RSIP i bin wokim bikpela wok tru long holimpasim Tatau. Mi tok amamas i go long ol," em i tok.

Dispela birua i bin kamap long Disemba 22 las yia, we Dunning wantaim narapela wanwok bilong en i patrol long wanpela ples ol i save kolim long Bodalain taim ol birua i sutim em long gan.

Wanwok bilong em i no kisim bagarap long dispela hevi.

Bihain long dispela birua, wanpela trabel man John Ome, i kam long plis stesin long laik bilong em yet na Tatau ino soim pes inap nau ol Royal Solomon Ailan Plis (RSIP) i holim pasim em long wanpela ples Ro'one bilong liklik Malaita long Tunde namba 11 de bilong mun Jenuari.

Dispela wok painimaut i kamap bihain tasol long idai bilong Tatau long painim olgeta man husait i wokim dispela trabel. Nau yet em tupela man plis i holim passim long idai bilong Tatau.

Narapela man, John Ome i kamap long plis stesin tupela dei bihain long i dai bilong Dunning.

Em tu i kisim wankain sas olsem Tatau na nau i stap long wetim kot.

Komanda Peisley i tok tenkyu long ol lain pipel bilong Solomon Ailan long kam paslain na givim ol stori bilong Tatau istap long wanem hap tru.

Em i tok tu olsem dispela wok painimaut bilong Dunning bai i go het yet inap ol i painim olgeta man husait i kilim Dunning i kamap long kot.

Polis Komisina bilong RSIP tu i skruim maus na tok bikpla tenkyu na amamas long ol polismanmeri bilong em long wokim gutpela wok painimaut na holim pasim dispela man Tatau.

Ledi Kidu i kisim namba

Veronica Hatutasi i raitim

SEMPION bilong ol tarangu, ol famili, yut na komyuniti na memba bilong Mosbi Saut Ledi Carol Kidu i bin kisim bikpela luksave long onas lista bilong Kwin long nupela yia wantaim klostu 50 narapela manmeri insait long PNG.



• Nau yumi kolim em Deim Carol Kidu.

...Hat wok na gutpela sevis bilong em i karim kaikai

Nau nupela taitel bilong Ledi Kidu bai em i Deim Carol na yumi tu i mas lainim long kolim em long dispela nupela nem bilong em. Em bin kisim top awod tru wantaim memba bilong Nesenel Kapitel Distrik (NCD) Bill Skate husat i kisim luksave olsem Sir.

Deim Carol i kisim luksave long gutpela wok bilong em long komyuniti na politiks taim nau Sir William Skate i bin kisim luksave long sevis bilong em i go long komyuniti na politiks. Na luksave we Deim Carol i kisim em i bilong gutpela wok wm i wokim long komyuniti na politiks.

Deim Carol i bin kirap nogut long harim nius long awod bikos em bin stap malolo long Australia wantaim lapun mama bilong em.

Tasol em i tok luksave i kamap wantaim helpim bilong planti lain na em i tok tenkyu long olgeta lain long dispela luksave, em i tok em bai skruim wok long sapatim ol famili, yut, ol tarangu lain we nogat man i

save bisi long ol na ol i sot long samting long kisim save na strong na helpim ol yet long kamapim gutpela sindaun na laip.

Klostu 50 pipel long PNG i bin kisim luksave na namba long Kwin long Nu Yia na 9-pela em ol meri.

Long dispela 9-pela meri, 6-pela em nes na helt woka na ol i bin kisim luksave long wok na kontribusen long helt na nening.

Planti manmeri long PNG i save amamas long wok Deim Carol i save mekim na bilip olsem em i wanpela gutpela lida husat i save wok hat long karim gutpela sevis na developmen i go long ol pipel long ilektoret bilong em, na tu long provins na kantri.

Dispela luksave i kaikai bilong dispela hat wok bilong em na bilip bilong ol manmeri bilong kantri long em, na bai helpim kirapim skin bilong em tu long wok moa long helpim ol manmeri bilong dispela kantri.

Lo bilong lukautim ol mama na pikinini meri



Ol Lo bilong Rape, Incest, Child Abuse (reip, inses, bagarapim pikinini) long PNG i senis pinis.

Sexual Assault

Yu brukim lo sapos:

Yu holim ol sem na tambu hap long bodi bilong narapela

Yu mekim narapela i holim sem o tambu hap long bodi bilong narapela

Bai yu kisim mekim save inap long 5-pela yia kalabus. Sapos trabel i bikpela tumas, yu ken kalabus long 10-pela yia.

Procuring a sexual offence o givim oda long arapela lain i wokim pasin nogut long narapela.

Em i rong long long odaim ol arapela lain i wokim seksuel atek o bagarapim narapela man o meri. Man o meri husat i stretim peibek pasin bilong reipim o bagarapim narapela i rong long dispela asua, maski em yet i no karimaut dispela em yet. Dispela pasin bai kisim man i go long kalabus long 20 yia.

Moa long neks wik.

Meri bosim projek long Henganofi

Maisan Pahun i raitim

INSAIT long kantri tude, planti man na meri i save singaut long Gavman na biknem ogenaisesen long helpim ol long kamapim liklik projek na sampela i save singaut long kisim helpim mani i long-wokim ol kempen na aweanes insait long ol ples.

Tasol long Henganofi distrik long Isten Hailans provins wanpela meri Kompri i helpim gut ol pipel insait long Kompri veli i go antap long Kafetina long wei bilong lukautim ol helt na laip stail pasin bilong ol.

Esther Sailas em wanpela nes meri long Kompri helt senta. Dispela helt senta em sios Evangelical Brotherhood Church i ronim na i save sevim ol pipel bilong Kainantu distrik i go antap long Henganofi stesen.

Long wok bilong Esther em i lukim olsem taim ol manmeri na pikinini long dispela tupela distrik i save kisim bikpela o liklik sik, ol i save kam tasol long helt klinik long kisim-marasin. Ol sik manmeri na ol pikinini i no save tingim olsem ol wokmanmeri bilong hausik i wankain olsem ol na i no masin. "Kain liklik sik olsem kus, otpela sua, het pen na pekpek wara i no inap kamap sapos ol manmeri i lukautim ol na klinik haus na ples bilong ol," Esther i tok.

Dispela i kirapim tingting bilong em long go insait long ol ples na skulim ol manmeri na ol pikinini long wei bilong lukautim ol yet na laif stail bilong ol.

"Planti ol haus lain i no klin long helt sait na tu planti ol yangpela manki i stap insait long pasin bilong groim smok mariwana na kamapim raskol pasin. Polis i save kilim sampela i dai tasol yet ol i subim het yet long raskol long Hailans Haiwe," Esther i tok.

Olsem na long yia 2003 Esther i statim wanpela komyuniti program we ol i bin kolim Mi Aspiés i Statim (MAI). Insait long MAI program Esther wantaim ol sios lida long wanwan ples insait long Brebrenka na Saviza komyuniti i wokim promosen na aweanes long 3-pela samting long Laip. Ol dispela 3-pela samting ol i lainim ol manmeri long ples em long lotu pasin, (spiritual living) wei long lukautim bodi (physical) na gutpela tingting (mental).

Taim ol manmeri long ol ples i kam kisim save long awenes program ol i lainim long yusim risos bilong ol yet long ples long kamapim gutpela sindaun. Dispela i opim ai bilong planti lain long ples long klinim ples bilong ol na tu kamapim liklik bisnis long helpim haus lain bilong ol.

Bihain long yia 2004 Esther i kamapim tupela projek long 'Lainim' komyuniti na 'Kamapim' program insait long ol ples. Long lainim komyuniti ol manmeri i lainim long kamapim gutpela laip (human Developmen) long lotu, helt na ikononi sait. Na long kamapim program trening ol manmeri i lainim long kamapim samting long save bilong ol yet.

Long sem taim yet long dispela yia tupela marit Voluntia bilong Canada i save wok insait long komyuniti long Isten Hailans Provins i luksave long wok Esther i wokim na tupela i givim sampela save long helpim i go long Esther. Nem bilong tupela wait manmeri em Bill na Sharon Biebes. Billie em i wanpela Dokta na Sharon em wanpela Tisa. Tupela i stap aninit long wanpela ogenaisesen ol i kolim Medical Ambassador International (MAI)

Long dispela tupela trening program long yia 2004 Brebrenka hauslain i kamapim wanpela konstitusen bilong



• Esther Sailas em wanpela nes meri long Kompri Helt Senta. Dispela helt senta em sios Evangelical Brotherhood Sios i ronim na i save sevim ol pipel bilong Kainantu distrik i go antap long Henganofi stesen.

ples we i olsem lo bilong hauslain i mas bihainim.

Na tu ol lida na komiti bilong ples i kamapim wanpela dinau program we ol manmeri i ken dinau long komyuniti akaun long kamapim bisnis na bihain i ken bekim wantaim profit o win moni.

Na long Saviza hauslain i gat nau komyuniti fam we ol i planim ol kumu long salim i go long Lae, Mosbi na ol taun insait long kantri.

Nau yet long planti ples insait long Kompri veli planti manmeri i wokim gaden na planim ol kumu long salim i go aut long narapela provins. Ol

yangpela tu i stop liklik long raskol long Hailans Haiwe na stil nabaut.

Olgeta hat wok ol i kamapim em nogat wanpela i go pas o gavman sevis i go soim ol long kamapim tasol ol yet i lainim.

Na nau Esther i lukim hatwok bilong em i kamap. Long dispela yia 2005 Bill na Sharon Biebes i tok long kamapim sampela viles projek insait long kompri veli na Esther i amamas pinis olsem nau bel bilong ol manmeri i welwel pinis long senis na bai ol i amamas long kamapim gutpela sindaun bilong ol yet.

Sotpela tok lukaut

Namba tri rot bilong Famili Plening em Depo Provera. Long Tok Pisin, yumi kolim long sut, Helt woka i save givim sut long mama long as o long han bihain long olgeta tripela mun o long 12-pela wik.

Sut i wok olsem wanem? Sut i save stopim bodi bilong meri long rilisim o karim kiau i go long hap we i ken bung wantaim kiau bilong man na wokim bebi. Nogat kiau na meri i no inap long gat bel.

Sut bai wok olsen wanpela rot long famili plening sapos ol mama na meri i kisim long taim ol i makim long en.



Kuk Kona wantaim MERI WANTOK

Chicken Taro Bake

Yu mas i gat:

4 kap slais siken o kakaruk mit we yu katim i go liklik wantaim nogat bun

3-pela kap lip taro

1-pela kap kokonas milk

3-pela siken stok kiub

gris bilong praim wantaim

sol na pepa

2-pela teboispun swit soy sos

Wei long Kukim:

1-Wasim ol lip taro na putim i go insait long sospen i gat 2-pela kap wara. Putim

tu 2-pela siken stok kiub i go insait.

2-Kukim ol lip taro namel long 45 minit na 1-pela awa.

3-Rausim wara na kapsaitim kokonas milk o krim long en

4-Rausim long sospen na putim long sait we i ken kol.

5-Praim ol kakaruk mit wantaim oil na sos inap em i tanim i go braun

6-Putim wanpela kap wara i gat sol na stok kiub long en na kukim inap kakaruk i malumalum.

7-Dreimim stok na taro na kokonas milk miks

8-Boilim na sevim wantaim hotpela rais.

Nius Bilong HIV AIDS

Lok Lukaut



wantaim David Ephraim

Tude long nius bilong HIV AIDS bai mi no inap toktok tasol mi bin askim wanpela strongpela meri husat i gat HIV AIDS long givim yupela rida bilong mi ol gutpela stia toktok.

Nem bilong em Helen Berem na em i wok wantaim Nesanel AIDS Kaunsil na tu em i presiden bilong I GAT HOPE netwok bilong ol lain husat i gat HIV AIDS. Stap wantaim HIV AIDS. Ki bilong stap HIV AIDS i stap insait long positiv tingling na gutpela pasin. Menesim laip bilong mi, stap laip wantaim HIV AIDS i gat gutpela na nogut bilong em. Long tingting na lukluk bilong yu na long ol narapela i lukim yu. Olsem yu husat? Olgeta de yu stap laip wanem kain piksa bilong laip yu we yu soim long ol narapela. Dispela em ol kwesten na tingting long luksave long stap positive wantaim HIV AIDS.

Self estim (strong bilong mi)em i soim strong na bilip long ol save na tingting bilong yu.

Laikim we narapela i soim yu.

Mi gat bilip olsem mi ken mekim.

Mi gat inap pawa long bosim laip bilong mi yet.

Self estim i save gro wantaim krismas bilong yu na save senis long ol ekspirians bilong yu long laip. Taim yu kisim HIV AIDS yu no senis yu stap yet olsem yu yet yu stap bipo. Long dispela as yu mas tingim ol manmeri husat i givim gutpela stia

toktok long yu. Holim strong dispela ol toktok na ol ekspirians bilong yu na rausim ol dispela nogut tingting long het bilong yu we i ken bagarapim laip bilong yu. Dispela em ol sampela rot long mekim yu bilip strong long yu yet long mekim gutpela disisen long laip. Sapos yu lukim olsem yu nogat strong na olgeta save na tingting bilong yu sot, traim pulapim tingting bilong yu wantaim ol gutpela stia toktok bilong ol narapela manmeri. Dispela i save helpim long rausim ol tingting nogut long bagarapim strong bilong bodi bilong yu.

Moa long dispela yu mas go lukim ol sios lida edvaisas, kaunselas na ol sapat manmeri long helpim yu wantaim gutpela stia toktok long helpim yu. AIDS i no minim dai, tasol planti manmeri i dai hariap bikos long poret. Mi laik tok olsem AIDS i pinisim bodi bilong mi tasol em i nogat strong long daunim na senisim spirit bilong mi. Mi stap strong wantaim HIV AIDS.

- Helen Berem

Tude long tok lukaut bai toktok long lidasip bilong ol meri. Long ol wik i go pinis planti luksave i bin kamap insait long wol iong luksave long wok bilong ol lida meri. Long Afrika yet bikipela luksave i bin kamap olsem long kantri Zimbabwe we i lukim Mis Joyce Mujuru i kamap Vais Presiden na long Kenya Ms Wangari Muathai i bin namba wan meri long Afrika long winim Nobel Pis Prais. Dispela i soim stret krai na hat wok bilong ol meri Afrika long pait long rait bilong ol.

Em long Afrika long bringim tingting bilong yu i kam bek long PNG. Mi laik tok olsem yu gat planti ol save lida meri tasol ol man i no save givim gut sans long ol long soim save bilong ol long wok.

Mi laik kisim dispela taim tasol long tok amamas long ol sampela bilong ol dispela lida meri insait long kantri bilong yumi. Wanpela meri wok strong long daunim dispela korapsen pasin long kantri em Patricia Kassman. Na i gat ol planti lida meri olsem president bilong YWCA long Mosbi Priscilla Kare, midia opisa bilong NAC Margaret Munjin na wanpela strongpela yut lida meri bilong Hohola Burns Peak yut, Margaret Peter.

Planti taim yumi lukim pinis ol save na tingting bilong ol lida meri, moabeta yumi nau givim sans long ol lida meri.

Tingim ol tokples tru

Maisan Pahun i raitim

PLANTI ol liklik pikinini i stap long ol taun na stesen long Papua Niugini bai i no inap long save long tokples bilong ol bikos ol i no gro insait long ples we wanpela tokples tasol i stap.

Profesa Kenneth Sumbuk long Tok Inglis bai yumi kolim em "Linguist" em wanpela save man bilong ol tokples insait long Yunivesiti blong Papua Niugini (UPNG).

Em i bin tokaut long dispela hevi bilong tokples bikos nau nupela edukesen rifom bilong elementeri skul i gutpela tasol i no helpim pikinini long save gut long tru tru tokples bilong em. Dispela i mekim pikinini i lainim Inglis na wokim gut long skul bilong waitman tasol em i lusim kalsa na kastom bilong em.

"Planti tokples long PNG i wok long dai isi isi na i no longtaim bai ol manmeri i no save long kalsa na kastom bilong ol," Profesa Sumbuk i tok.

Narapela bikipela samting tu taim ol manmeri i lus tingting long tokples

bilong ol, ikonomi na developmen bilong kantri bai i go daun na bagarap bikos ol manmeri bai i save laik long bihainim wanpela kalsa na pasin tasol.

"Yumi mas klia olsem ol tokples i no save kamap nating, nogat, tokples i kamap taim i gat manmeri stap long em. Olsem na taim ol manmeri i lus tingting long tokples bilong ol bai ol i go bihainim ol narapela lain na ples we i gat tokples na kalsa we ol i gat save long em," Profesa Sumbuk i tok.

Kain pasin i klia long kantri tete we bai yu lukim planti saveman na meri i lusim ples na kam stap long taun bikos ol lain long ples i nogat save bilong kain tokples ol taun na save manmeri i gat, em i tok.

"Traim tingim sapos olgeta pikinini nau i lainim Inglis long elementeri i kam kamap long gret 12.

"Bai ol i no inap go bek long asples bilong ol bikos ol i no save long tokples bilong lain long ples na bai laik stap long taun tasol," Profesa Simbuk i tok.

NEC tok orait long 2005-2014 Nesanel Edukesen Plen

Desney Koimo i raitim

NESENEL Eksekjutiv Kaunsel (NEC) givim tok orait pinis long Nesanel Edukesen Plen bilong dispela yia long mekim wok bilong en long narapela 10-pela yia namel long 2005 inap 2014.

Minista bilong Edukesen Michael Laimo i givim bikipela tok amamas i go long NEC long givim dispela tok orait long wanem em i makim bihain taim bilong kantri long

kamapim ol gutpela saveman.

Olgeta lain husat i gat wok insait long edukesen olsem ol sios na ol arapela ejensi bai kari-maut dispela plen long stat bilong 2005 skul yia. Dispela plen bai mekim wok bilong putim rifom long ol skul olsem plen bilong 1995 inap 2004 i bin mekim. Planti bilong dispela ol ejensi i wanbel long dispela plen long wanem em bai surukim hap wok we i no pinis aninit long 1999-2004 plen. Nupela plen bai strong long helpim ol

pikinini i go long skul long 9-pela yia long kisim besik edukesen we ol i ken yusim liklik bilong lukautim ol yet.

Mista Laimo i tok Gavman polisi i tok olsem edukesen em i wanpela besik yuman rait na i wanpela rot tasol long go het wantaim developmen na ol arapela gutpela senis insait long kantri.

"10-pela yia em i longpela taim na mipela i lukluk na long wanem rot dispela plen bai kisim na mekim sampela senis" Mista Laimo i tok.

Malaria marasin bai sot bihain long Mas

Desney Koimo i raitim

KAMPANI Novartis husat i save mekim dispela malaria marasin ol i kolim Artemether lumefantrine i tokaut pinis long wanpela ripot bilong em i go long Wol Helt Ogenaisesen (WHO) olsem malaria marasin bai i sot yet bihain long mun Mas na i go.

Dispela marasin i kam aninit long wanpela Artemisinin-based combination therapy o ACT we i save oraitim sik malaria. ACT nau yet i wanpela strongpela marasin bilong kilim binatang bilong malaria.

Papua Niugini i wanpela bilong dispela ol kantri we i save kisim artemether lumefantrine olsem namba tu malaria marasin bihain long klorokwin na fensida.

Malaria Sientis bilong WHO insait long kantri Dokta Luo Dapang i tokaut long dispela na i askim ol pipel long noken pret nating.

"Malaria marasin bai i no inap sot long kantri bikos mipela i kisim klorokwin na fensida olsem namba wan malaria marasin na dispela i no sot" Dokta Dapang i tok.

Tasol ol kantri we i save kisim dispela artemether lumefantrine marasin bai i sot stret long wanem i nogat ol samting bilong mekim. Saina i wanpela kantri tasol husat i save givim saplai bilong ol samting long mekim dispela marasin tasol nau yet em i sot.

Kampani Novartis bai kisim ol saplai bilong em long namel bilong dispela yia 2005 we ol bai lukluk long mekim 30 milien bilong ol dispela artemether +lumefantrine.

Hap bilong dispela namba em bai ol i mekim long las kwota bilong 2005. WHO bai inap long givim teknikel helpim i go long ol kantri husat i nogat marasin long nau yet.

Tokaut AIDS Theatre Trainers

Supported by



Four-year contract for three theatre trainers based in either Raikos, Jimi Valley or Ambunti/Dreikikir

Tokaut AIDS is a 4-year Big Lottery Fund sponsored HIV & AIDS awareness project aimed at improving the quality of lives and reducing poverty in rural communities by lessening the impact of HIV & AIDS.

The project will be administered through Voluntary Service Overseas (VSO), an international non-governmental development organisation that works through volunteers to fight global poverty and injustice. The project will work in close coordination with Foundation for People and Community Development (FPCD) to implement Awareness Community Theatre (ACT) in the three target districts.

As Theatre Trainer you will need experience and skills working as a theatre director and trainer at the community level. You will understand how to work in a participatory manner with community members to create real awareness and change. You will be an excellent team leader with strong verbal and written communication skills and numeric skills. This is a demanding position and requires a capacity to work effectively in a remote district and travel extensively within PNG. You are able to work without direct supervision to set priorities and work to deadline. You are motivated and able to communicate effectively in Melanesian Tok Pisin and English and possess a minimum Grade 10 mathematics and English credit.

VSO values a diverse workforce and welcomes applications from all sections of the community. The positions offer a salary approximate to public servant Grade 10. Applications close Monday, January 17th, 2005.

Forward Letters of Application with your CV detailing relevant experience of both paid and unpaid work, copies of qualifications and contact details of at least 2 professional referees. Please include reliable telephone or fax contact details for applicant. Submit application to: Tokaut Aids Program Manager, Voluntary Service Overseas PO Box 1061, Madang. Fax: 852 1926 • Email: vsopng@vsout.org

Nupela Yunifom bilong PNG Power

Steven Dama i raitim

BIHAIN long 12-pela yia PNG Power insait long Kantri i kisim nupela yunifom bilong wok. PNG Pawa i lukluk i go insait long 2005 wantaim gutpela tingting na luksave long wok manmeri bilong en na ol sevis of i givim. Corporate Image opisa, Leonie Bellem i tok.

Mis Bellem i tok, ol yunifom ol i bin yusim em ol i bin kisim taim ogenaisesen i stap aninit long PNG Electricity Commission.

Tasol piksa bilong ogenaisesen i senis taim em i kamap PNG Pawa, na tu nupela samting i laik kamap.

Mis Bellem i tok olsem long bikpela opis long Mosbi taim em i givim tok orait long yusim ol dispela koperet klos.

Em i tok, piksa bilong ol klos PNG Pawa save putim i oltaim i save kamap nupela.

Em i tok dispela pasin i bilong mekim ol wok manmeri long luksave long ol wok bilong luksave long ol kastoma bilong ol wantaim nupela na gutpela we.

Mis Bellem i tok, dispela yunifom i bilong givim amamas na gutpela tingting long ol wokmanmeri bilong PNG Power na tu long ogenaisesen em yet.

Dispela ol yunifom em Meccano Kampani i mekim hia long Mosbi, Mis Bellem i tok.

Kala bilong yunifom i lait blue antap na dak nevi blue sket na trausis. Ol man i kisim tupela trausis, tupela baten set wantaim wanpela nektai. Ol meri tu i kisim tupela sket, wanpela 3 kuata slip na wanpela sot slip btaus wantaim wanpeia skaf.

Mis Bellem i tok, sapos ol wokmanmeri laik kisim moa ol ken baim long saplaia. Ol i mas putim dispela ol klos long Mande i go daun long Fonde.

Em i tok stat long Jenuari 5, 2005 na i go yet, olgeta wok manmeri bilong PNG Power bai putim ol dispela koperet yunifom.

Wanbel i stap

6-PELA WIK i go pinis i bin i gat rot blok long Esiu, wanpela ples namel long Mosbi na Bereina. Ripot i kam long Doa polis stesen i tok olsem, dispela hevi i bin kamap long sampela mama na papa bilong Simbu taim ol i stat long kam bek long Mosbi bihain long baim buai na daka.

Dispela ol yangpela man i bin sutim ol wantaim gan na ston na ol manmeri long ka i bin kisim bikpela bagarap. Ripot i tok olsem nogat wanpela bilong dispela maket lain i bin dai. Wankain taim, Ol Simbu i bin putim K3000 long dispela bagarap tasol mani ol i givim i K1000.

Las Fonde, Jenuari 6, 2005, i bin i gat kot long Doa polis stesen. Namel long Papua na Hailans, ol polis manmeri i bin wok strong long kamapim bel isi. Wanpela polisman, Konstabel Michael Aubo, i tok strong olsem dispela kain pasin bilong ol yangpela i kranki tru.

Em i tok dispela kain pasin i bin kamap planti

taim na ol pipel i no wok bung wantaim polis long kisim ol kain man i go long sel.

Mista Aubo i tok, ol i traim hat long bringim lo na oda long komyuniti na em i laik bai ol pipel na polis i mas wok bung wantaim long kirapim gutpela sindaun.

Mista Aubo i tok, yumi olgeta i bilong dispela kantri na dispela rot em i bilong Gavman na ol kainkain manmeri bilong narapela hap i gat rait long raun na mekim bisnis olsem ol dispela ol pipel husat i kam bilong baim buai na daka.

Em i tok strong long ol Gabadi olsem ol manmeri i kam long siti long bas em yumi mas amamas na mekim pren wantaim ol bilong wanem ol i bringim mani i kam klostu long asples, na tu yumi mas luksave long ol bai wanpela taim ol i lukim yumi long Mosbi bai ol inap long kisim yumi i go long haus bilong ol.

Mista Aubo i tok laikim pasin mas stap namel long yumi na tu yu yumi i gat wok long

lukautim na skulim ol pikinini long pasin i stret na pasin i no stret.

Mista Aubo i askim ol Simbu long noken bel hevi long wanem liklik mani ol papamama bilong ol yangpela i givim. Papamama i tok, ol i no inap long kamap long K3000 bilong wanem ol i bin mekim planti kompensesen pinis long dispela kain bikhet pasin. Na tu ol i tok, ples i drai na maket kaikai i no kamap gut.

Lida bilong Gabadi, Mista Kine Kuema i autim sori bilong em long dispela bagarap.

Em i sori bilong wanem sampela papamama i no inap long kamap wantaim kain mani olsem ol Hailans i save mekim.

Em i tok dispela helpim i no stap wantaim ol, na ol i gat pasin bilong wanwan yet. Mista Kine i tok, pasin bilong helpim ol narapela i no stap long komyuniti em i stap long en.

Olsem na nau mi kamap wantaim K300 na wanpela liklik pik long soim gutpela pasin, em i tok.



• Ol wokmanmeri bilong PNG POWER i kism nupela yunifom las wik. Hia yu ken lukim olsem ol sanap smat tru na soim gutpela kala bilong ol. Foto: NICKY BERNARD



KOMYUNITI SEVIS TOKSAVE


I go long olgeta kastoma bilong PNG Power long Mendi, Hagen, Wabag, Kundiawa, Goroka, Kainantu, Madang, Lae na ol ples i stap klostu.

Pasim bilong Ramu Sistem las wik i no kamap bilong wanem i gat bikpela tait wara. Dispela pasim bilong Ramu Sistem nau bai i kamap long Fraide namba 14 inap namba 16 de bilong mun Jenuari, 2005.

Ol plen i makim taim bilong katim pawa bilong dispela wiken i stap insait long Post Courier na National niuspepa bilong toksave long yupela.

Toksave i kam long PNG Power Pablik Rilesens

Date: 10 Januari, 2005



Traim Bikpela na kisim bek laip tru

Bas sevis mas ron stret na kism 80 toea

Dia Edita,

Mi laik askim ol pablik long Mosbi long PMV bas sevis insait long siti. Sampela bas i tokaut pinis olsem ol bai sasim 80 toea long bas fea long dispela mun Jenuari 2005. Tasol bikpela askim em bai ol i ron stret long olgeta bas stop ol i mas go long en o nogat?

Bas 9 i mas pinisim ron bilong em long Gerehu i go olgeta long Is Boroko, Manu na haus sik na kam bek long Boroko na go olgeta long Gerehu. Wankain tu bas 11 i mas ron long Morauta i go long Boroko na go pinisim long Hanuabada na kam bek.

Bas 4 mas ron long Erima na kam go olgeta long Hanuabada na kam bek pinisim long Erima. Bas 7 long Gerehu i go long

Gordons na go olgeta long 7 mail long olpela ples balus.

Ol arapela bas namba mi no kolim tasol yumi save pinis long wanem hap rot ol i save ron long en na ol i mas pinisim gut na i no ken kisim ol pasindia na tromoi ol long hap hap rot.

Sapos ol i krai long bas fi i go antap orait ol i mas ron stret long rot bilong ol na sevim gut ol pasindia long go kam long wok na haus na tu long maket na stua nabaut.

Mi askim ol Trensport Dipatmen tu long strongim dispela sevis bilong bas bai ol i ken kisim 80 toea bas fea na tu pinisim ron bilong ol long olgeta bas stop stret.

MASTA WAI MOSBI

Dia Edita,

Mi wanpela man bilong ritim *Wantok Niuspepa* i rait liklik long sik HIV AIDS na sin long dispela graun tude.

Ol brata na susa long nem bilong God i gat olgeta strong yumi mas save wanem sin lv na Adam mekim pastaim tru long gaden Eden. Tupela kaikai frut i tambu, em i tok tru o hait tasol? Tu yumi mas save long wanem rot dispela HIV AIDS i kam long ol manmeri bilong dispela wol o graun. Ating meri lv i mas sindaun long wanpela tebol na kaikai dispela tambu frut i go insait long bodi bilong em. Bihain lv i grisim Adam i kaikai hap frut antap long wankain tebol na sin na dai kisim tupela na i kam long yumi nau. Long Afrika wanpela man i mas sindaun wantaim (animol) mongi long wanpela tebol long bus na kaikai dispela wankain frut bilong dai na sotim laip bilong yumi wantaim dispela HIV AIDS.

Yumi mas tingting gut na prektis na spesim bodi bilong yumi. God wokim yumi man slip wantaim meri bilong yumi stret, na

kamapim presen em pikinini, tasol yumi save paol long laik bilong God na painim pamuk meri bikos yumi i no save long laik na spes bilong bodi bilong yumi. Yumi pret long God na spesim bodi bilong yumi. Nogut yumi popaia kaikai hap frut bilong mongi na yumi kisim HIV AIDS. Yumi noken wari long HIV AIDS o SIN, God i no hait long wanpela samting long graun na heven. Yumi go bek long kaikai na pasin God i laikim. Lukim Jon 3:16, Rom 6: 23, 1Korin 6: 2, 3 Jon 2, Deniel 1: 8 na God i mekim yumi olsem propet Deniel long bipo. Rot i go long heven i liklik tru olsem ai bilong nil bilong samap. Rot bilong painim marasin o pinisim HIV AIDS i wankain olsem.

PETER TILINI LAE MOROBE PROVINS



Dai long dring...Dispela manki Holan i laikim tru wara bilong kulau. Nem bilong em Remco van der Zwan. Em i wanpela voluntia wantaim Voluntary Service Overseas (VSO) na em i wok olsem physiotherapy lecturer long Divine Word University long Madang. Foto: NIENKE VAN DER ZWAN

Bugati nogat gavman sevis tru

Dia Edita,

Mi wanpela manki Madang long liklik ples Kulel, Australabibe insait long Bugati eria long Madang provins.

Wari bilong mi em olsem bilong wanem na i nogat han mak liklik long Bugati eria.

Olgeta hap kona bilong Madang em senis pinis na olsem wanem long Bugati eria.

Mipela pipel bilong Bugati i stap olsem taim bilong tumbuna yet na ino lukijim wanpela han mak bilong gavman liklik kam inap nau.

Mipela pipel bilong ples mipela i save wari tumas long rot bilong ka i mas go bihain olgeta samting i kam aninit long rot.

Mipela save wok-about olsem 3 na 4 aua na mekim mipela save hatwok long karim ol samting olsem maket na ol kaikai na kago samting.

Na tu ol samting gavman sevis olsem haus sik na skul long bus ol tisa na dokta ol i save les long wok-about.

Na skul pikinini na sik manmeri i save

painim hat tru long sevis.

Sampela taim ol tisa na dokta i no save kam wokim wok bilong ol bikos nogat rot bilong ka i go.

Olsem na mipela pipel bilong ples i laikim rot bilong ka i mas kamap long 2005 o 2006.

Baset bilong yia 2005 i mas karim kaikai.

Pawa i stap long han bilong ples bikos mipela tok na yu kamap memba na ron long dak glas ka na lus tingting long mipela na mipela i stap olsem taim bilong tumbuna yet.

Mipela votim yu dispela memba long bringim developmen i kam long ples.

Em tasol wari bilong mi na husat i laik givim tingting bilong em i welkam tasol long mekim.

ANTON NINAI KULEL VILLAGE BUGATI MADANG PROVINS

Wenge lus tingting long ol Mare

Dia Edita,

Mi grasrut bilong Makam wan (1) insait long Wampar, Lae, Morobe provins. Mi laik autim beihevi bilong mi i go long *Wantok Niuspepa* na ol pablik i ken lukim. Dispela beihevi bilong mi i kam long Gavman bilong mipela yet long Lae, Morobe provins.

Luther Wenge, mi bilip long yu na mi makim yu. Tasol nau mi bilip olsem yu wanpela giaman man o man bilong mekim nois tasol.

Long 1997 yu wok long giamanim ol Mare pipel na mipela ol Mare

i bin pasim wanpela bet. Na mipela karim yu Wenge na brukim wara Wampit, sait bilong Wau Bulolo. Na yu tokim mipela olsem noken wari planti bai mi sanapim bris bilong yupela ol Mare.

Tasol nau mipela ol Mare i wet yet long yu Wenge. 1997 inap long 2004, Wenge i no luk-save long mipela. Mipela i krai long bris na rot. Wanem taim bai Gavman i givim bris na rot?

EFANG JONAH LAE MOROBE PROVINS

Pamuk pasin i bikpela long Is Sepik ...Giaman gris pasin pulap

Dia Edita,

Mi laik raitim dispela pas long autim bel wari bilong mi long ol pasin pamuk i save kamap long ol liklik skul meri na ol meri krismas bilong ol i stap aninit long 16, 17 na 18 krismas long wanem ol i laikim mani, kago na bilas long amamasim ol bodi bilong ol.

Long Wewak taun ol hotel, motel na ges haus i save kisim ol dispela yangpela meri taim ol i kam wantaim ol bisnisman na ol gavman opisa long wokim pamuk pasin insait long ol rum na givim ol K100 o moa na bihain promis long givim ol gupela ol samting we papamama i no inap givim ol dispela pikinini meri.

Em skul holide nau na planti ol yangpela skul meri long hai skul, sek-enderi skul bai raun long Wewak taun long painim mani long salim skin bilong long 10 minit pamuk pasin na bihain em gat mani long poket bilong em long taim skul i stat.

Dispela toktok em i tru bikos ol traipela bikman i save grisim ol liklik skul meri olsem, ol bai helpim ol wantaim mani bilong baim skul fi o baim bilas na ol samting bilong kisim i go bek long skul.

JOHN KRISAKI WEWAK IS SEPIK PROVINS

**WANTOK
KOMENTRI**

**Tsunami
bungim
olgeta pipel**

LONG gutpela taim, nem bilong kantri, ples, na lotu tu i save bikpela tumas. Tasol long taim bilong bikpela bagarap, olgeta manmeri, maski ol bilong ol arapela kantri o lotu. Olgeta i save bung wantaim olsem brata susa.

Dispela bikpela bagarap i kamap long Saut Is Esia nau i wok long bungim mipela hia insait long Papua Niugini tu.

Long nau nait long Pot Mosbi, olgeta kain lotu i stap insait long kantri bai bung long wanpela bikpela misa bilong tingim ol lain turangu i kisim bagarap, lusim famili na nogat gutpela sindaun.

Dispela bikpela misa i no bilong ol Kristen manmeri tasol, nogat. Em bilong ol Bahais, ol Buddist, ol Muslim, na ol arapela lotu tu. Dispela kain bung namel long ol lotu i no save kamap bipo long PNG.

Dispela taim bai namba wan taim bilong dispela kain samting long kamap.

Kain bikpela bagarap olsem tsunami i no save luksave long ples, em i no save luktuk long wanem kain lotu yu bihainim. Nogat. Dispela kain bikpela bagarap i ken kamap long ol manmeri long kainkain ples na taim.

Yumi yet hia long PNG i luksave pinis long bikpela hevi ol wantok bilong yumi antap long Aitape long Sandaun provins i bin karim.


Taim tsunami i bagarapim Aitape, ol manmeri bilong ol arapela kantri i no bin abrus long givim halivim.

Ol kantri i go inap Japan i bin givim halivim.

Nau em i taim bilong yumi wanwan insait long kantri long opim han na givim halivim long ol brata na susa bilong yumi long Saut Is Esia.

Olsem Praim Minista Sir Michael Somare i bin tok taim em i lonsim Nesenel Tsunami Apil long Mande long dispela wik, "Yumi olgeta manmeri long wol, maski yumi bilong ol arapela kantri, yumi olgeta brata susa aninit long lukaut bilong wanpela bikpela tasol."

Opim han na givim long halivim ol lain turangu i kisim bagarap long Saut Is Esia.



Somare nogat moa rot blok tasol i mas gat oposisen

LONG dispela taim planti tok-tok i kamap long nius olsem sampela moa memba bilong palamen bai i go joinim gavman.

Wanpela bilong ol dispela grup husat i gat laik long go stap wantaim gavman, em ol memba bilong Pipels Nesenel Kongres Pati (PNC) bilong Oposisen Lida, Peter O'Neill na praime minista bilong bipo, Sir William Skate.

Sir William i bin helpim long kirapim dispela gavman bilong Prime Minista, Sir Michael Somare bihain long 2002 Jenerel Ilekse. Tasol Sir Michael i rausim lain bilong Sir William na pati bilong em, na nau ol i stap long oposisen.

Bihain long Sir William i kisim ona long Kwin bilong Ingran, Elisabeth 11 long niu yia, Sir William i tok, pati bilong em i redi long joinim gavman, sapos Sir Michael i laikim.

Las wik, bihain long Memba bilong Angoram na pikinini bilong Praim Minista, Arthur



TOK PISIN
wantaim
PETER MAIME

Somare, i kisim blesing bilong Gavana Jenerel, Sir Paulias Matane, olsem nupela Minista bilong Nesenel Plening long gavman haus, Sir Michael i bin tok olsem Sir William, Mista O'Neill na pati bilong tupela em hap bilong gavman.

Mipela i no kirap nogut long dispela toktok bilong Sir Michael. Tupela, Sir William wantaim Mista O'Neill i bin tok pinis olsem ol i no lus tingting long gavman bilong Sir Michael.

Sapos i tru olsem Pipels Nesenel Kongres na pati bilong Sir Michael, Nesenel Alaiens i stap wantaim, orait mipela nau i ken ting olsem i nogat oposisen long floa bilong Nesenel Palamen.

Gavana bilong Morobe Provins, Luther Wenge, i bin tok

pinis olsem sapos Mista O'Neill wantaim lain bilong em i laik joinim gavman, em i tok em i redi long kisim lidasip bilong oposisen. Tasol Mista O'Neill i bekim long neks de na i tok, em i laikim tingting bilong Gavana Wenge tasol opis bilong oposisen lida i no fri long em i go kisim sia bilong lidasip.

Olsem mi save tok bipo long dispela seksen bilong mi. Sir Somare i lapun tasol, em i no nupela long politiks. Politiks i kilim em na em i no save wari long ol politisen i laik pilai mabel wantaim em.

Sir William wantaim Mista O'Neill i bin toktok planti long blokim 2005 baset na putim vot i nogat bilip long gavman bilong Sir Michael. Dispela tupela sem man i laik grisim bel bilong Sir Michael o tupela narapela man?

Long dispela taim, i nogat wanpela pati i soim strong long rausim Sir Michael long gavman. Sapos wanpela bikpela asua long gavman i kamap,

ating bai dispela gavman i senis. Sapos nogat bai nogat.

Planti ol memba nau i no wari long husat i stap long gavman o oposisen. Wanpela bikpela samting i sutim bel bilong ol nau em, 2007 Nesenel Ilekse. Ol man tu ya! Ol i mas mekim sampela samting long iektoret long toktok long taim bilong kempen, na pulim vot bilong ol votas. Na ol i save, ol risoses bilong mekim wok bai isi long kam sapos ol i stap wantaim gavman.

Na tu, sia bilong Deputi Praim Minista i stap nating. Pastaim mipela i no klia husat bai kisim dispela wok. Nau Sir Michael i lukim pinis strong bilong ol pati na ol memba pinis. Dispela namba tu sia bilong kantri bai nau stap long haus boi bilong Nesenel Alaiens yet.

I gutpela long Pipels Nesenel Kongres long stap long oposisen na was long gavman, bai gavman i ken mekim gut wok bilong em long ronim kantri.

Papua Niugini i laikim gutpela lida long 2005

...Kristen lida em i wokman bilong God


WOK bilong bosim manmeri em wok bilong God. Wok bilong God em i nambawan wok ol lida i mas mekim.

Na bosman tru bilong ol lida em God bikpela. Kraus em i king tru na bosim olgeta arapela lida na manmeri na pikinini.

Olsem na yumi ken save ol lida i no wokboi nating bilong wanpela kampani o wanpela Gavman.

Nogat, God i stap antap olgeta na em i bos bilong yumi olgeta wokboi bilong em.

Dispela wok em samting tru olsem na ol



**OL PRINSIPOL
BILONG
GUTPELA LIDA**
wantaim
**Pastor na Evangelist
OHARE JABERE**

lida i noken pret long ol man, ol i mas pret long God tasol.

Ol i noken bihainim pasin bilong dispela lida husat i save sakim tok.

Jisas i tok long ol long Jon12: 42- 43, sapos lida i karim planti hevi long wok bilong ol, orait bai ol i karim bilong givim bikman long God bikpela tasol.

Lida i wokman bilong God olsem na bai ol i stap olsem lida.

Sapos sampela arapela lida i mekim pasin nogut orait ol arapela lida i noken pret long tokaut na krosim ol man bilong stretim pasin bilong ol.

Tu, ol lida i noken senisim pasin bilong ol long grisim ol man nogut. Lida i mas autim klia ol tok bilong God long ol manmeri.



"Long Kraus God i givim yumi olgeta gutpela samting bilong Heven"

Yumi litimapim nem bilong God, em i God na Papa bilong Bikpela bilong yumi Jisas Kraus. Long Kraus em i bin givim yumi olgeta gutpela samting bilong Heven, bilong helpim Spirit bilong yumi. Taim God i no mekim graun i kamap yet, na em i makim yumi pinis long pas wantaim Kraus, bai yumi i ken stap holi. Bai yumi ken i stap stretpela manmeri na i nogat asua long ai bilong em. Bipo yet em i laikim yumi tumas, na em i makim yumi bilong kamap pikinini bilong em yet long wok Jisas Kraus bai i mekim bilong kisim bek yumi. Long laik bilong em yet God i mekim olsem. Long nem bilong dispela Pikinini em i laikim tumas, God i marimari moa yet long yumi. Olsem na yumi mas tingting long dispela bikpela marimari bilong em na yumi mas litimapim nem bilong God. Marimari bilong God i pulap tru. Kraus i dai pinis bilong baim bek yumi, na God i lusim sin bilong yumi. **Efesus 1: 3 - 9**

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Yakam Kelo

Published by Jeremy Burgess and printed by Pacific Star P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea - Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Sunami - Ol sapot na helpim i go long Esia

Pop John Paul 2 i givim helpim kwiktai long ol sunami birua

HETMAN bilong Katolik sios long wol, Pop Paul 2 i putim bikpela sapot bilong em long prea long ol pipel bilong Saut Is Esia kwiktai tasol long sunami bagarap i kamap.

Ol ripot i tok taim Pop i harim nius ya, em i kwiktai tokim sios long givim olsem ol samting na prea long ol lain i kisim bagarap long sunami o bikpela birua bilong solwara.

Papa Santu i wok long go lapun na em i no strong tumas. Tasol bihain long em i harim nius long sunami bagarap long Saut Is Esia, em bin tokim moa long 7,000 pipel i bin bung long prea wantaim em olsem, "wanpela taim gen, mi askim olgeta long bung wantaim long prea long ol dispela i dai na ol dispela we i kisim bagarap na ol i lusim olgeta samting na stap long hevi."

Bikpela samting nau em long olgeta kantri i bung wantaim na sapotim ol lain i bungim hevi long sunami na ol wanwan sios long bung wantaim na toktok long rot bilong helpim na stretim bek ol ples na sindaun bilong ol pipel we sunami i bagarapim. Indonesia, Sri Lanka, Tailen na India em ol kantri we i bungim bikpela bagarap tru long sunami we i bin kamap long de bihain long Krismas de.

Taim Papa Santu i harim nius, kwiktai em i salim ol helpim ejuensi bilong Pontifikol Kaunsil em "Cor Unum" i bin go pas long en.

Saveman bilong Esia long Vatiken

em Pater Bernardo Cervellera na memba bilong Pontifikol Institut long Foren Misin i tok dispela birua i mekim olgeta kantri long dispela graun i kam klostu wantaim na sunami hevi em i wanpela bikpela bagarap o hevi tru long olgeta birua i bin kamap long dispela graun.

Em i tok tu olsem bikos planti pikinini i bagarap long dispela birua, wol i lusim wanpela jeneresen na dispela bai kamapim moa hevi.

Na em i tok long kisim ol pikinini na lukautim ol long narapela kantri i no gutpela bikos ol pikinini bai lusim ples na kalsa bilong ol. Tasol em i moabeta long helpim ol pikinini long kantri bilong ol yet.

Em i tok ol lokol sios, ol dasiosis em ol Katolik Bisop Konferens na Katolik ogenaisesen long wol i strongim ol long givim helpim na dispela i soim bikpela sapot long givim helpim. Em i tok planti misinari i wok long fran lain bilong givim helpim na tru tru, dispela bikpela hevi na bagarap i kirapim gutpela toktok namel long ol sios, moa yet, ol Islam. Na dispela em i gutpela long kirapim bek gen Saut Is Esia.

Katolik Sios i wok wantaim ol Muslim lain, gavman na non gavman grup long traim helpim ol pipel i bungim hevi na tu, long kirapim bek ples.

Ol Katolik daiosis long kantri bai givim helpim

Veronica Hatutasi i raitim

HELPIM mipela i givim i go long ol pipel we sunami i bagarapim ol em long soim sapot na wari mipela i gat long ol na olsem mipela i stap wantaim ol long dispela taim bilong hevi na sori, Deputi Nesenel Dairekta bilong Caritas PNG na Kodineta bilong Caritas PNG Saut Is Esia Sunami Apil em Raymond Ton i tok.

Em i tok bekim long apil o singaut bilong Caritas PNG i go long publik na ol Katolik daiosis insait long 19 provins i wok long kamap isi.

Mista Ton i tok apil o singaut bilong ol i bin go long tupela wik na em bai pinis long dispela wiken. Tasol long ol Katolik Daiosis, ol bai skruim apil i go inap ol i bungim ol mani na ol bisop bai salim i kam long Caritas PNG opis.

Mista Ton i tok taim ol i kisim olgeta apil mani, ol bai wokim ripot na mani mak ol i kisim na salim ol dispela ripot i go long Nesenel Gavman. Tasol ol bai salim mani i go long netwok bilong ol long Caritas Oseania we bai salim mani i go long mama ogenaisesen bilong ol long Itali em Caritas Intanesenelis husat bai salim mani i go long Caritas Esia long tilim i go long ol kantri we sunami i bagarapim ol.

Mista Ton i tok ol biosp i no hariap long salim ol mani long ol daiosis bikos ol i laikim bai ol pipel yet i givim

donesen bilong ol.

"Mipela i no kisim ol donesen hariap long ol daiosis em bikos ol bisop i givim taim long ol pipel long wokim donesen bilong ol.

Mipela i wok long ting olsem ol bisop bai salim mani i kam tasol ol i laikim ol pipel yet i bungim na dispela i wok long pulim taim.

Long wankain taim, ol bisop i luksave long ol bikpela manimak we ol bikpela kantri i givim long helpim ol lain i laikim imejensi helpim kwiktai.

Em i tok Caritas bai wetim donesen bilong ol daiosis.

Em i tok i kam inap nau, Alotau na Kavieng Daiosis givim donesen bilong ol pinis na Asbisop Sir Brian Barnes i tok em bai givim bilong Pot Mosbi Asdaosis long Sande.

Mista Ton i tok ogenaisesen i lukluk long sios na ol memba bilong em long givim donesen. Na tu, ol arapela grup, pipel na ogenaisesen we i laik kamap hap bilong fan resing apil bilong Caritas PNG long helpim ol lain i kisim bagarap long sunami. Long wankain taim, Sen Peter Sanel Peris insait long Nesenel Kapitel Distrik i wok long bungim donesen long ol Sande koleksen olsem hap bilong sunami apil.

Peris i save wokim tupela ofa koleksen long olgeta Sande. Na namba tu koleksen bai i go long sunami apil. Dispela bai i go inap long sampela Sande.



• Praim Minista Sir Michael Somare i givim sek mani i go long edministreta bilong Is Sepik long opim kempen bilong sunami long Is Sepik provins.

PM opim Is Sepik Apil

Is Sepik i statim kempen bilong em long bungim mani na helpim bilong givim i go long ol manmeri long Esia husat i kisim bikpela bagarap long birua bilong solwara long nu yia.

Dispela kempen bilong Is Sepik provins em Praim Minista na rijinol memba bilong provins yet Sir Michael Somare yet i go pas long opim we ol i bin kamapim mani mak olsem K65,000 long las wik.

Tasol antap long mani, Sir Michael Somare i askim ol pipel bilong Is Sepik tu long bungim ol kaikai olsem taro, banana, yam na saksak na salim i go long ol pipel i kisim bagarap long Manam ailan long Madang provins na tu long Biem Ailan long Is Sepik provins we ol i sot long kaikai bikos long ples i bagarap.

Em i singaut tu long olgeta Sepik i stap long olgeta hap provins long kamapim komiti na bungim mani na ol helpim long sapotim Is Sepik Apil.

Dispela fan resin gem Is Sepik Provinsal Gavman na Is Sepik Samba ov Komes igo pas long en we ol i holim danis olsem dina danis (kaikai pati), pusim bilbaro long rot na arapela

moa.

Bihain bai ol i givim olgeta mani ol i bungim i go long han bilong Siaman bilong Nesenel Gavman Fanresing Komiti Dokta Puka Temu.

Olgeta memba bilong Is Sepik provins i givim K5,000 wanwan na Sir Michael Somare yet i givim K10,000 long opim dispela fan resing program.

Praim Minista i tok taim PNG i bin bungim birua bilong sunami, ol kantri long ovasis i hariap long givim han.

Plantu em ol lain long Saut Is Esia.

Olsem na nau em taim bilong yumi long mekim wankain na mi laik askim ol pipel bilong PNG long soim long poket bilong ol, Sir Michael i tok.

Ol publik sevens long Is Sepik i rausim K10 long potnait pe bilong ol wanwan we dispela inap kamap olsem K13,000 bikos i gat 13,000 publik sevens long Is Sepik provins.

Dispela inap apim mak bilong Is Sepik long K2 milien i go antap long K5 milien. Sampela bilong dispela mani bai igo tu long ol lain i kisim bagarap long Manam ailan.

Polis Minista givim sapot long sunami bagarap

Steven Dama i raitim

EMBESEDA bilong Indonesia Johannes R.G. Djopari i bungim Minista bilong Polis Bire Kimisopa long las wik Fraide long kisim sapot Minista i givim.

Minista Kimisopa i autim sori bilong em long ol manmeri na pikinini husat i dai, na kisim bikpela bagarap long bikpela birua wara long Saut Is Esia. Em tu surikim bikpela sori long ol famili bilong ol i dai pinis na sampela husat i stap hap hap wantaim ol narapela famili.

Em i tok dispela kain hevi i bikpela tru na i brukim lewa bilong olgeta manmeri long wol. Em i tok, PNG em klostu pren wantaim olgeta dispela kantri husat i kisim bagarap na i gat bikpela tingting olsem PNG bai givim wanem kain helpim em bai givim.

Las wik em tok wantaim Indonesian fan resing opisel olsem, PNG na Indonesia i gutpela pren tru, na em tok aninit long Polis Dipatmen em givim dispela K1000 poket mani bilong em yet na tu wantaim K2000 pati (Yunaited Pati) mani long fan resing bilong ol pipel bilong Banda Aceh husat i lusim 250,000 pipel taim birua i bungim ol.

Minista Kimisopa i tok em i luk save long ol Polis Dipatmen long Indonesia na em i tok ol Polis Dipatmen long PNG i sori long wanem samting i kamap.

Em tokim Mista Johannes Djopari olsem dispela i likik toea em inap long helpim. Na long wankain taim


Embaseda bilong Indonesia i tenkim Intenel Sekyuriti Minista long givim dispela sapot. Long makim maus bilong ol pipel bilong Inodnesia, dispela hevi i kamap long laik bilong em yet, em graun i kamapim dispela wari tasol mi i gat bikpela amamas long lukim ol gutpela manmeri long wol i redi long givim helpim long husat i gat hevi.

Mista Johannes i tok em i gat bikpela amamas long Gavman bilong PNG long luksave long hevi bilong poro bilong en Indonesia. Em i tok dispela i soim tru dispela bikpela laik bilong pren i stap insait long lewa na tingting bilong ol pipel na kantri olsem PNG na ol narapela husat i laik helpim.

WOL NIUS WOL NIUS WOL NIUS WOL NIUS



SUNAMI SUNAMI SUNAMI SUNAMI SUNAMI



Indonesia

Oi ktu bilong Ea
 Fos bilong
 Amerika i lodim
 el kago long
 pis batus
 bilong ol ami
 long Indonesia.
 Foto:
 AFP/Fail/Arif
 Arladi

Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sopotim raitman bilong yumi, Kanage!!



Kanage em bikpela pes man bilong Makam na i save stap long 40 Mail.

Wanpela taim em harim olsem liklik brata bilong em long Wawin Nesenel Hai Skul i save prenim wanpela hapkas meri, wait na blak.

Kanage harim nab el kaskas pinis. Long wiken liklik brata i kam long stadi long haus bai ol i sindaun long nesenel eksem long neks wik. Em nau Kanage laik givim tok stia long liklik brata.

Yu listen boi, paps ded longtaim ago, mams marit new man, i lukaut yu like i fada yu, okei.

My spy kids at skul tell me you pren wan miks reis gel ah?. I don't wan misis slek around my smol bro, okei.

Mas wok hat like meri Makam eksampol to Atzera

and Watarais gels.

Em givim tok stia pinis na em i laik go tokim dispela gel pren bilong smol bro.

Olsem na em i go long skul na bungim dispela miks reis meri ya na tokim em, i skul smol bro ol redi.

In Makam we want kik gels, no slek misis to sindaun as around, okei.

Ol lain long skul i harim na i no isi isi long na go stori long ples. Skul siaman i harim na pinisim kontrak bilong Kanage long noken moa soim pes long skul graun.

Nogut bai sekyuriti i stretim pes bilong em.

**James Omperth
Makam
Morobe provins**

Kanage bilong Makam na em save apim nem olsem em brata bilong memba na em i man bilong kilim pik.

Taim em i stori bai em i tokaut

olsem memba i save kaikai planti pik long han bilong em stret.

Wanpela taim em kamap long ples na wanpela bikpela wef pik i bin raun i kam na ol manmeri i ronim. Kanage lukim na soim strong bilong em long holim na kilim. Tasol pik i ron i kam stret aninit long lek bilong em na bamim stret het kota bilong em. Kanage pilim olsem paia i lait insait long ol rum bilong het kota na em pundaun singaut long wara i kam.

Ol lain pret long Kanage bai dai olsem na wantu tasol ol i askim long kar bilong memba tasol draiva i les long karim Kanage i go long haus sik.

Olsem na ol i putim em long haiwe trak na karim em i go daun long Angau haus sik.

Taim Kanage kisim tingting na ai i op em save olsem em i stap long haus sik.

Em kirap bikmaus long olgeta lain na tokim ol, husat tokim yupela long karim mi kam hia a?. em hap bilong ol dokta ya.

Ol bai kaikai mi ya. Kanage save ting dokta em ol dok bilong kaikai ol sikman ya olsem na em bikmaus na singaut kam ausait.

Ol ples lain i paul olgeta na tokim ol yet, larim em mekim long laik bilong em na painim dai bilong em. Yumi go long ples.

**James Omperth
Makam
Morobe provins**

Kanage go long Wewak long salim vanilla long wanpela wiken.

Em salim na kisim mani pinis na tingting long baim liklik 6 peks na dring pastaim.

Boi go long lika sop nab aim 12 peks na dring i stap na taim pinis na olgeta kar bilong ples i go pinis na ples i go tudak nau.

Dispela taim tu em bikpela kefiu i kamap na ol polis i raun long holim ol lain i raun bihain long 8 kilok nait.

Turangu Kanage em man bilong ples na i no save long dispela kefiu

olsem na em sindaun dring i go inap olsem 9 kilok nait na em kirap wokabout painim haus bilong ol wantok long slip wan nait pastaim na dring sampela botol moa inap tumoro.

Em wokabout igo nogat polis kar i kam na holim em na karim emi go.

Insait long kar ol polis askim Kanage, yu save long kefiu tu o nogat?. Kanage sindaun i go na het bilong em paul na em tokim ol polis.

Mi no save long dispela man kefiu, mi kam mi yet na mi yet baim lus botol bilong mi na dring isi long mi yet. Dispela man em i mi no save long em, nogat tru. Ol polis i harim na lap indai na tokim em, em orait paps, tok pisin bilong yu i win olsem na yu ken i go tasol noken raun moa long nait. Nogut kefiu bai holim yu na kilim yu.

**J Linge
Vanimo
Sandaun provins**

KANAGE

Raitman long TOK PILAI

Kam na tok pilai wantaim mi olgeta wik!!

LONG NIU YIA STRET KANAGE I PROMISEM BAI STOP SIMUK...

DISPELA YIA 2005 BAI MI STOP SIMUK NA KAMAP GUT BOT!

KON MAN!

EM KISIM LAS SPIA SIMUK BILONG EM NA BRUKIM LONG AI BILONG MERI BILONG EM...

LUKIM! NAU MI BRUKIM SPIA BILONG MI LONG TOK PROMIS MI PINIIS LONG SIMUK MOA, FOREVA!!

KON TOK TOK!

NEKS DE LONG JENUARI 2 KANAGE EM PILIM NOGUT TRU...

KANAGE! YU ORAIT AH? BODI BILONG YU GURIA GURIA I STAP?!?

MEKIM PAIA!! ATING MI KISIM STRONGPELA MALARIA!!

NAU MERI BILONG EM I GO NA MEKIM PAIA NA KANAGE GO SILIP KLOSTU LONG EN...

AIVOO!! MI BAGARAP TRU LONG SIMUK YAH!!

NAU NOGAT MAN I LUKLUK, KANAGE EM KISIM HAP BAT BILONG SPIA NA MEKIMSARE LONG SIMUK NA HAITIM EM YET LONG TRAIPELA SIMUK BILONG PAIA...

Em i gutpela lo long pasim plastik beg?

Planti toktok i kamap long ol plastik bilong stua i mekim planti pipia long ol ples na i no helpim sindaun na kamap bilong ples graun. Nau yet gavman i tokaut long pasim ol ol stua i no ken yusim gen ol plastik. Ol faktori tu bai i stop long mekim ol plastik. Lo bilong stopim dispela ol plastik bai kamap long Namba wan de bilong Epril long ol stua na long ol faktori long namba wan de bilong Jun. Hla em sampela tingting bilong ol manmeri na pikinini we **JOE IVAHARIA** i raun na kisim.




Heisi Heaho

Mi bilong Galp provins na mi wok wantaim Steamships kampani. Mi ting i gutpela long stopim ol plastik bikos i save mekim planti kain pipia na bagarapim envairomen bilong yumi. Taim i nogat plastik bai i ken kamapim sans bilong ol manmeri long karim bilum na soim tru kalsa bilong yumi ol PNG stret. Dispela tu bai i mekim ol mama long samapim ol bilum na salim long kisim mani long en. Narapela tingting bilong mi em long yusim pepa bek olsem long bipo we mipela i save yusim. Em bai lukautim gut envairomen tu na ples i ken stap klin. Long taim bilong go long stua o long maket ol pipel i mas karim bilum tasol long stoa ol sekuriti i mas larim ol manmeri karim bilum bilong putim ol kaikai na sopin igo insait.



Peter Yopsi

Yangpela Yopsi i bilong Goroka na em i amamas long skul holid bilong em i stap. Em i tok tingting bilong em long gavman long pasim ol plastik i gutpela tru long wanem ol plastik i save kamapim planti ol pipia nabaut. Em bai i gutpela bilong ol manmeri i ken karim bilum na mekim maket o go long stoa na baim ol kaikai long putim i go insait long bilum. Tasol bai i gat narapela hevi tu long sait bilong sekyuriti long ol stua we mi tupela ting olsem i moabeta sapos ol menesmen bilong ol stua i mas kamap wantaim wangepa gutpela pasin bilong stretim dispela hevi.



Haihe Kere

Planting toktok i kamap long ol plastik bilong stua i mekim planti pipia long ol ples na i no helpim sindaun na kamap bilong ples graun. Nau yet gavman i tokaut long pasim ol ol stua i no ken yusim gen ol plastik. Ol faktori tu bai i stop long mekim ol plastik. Lo bilong stopim dispela ol plastik bai kamap long Namba wan de bilong Epril long ol stua na long ol faktori long namba wan de bilong Jun. Hla em sampela tingting bilong ol manmeri na pikinini we **JOE IVAHARIA** i raun na kisim.

Mi bilong Galp provins na mi wok Millinium Sekuriti Sevis long Gordons. Mi tu mi sapotim dispela tingting bilong gavman long pasim ol plastik na kain yus bilong em bikos dispela i save bagarapim ples na ol nabis na solwara bilong yumi. Yumi save olsem plastik i no inap long tanim o lus long graun o wara. Em i wok long kamapim planti hevi long ples-graun bilong mipela. Long wankain taim mi ting olsem gavman o ol atoriti i mas kamap wantaim narapela pasin o tingting long lukautim ol faktori husat i save mekim ol plastik samting i stap. Dispela bai i ken helpim ol lain long faktori we planti bilong yumi ol PNG manmeri i wok i stap. Sapos Gavman i pasim ol faktori long mekim ol plastik planti ol wok manmeri bai pinis wok na dispela tu bai i kamapim narapela hevi long laip bilong ol.



Allan Aifarapo

Mi bilong Galp provins na mi wok long Essco Elektrikol kampani long Gordons. Mi ting i no gutpela long pasim ol plastik beg. Ol atoriti, gavman na ol kampani i mas kamapim sampela moa toktok long dispela hevi na sapos ol i ken kamap wantaim narapela pasin o ol faktori i mas mekim narapela samting long ol pipel we ol i ken yusim long karim samting bilong ol. Kain olsem ol pepa beg i gutpela tasol long taim yumi ol manmeri i baim planti kaikai o bikpela samting bai olgeta i no inap long putim i go insait long ol pepa beg. Yumi yet i save olsem pepa beg bai i bruk sapos ol hevi samting i stap insait.



Wasi Pala

Mi bilong Enga provins na mi wok wantaim Millinium Sekuriti Sevis long Boroko. Mi ting em i gutpela long gav-

man i pasim ol plastik beg na yus bilong ol. Plastik i save kamapim planti pipia nabaut na mekim ples i luk nogut. Tasol mi ting tu olsem bai i gutpela sapos gavman na ol menesmen o kampani i save mekim ol plastik i mas tokaut klia long wanem narapela samting ol i ken tok orait kisim ples bilong plastik long yumi ken yusim. Dispela bai i ken helpim ol pipel long redim ol yet taim ol i laik go long ol stua o maket long baim ol kaikai. Sapos ol atoriti i no tok klia planti ol pipel i stap paul yet. Wangepa bilong ol samting ol pipel i ken yusim em bilum tasol dispela tu yumi i save gat kain ol hevi sait bilong em. Bikpela em long taim yu laik go insait long ol stua na baim kaikai. Planti bilong ol meri na mama bilong yumi i save kros pait wantaim ol sekyuriti gad bilong ol stoa. Bai i gutpela sapos ol menesmen bilong ol stua i kamap wantaim wangepa gutpela pasin long larim ol pipel i karim bilum long putim ol kaikai long ol. Long sait bilong bilum tu em bai i kamapim gutpela bisnis tu long ol mama i mekim na salim. Na long wankain wei i soim tu kalsa bilong yumi.



Linda Posu

Mi bilong Galp provins na mi skul long Waigani. Nau yet mi malolo long holid i stap. Tingting bilong mi tu i wankain olsem i gutpela long pasim ol plastik beg. Planti pipia i save kamap long ol plastik tasol na ples i no luk gutpela. Tasol dispela tu em i asua bilong ol manmeri. Sapos ol i yusim het na tingting gut ol pipia bai ples i stap klin. Bai i gutpela long kamapim ol pepa beg we em bai isi long kukim long paia sapos i nogat yus bilong ol. Narapela em yumi ol PNG i gat planti kain bilum bilong yumi i stap. Em bai gutpela taim nau long karim ol bilum i go long maket na stua we ol kaikai i ken pulap long en



Francisca Patrick

Mi bilong ples Goroka na mi wangepa buai maket lain. Mi gat wankain tingting na sapot tu long Gavman i pasim ol plastik bikos dispela i save kamapim planti ol pipia nabaut. Nau bai i gutpela taim tu bilong ol meri long karim bilum na mekim ol maket na go long stoa. Tasol mi laik gavman i mas tok klia long ol stua long larim ol mama i karim bilum i go insait.



John Pokma

Pokma i bilong Goroka tasol i stap na skul long Pot Mosbi. Em i tok long sait bilong yusim bilum dispela em i gutpela. Tasol hevi i kamap taim ol sekyuriti i save stopim ol manmeri long karim ol bilum i go insait long stua. I moa gutpela sapos olgeta manmeri i givim tingting bilong ol i go long gavman o ol atoriti pastaim na bihain kamap wantaim wangepa gutpela tingting long stretim dispela hevi. Long ol plastik sapos yumi tingting gut na tromoi ol i go insait long pipia dram o kukim dispela bai i no inap givim hevi nau yumi bungim. Ol man i save mekim pipia. Planti ol pipia i stap long asua bilong man.

Joe Lahari i bilong Hohola na em i wok wantaim NiuFord kampani olsem mekanik. Em i tok: Mi ting i gutpela long pasim ol plastik. Em bai i helpim plesgraun bilong mipela. Tasol bikpela samting em bai i givim hevi gen long ol wok manmeri husat i save wok long ol faktori i save mekim ol plastik. Planti bilong ol bai i lusim wok na bai i kamapim moa hevi long dispela taim nogut. Na tu sampela ol pipel tu i save mekim liklik mani long salim ol plastik long ol maket nabaut na sapos i pas nau bai ol lain tu bai i nogat rot long kisim mani na lukautim ol yet. Bai i gutpela sapos gavman i ken kamapim wangepa kampani bilong baim ol plastik olsem ol lain i save baim ol hap ain na skrep metol nabaut.

Toksave bilong Edita
Ol toktok long dispela pes i no makim olgeta tingting bilong **Wantok Niuspepa**.

CATHOLIC RADIO schedule

Time	Program	Time	Program
6:00	ANGELUS	6:05	SUNDAY EUCHARIST (replay)
6:05	MEDITATION/INSPIRATIONAL MUSIC	7:00	HOLY ROSARY
7:00	VATICAN RADIO WORLD NEWS	7:30	CATHOLIC INSIGHT
7:15	VATICAN ENGLISH PROGRAM	8:00	VATICAN WORLD NEWS
7:35	NON-STOP GOSPEL MUSIC	8:15	VATICAN ENGLISH PROGRAM
8:00	JOURNEY HOME (EWTN)	8:40	IN THE LORD'S VINEYARD
9:00	VATICAN RADIO WORLD NEWS	16:00	NON-STOP GOSPEL MUSIC
9:15	VATICAN ENGLISH PROGRAM		
9:40	KIDS SING-ALONG	6:30	ANGELUS
10:00	CATHOLIC JUKEBOX	6:35	MEDITATION/INSPIRATIONAL MUSIC
10:30	GOSPEL MUSIC	7:00	VATICAN WORLD NEWS
11:00	NON-STOP GOSPEL MUSIC	7:15	VATICAN ENGLISH PROGRAM
12:00	ANGELUS	7:35	NON-STOP MUSIC
12:05	VATICAN WORLD NEWS	8:00	BEST OF JOURNEY HOME
12:20	VATICAN ENGLISH PROGRAM	9:00	VATICAN WORLD NEWS
12:40	REFLECTION MUSIC	9:15	VATICAN ENGLISH PROGRAM
1:00	LAMB'S SUPPER WITH DR. SCHOTT HAHN	9:35	KIDS SING-ALONG
2:00	MUSIC	10:00	CATHOLIC JUKEBOX (EWTN)
3:00	CHAPLET OF DIVINE MERCY	10:30	NON-STOP GOSPEL MUSIC
3:20	NON-STOP GOSPEL MUSIC	12:00	ANGELUS
4:00	CATHOLIC JUKEBOX (ENCORE)	12:05	VATICAN WORLD NEWS
4:30	NON-STOP GOSPEL MUSIC	12:20	VATICAN ENGLISH PROGRAM
5:00	JOURNEY HOME	12:40	AFTERNOON REFLECTION MUSIC
6:00	ANGELUS	1:30	THE WAY TO FOLLOW JESUS
6:05	MADANG LOCAL NEWS	1:35	GOSPEL MUSIC
6:10	VATICAN ENGLISH PROGRAM	3:00	CHAPLET OF DIVINE MERCY
6:30	LAMB'S SUPPER WITH DR. SCHOTT HAHN	3:20	NON-STOP GOSPEL MUSIC
7:00	HOLY ROSARY	4:00	CATHOLIC JUKEBOX (EWTN)
7:30	CATHOLIC INSIGHT	4:30	NON-STOP GOSPEL MUSIC
8:00	VATICAN WORLD NEWS	5:00	MESSAGE IN MUSIC
8:15	MADANG LOCAL NEWS	6:00	ANGELUS
8:30	VATICAN ENGLISH PROGRAM	6:05	VATICAN ENGLISH PROGRAM
9:00	TOK STREET LONG HVAIDS	6:30	MANY FACES OF MARY
10:30	VATICAN ENGLISH PROGRAM	7:00	HOLY ROSARY
		7:30	BENEDICTION
		8:00	VATICAN WORLD NEWS
		8:15	CRN LOCAL NEWS
		8:30	VATICAN ENGLISH PROGRAM
		9:00	BEST OF JOURNEY HOME
		10:00	CATHOLIC JUKEBOX (EWTN)
		10:30	VATICAN ENGLISH PROGRAM
		11:00	NON-STOP GOSPEL MUSIC
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP MUSIC
8:00	RADIO ST. JOSEPH PRESENTS	8:00	RADIO ST. JOSEPH PRESENTS
9:00	VATICAN WORLD NEWS	9:00	VATICAN RADIO WORLD NEWS
9:15	ENGLISH PROGRAM	9:15	VATICAN ENGLISH PROGRAM
9:35	KIDS SING-ALONG	9:40	KIDS SING-ALONG
10:00	CATHOLIC JUKEBOX	10:00	CATHOLIC JUKEBOX
10:30	NON-STOP GOSPEL MUSIC	10:30	GOSPEL MUSIC
12:00	ANGELUS	12:00	ANGELUS
12:05	VATICAN WORLD NEWS	12:05	VATICAN WORLD NEWS
12:20	VATICAN ENGLISH PROGRAM	12:20	VATICAN ENGLISH PROGRAM
12:40	REFLECTION MUSIC	12:40	REFLECTION MUSIC
1:00	OUR FATHER'S PLAN	1:00	SUPER SAINTS
1:30	AFTERNOON GOSPEL MUSIC	1:30	GOSPEL MUSIC
3:00	CHAPLET OF DIVINE MERCY	3:00	CHAPLET OF DIVINE MERCY
3:20	NON-STOP GOSPEL MUSIC	3:20	NON-STOP GOSPEL MUSIC
4:00	CATHOLIC JUKEBOX (EWTN)	4:00	CATHOLIC JUKEBOX
4:30	NON-STOP GOSPEL MUSIC	4:30	NON-STOP GOSPEL MUSIC
5:00	WAVE FACTOR (EWTN)	5:00	RADIO ST. JOSEPH PRESENTS
6:00	ANGELUS	6:00	ANGELUS
6:05	VATICAN ENGLISH PROGRAM	6:05	ATAPE LOCAL NEWS
6:30	FATIMA	6:10	VATICAN ENGLISH PROGRAM
7:00	HOLY ROSARY	6:30	MOTHER OF REDEEMER
7:30	STATIONS OF THE CROSS	7:00	HOLY ROSARY
8:00	VATICAN WORLD NEWS	7:30	SUPER SAINTS
8:15	CRN LOCAL NEWS	8:00	VATICAN WORLD NEWS
8:30	VATICAN ENGLISH PROGRAM	8:15	ATAPE LOCAL NEWS
9:00	TOK STREET LONG HVAIDS	8:20	VATICAN ENGLISH PROGRAM
10:00	CATHOLIC JUKEBOX	9:00	TOK STREET ABOUT HVAIDS WITH FR. JUDE (ENGLISH)
10:30	VATICAN ENGLISH PROGRAM	10:00	CATHOLIC JUKEBOX
11:00	NON-STOP GOSPEL MUSIC	10:30	VATICAN ENGLISH PROGRAM
		10:50	NON-STOP GOSPEL MUSIC
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP GOSPEL MUSIC
8:00	SCRIPTURE MATTERS WITH DR. SCHOT HAHN (EWTN)	8:00	SCRIPTURE MATTERS WITH DR. SCHOT HAHN (EWTN)
9:00	VATICAN WORLD NEWS	9:00	VATICAN WORLD NEWS
9:15	VATICAN ENGLISH PROGRAM	9:15	VATICAN ENGLISH PROGRAM
9:35	KIDS SING-ALONG	9:35	KIDS SING-ALONG
10:00	CATHOLIC JUKEBOX	10:00	CATHOLIC JUKEBOX
10:30	NON-STOP GOSPEL MUSIC	10:30	NON-STOP GOSPEL MUSIC
12:00	ANGELUS	12:00	ANGELUS
12:05	VATICAN WORLD NEWS	12:05	VATICAN WORLD NEWS
12:20	VATICAN ENGLISH PROGRAM	12:20	VATICAN ENGLISH PROGRAM
12:40	REFLECTION MUSIC	12:40	REFLECTION MUSIC
1:00	FIRST COMES LOVE DR. SCHOT HAHN (EWTN)	1:00	FIRST COMES LOVE DR. SCHOT HAHN (EWTN)
1:30	AFTERNOON GOSPEL MUSIC	1:30	AFTERNOON GOSPEL MUSIC
3:00	CHAPLET OF DIVINE MERCY	3:00	CHAPLET OF DIVINE MERCY
3:20	NON-STOP GOSPEL MUSIC	3:20	NON-STOP GOSPEL MUSIC
4:00	CATHOLIC JUKEBOX	4:00	CATHOLIC JUKEBOX
4:30	NON-STOP GOSPEL MUSIC	4:30	NON-STOP GOSPEL MUSIC
5:00	SCRIPTURE MATTERS	5:00	SCRIPTURE MATTERS
6:00	ANGELUS	6:00	ANGELUS
6:05	VANIMO LOCAL NEWS	6:05	VANIMO LOCAL NEWS
6:10	VATICAN ENGLISH PROGRAM	6:10	VATICAN ENGLISH PROGRAM
6:30	FATIMA, HEAVEN'S PEACE PLAN	6:30	FATIMA, HEAVEN'S PEACE PLAN
7:00	HOLY ROSARY	7:00	HOLY ROSARY
7:30	DOCTORS OF THE CHURCH	7:30	DOCTORS OF THE CHURCH
8:00	VATICAN WORLD NEWS	8:00	VATICAN WORLD NEWS
8:15	VANIMO LOCAL NEWS	8:15	VANIMO LOCAL NEWS
8:20	VATICAN ENGLISH PROGRAM	8:20	VATICAN ENGLISH PROGRAM
9:00	TOK STREET ABOUT HVAIDS WITH FR. JUDE	9:00	TOK STREET ABOUT HVAIDS WITH FR. JUDE
10:00	CATHOLIC JUKEBOX	10:00	CATHOLIC JUKEBOX
10:30	VATICAN ENGLISH PROGRAM	10:30	VATICAN ENGLISH PROGRAM
10:50	NON-STOP GOSPEL MUSIC	10:50	NON-STOP GOSPEL MUSIC

PNG So Bisnis

Cynthia Buckley-Igua (CHM) i raitim

L AITS, kamera... Eks en!" Yu ken harim dispela toktok i kam long dairekta husat i save wok long ol muvi set o ples we ol i save mekim ol muvi piksa. Yu bai inap harim dispela kain toktok tu sapos yu wanpela TV presenta o ol lain manmeri husat i save kamap long ol TV program.

Chin H Meen Supersound Studios i gat tripela musik program i save kamap long EMTV. Dispela tripela program em CHM Video Hits, South Pacific Music na Praise. Olgeta yet em CHM i save mekim insait long CHM Video Productions House.

Wok bilong kamap manmeri bilong hostim ol CHM musik program i no isi samting. Yu mas i gat pasin bilong toktok na kirapim skin bilong ol manmeri i lukluk long TV. Planti yangpela Papua Niugini manmeri i no save sanap long ai bilong vidio kamera o toktok na mekim kain kain tok pilai long kamera na planti long ol yangpela husat i save traime i save kisim taim nating tru.

Han i save tuhat nating, tit i save guria, han i save guria, toktok i save paul na pasin bilong sem i save kamap taim ol nupela manmeri i stat wok wantaim CHM. Tasol bihain long ol i sanap long ai bilong kamera na kisim strong, ol i save kamap ol bikpela manmeri long TV.

Ol dispela lain i save mekim wanem kain wok. Olsem yu save lukim long TV, ol dispela lain i save stori long wanem samting bai kamap long program bilong ol, wanem ol toktok i kamap long musik, stori long

ol nupela albam, musik atis na ol arapela mauswara nabaut.

Ol i save gat sans long tok stori wantaim ol biknem musik ben, ol i save go long olgeta musik konset na ol i save gat sans long kisim ol hanmak o siknesa bilong ol namba wan musik atis bilong ol yet. Tasol i no save isi olgeta taim. Em i wanpela wok tu ya. Na sampela taim, yu ken lusim gras long het na bikpela wari i ken kilim yu tu.

Planti manmeri i save laik lukim ol musik program bilong CHM i no save lukim bikpela hat wok ol manmeri bilong CHM i save mekim long kamapim ol dispela TV so.

Wanwan man o meri husat i save sanap long fran bilong kamera i ken mekim planti aua hat wok i go insait long stretim program bilong em bilong ol wik antap.

Ol i mas makim ol musik klip ol bai soim, ol i mas sekim wanem ol klip ol manmeri i save laikim tumas, kisim stori bilong ol musik atis na ol albam, promotim ol musik ben, makim taim bilong stori wantaim ol musik atis.

Na taim olgeta i pinis na stret, ol i mas redi long sanap na soim program bilong ol long fran bilong kamera.

Long dispela sait, ol i mas redi wantaim ol toktok ol bai mekim taim ol i toktok long kamera. Long tok Inglis, nem bilong dispela toktok ol i save kolim 'skript'.

Bihain long en, em i taim bilong dispela man o meri husat bai sanap long fran bilong kamera long soim tru stail bilong ol.



CHM TV HOSTS

• Dispela em ol lain i save mekim bikpela hat wok long karim ol CHM TV musik program i kam long yupela - Long Iephan i go long rait, Didimeri (South Pacific Music), Cynthia Igua (Olgeta program), George Nigani Jr. (Video Hits) na Doreen Lavaiaamat (Praise).

Bilong wanem ol i mas pulim laik bilong ol manmeri i husat i lukim TV i stap. Ol i laikim ol long lukim ol osem wanpela poroman bilong ol.

Ol manmeri husat i bin sanap long fran bilong kamera bipo na mekim nem bilong ol em Vincey Boy, Kevin Marai, Dadi Toka Jnr, dispela pani man Kanage, Leo Morgan Jnr, Varage

Vagi, Lisa Karawa, Vagi Samuel na Rozalia Dala.

John Faunt, man i save singsing long Haus Boi tu i bin stat wok olsem wanpela TV presenta long CHM Video Hits pastaim long em i mekim nem bilong em long volume 1 albam bilong em.

Tete, bai yu ken lukim ol lain olsem George Nigani

Jnr, Doreen Lavaiaamat, Cynthia Igua na Didimeri, na Jaga Renagi.

Olgeta dispela lain nau i save mekim bikpela hat wok tru long olgeta wik long karim ol dispela TV musik program i save kamap long EMTV.

Nau yu save, taim yu lukim wanpela long ol dispela pes i kamap long TV

skrin bilong yu, noken bagarapim ol nating.

Ol i save mekim bikpela wok tru long kamapim ol dispela musik program yu save lukim long TV.

Yu ken sindaun isi na lukim ol dispela program, tasol tingtim tu bikpela wok ol lain i save mekim long stretim ol dispela program bilong yu.




SEKIM TV LONG
DISPELA WIK:

8.30PM - FRAIDE NAIT MUVI - FOREVER YOUNG

Wanpela tes pailot bilong ol nupela balus long Amerika long 1940 samting i stap wantaim bikpela wari bihain long ka i ron antap long lewa meri bilong em na em i kisim bagarap na slip long haus sik.

Wari i kilim em nogut tru na em i go traime wanpela nupela wok sains we ol dokta i putim bodi bilong em long blok ais na em i slip moa long 30 yia.

Taim em i kirap, em i stap long tude. Gutpela muvi bilong famill.



9.30PM - MANDE NAIT - C.S.I.

Dispela program em stori bilong wanpela Crime Scene Investigation Buro long Las Vegas, Nevada.

Planti bikpela samting i save kamap olsem man kilim arapela man.

Ol CSI lain i save yusim ol kain kain masin na save bilong ol yet long painim aut husat tru i kilim man.



Em bipo, nau em nau

MIPELA i stap pinis long namba tu wik bilong 2005, na ol tingting bilong SP Top 100 bilong Yumi FM long makim pinis bilong yia i stap yet.

Planti singsing i bin strongim sanap bilong ol na soim strong bilong PNG musik industri. Olsem na mi laik lukluk bek na glasim ol developmen i kamap insait long musik industri inap nau.

Insait long 30 yia i go pinis, strong bilong intanesenel na rijinol musik i kamap strong insait long kantri na i halivim long strongim pairap bilong musik na wok bilong ol musik atis bilong yumi yet.

Ol intanesenel musik atis i bin bikpela long stat bilong 1970s taim Bogenvil Kopa i bin karim ol intanesenel musik atis i kam long pilai musik bilong bikpela hap ovasis manmeri husat i bin stap long maining taun bilong Arawa.

I bin i gat planti musik atis i kam long Australia na New Zealand husat i bin kam long pilai long Davara Hotel, Toniva o Arovo Ailan Risot long Kieta Be.

Long Pot Mosbi yet Brian Aitken bilong bipo Islander Hotel (Nau nem bilong em Holiday Inn) i wok long sainim ol kain kain atis bilong ovasis long olgeta mun. Wampela biknem musik meri bilong Australia long dispela taim em Marcia Hines.

Tasol smok kampani Benson & Hedges i bin go pas long karim ol intanesenel musik atis i kam aninit long Golden Tones Musik program bilong ol. Ol i kisim ol intanesenel musik atis i kam long

pitai long sampela konset hia long 1990s.

Benson & Hedges i bin namba wan bikpela bisnis i go pas long putim mani long ol laip konset bilong ol PNG ben long olgeta hap bilong kantri long olgeta yia taim ol i bin save putim mani long Golden Tones Musik program. I bin i gat bikpela konset tru long pinis bilong yia taim biknem



musik atis bilong Australia, James Blundell i bin kam.

Taim i laik go long pinis bilong 1990s, NAU FM i bin kamap na ol i bin kisim ol bikpela ovasis atis olsem

"Long 1970s taim Bogenvil Kopa i bin karim ol intanesenel musik atis i kam long pilai musik bilong bikpela hap ovasis manmeri husat i bin stap long maining taun bilong Arawa.

I bin i gat planti musik atis i kam long Australia na New Zealand husat i bin kam long pilai long Davara Hotel, Toniva o Arovo Ailan Risot long Kieta Be."

Boney M, Lucky Dube, O'Yaba, na Makoma. Olgeta dispela musik atis na grup i bin apim mak bilong PNG musik.

Chin H Meen Supersound Studios i bin lukluk long kisim ol biknem musik atis insait long Pasifik, olsem Daniel Rae Costello na ol arapela ben na atis bilong Fiji, New Zealand na Australia.

Ol i bin go pas tu long salim ol lokol musik atis bilong PNG i go pitai raun long Solomon Ailans na Vanuatu aninit long nem, Super Band. Narapela studio bilong bipo, Pacific Gold i bin salim ol namba wan musik atis bilong ol, Barike i go long New Caledonia.

Mi mas tokim yupela tu olsem namel long 1980s, PNG musik i bin pairap pinis long ovasis. Dispela i kamap long strong na stail bilong Sanguma ben, husat i bin kamapim intanesenel nem na pulim iau bilong ol arapela kantri. Ol i bin bungim singsing bilong tumbuna wantaim musik bilong tude.

Ol arapela musik atis bilong Pasifik husat i bin kam long PNG em Vanessa Quai bilong Vanuatu, Black Rose bilong Fiji, Isles De Sound na Sharzy & Barnzie bilong Solomon Ailans, na Mataqali Ben bilong Fiji.

Tasol olgeta dispela gutpela samting i bin kamap insait long musik bilong PNG i no bin inap kamap sapos Australian Brodkasting Komisnin (ABC) na Dipatmen bilong Infomesen na Ekstensen Sevises (DIES) i no bin strongim ol lokol PNG musik atis na ben.

Dispela tupela lain i bin go pas long sanapim PNG Musik Industri. DIES i bin go pas long rekodim musik bilong ples na stringben musik long stat

bilong 1960 yet bilong ol long yusim insait long ol redio stesen bilong ol long Rabaul na Wewak. Dispela tupela opis i bin kamapim Kundu Sevis.

Long dispela taim ABC i bin stap long opis nau NBC i stap long en. Ol i bin rekodim musik bilong ol pawa ben bilong Pot Mosbi long dispela taim olsem Kontikis, Freebeats, kopykats, Stalemates na ol arapela ben bilong Papua. Ol i bin rilisim musik bilong ol dispela lain aninit long Viking Records bilong New Zealand bikos long dispela taim planti wait manmeri husat i bin lukautim ol hotel, ba na klab insait long Pot Mosbi i bin laikim tru musik bilong ol Papua.

Long 1973 ACB i bung wantaim DIES long kamapim Nesenel Brodkasting Komisnin na ol rekoding bilong ol lokol ben i bin pairap long redio.

Sampela yia pastaim long dispela i bin kamap, wampela

long kolim 'Tolai Rock' bilong wanem ol tok ples Kuanua singsing i bin pairap na bung wantaim musik bilong gita na rok musik.

Soundstream studios i bin kamap long rekodim musik bilong ol ben na kwaia bilong Tolai. Ol biknem musik ben bilong tete olsem Barike, Painim Wok, Jnr Molachs na Shutdown i bin kamap long dispela studio.

Soundstream i bin senisim nem i go long Pacific Gold taim CHM i sanapim rekoding musik haus bilong ol long Rabaul. Long dispela taim tu, Kuanua Studios i bin kamap.

Taim NBC i lukim olsem lokol PNG musik i bin i gat strong long mekim mani, ol i sanapim 16 trak studio bilong ol long Mosbi.

Taim maunten paia i bin pairap long 1994, ol studio long Rabaul i bin pas. Sampela mun bihain, Pacific Gold i bin sanap long Mosbi.

I kam inap tude, planti nupela studio i bin kamap. I no long Pot Mosbi tasol, long ol arapela provins tu.

Island Sound Studios i bin opim dua bilong em long Rabaul aninit long CHM, Palm Slave Studios i bin op long Kimbe, Cyclone Studios i stat long Godens, Mosbi na Sound View i bin stat long Waigani. I no long taim i go pinis, Pawahaus studio.

Tru tumas, mipela wokabout long longpela rot pinis insait long dispela 30 yia, na nau mipela i ken tok olsem mipela i gat ol intanesenel atis tu olsem Telek husat i rilisim namba tri intanesenel album bilong em long Australia, na Ben Hakalitz, namba wan drama bilong mipela husat i pilai wantaim Yothu Yindi i stap.

Insait long 4-pela yia i go pinis, mipela i bin i gat sampela bikpela raun long ovasis olsem ol City Mission raun long Australia we Patti Potts Doi na Hitsy Golou i mekim, raun bilong Tribesmen long Europe, na Teleik long Solomon, Vanuatu na ol arapela kantri.

Hitsy i bin mekim nem long Cook Islands, Buruka Tau i bin raun skulim musik long Saut Is Asia, ol raun bilong PGS long Australia, John Wong i mekim nem long Pacific Music Awards long Brisbane na ol arapela gutpela musik raun ausait long kantri.

Bikpela hap bilong olgeta dispela samting insait long groa bilong PNG Musik Industri i kamap long strong na hat wok bilong wampela man, Raymond Chin, husat i bin bilip olsem ol musik atis bilong PNG inap long mekim nem long wol musik.

Mipela hia long Glasim Musik wantaim JK i givim luk-save long dispela man husat i statim olgeta samting mipela i gat tude.

***Yu ken ridim stori blong ol musik man/meri long What's On With Raitman insait long POST COURIER tasol, Trinde, olgeta wik.**

EMTV GAID

5.29 STATION OPEN	5.00 JOYCE MEYER MINISTRY
5.30 JOYCE MEYER MINISTRY	6.00 TODAY SHOW
6.00 TODAY SHOW	9.00 MALOLO CLUB
9.00 MALOLO CLUB	11.00 CREFFLO DOLLAR
11.10 CREFFLO DOLLAR	11.30 DR PHIL
11.30 DR PHIL	12.30 EMTV PRIME LINEUP
12.00 EMTV PRIME LINE	4.57 EMTV TOKSAVE
4.57 EMTV TOKSAVE	6.00 NATIONAL EMTV NEWS
6.00 THE PRICE IS RIGHT	6.30 A CURRENT AFFAIR
\$100,000 SUPER SHOWCASE	6.58 TOK PISIN NEWS UPDATE
NATIONAL EMTV NEWS	7.00 LOTTO DRAW
6.30 A CURRENT AFFAIR	7.01 PRAISE
6.59 LOTTO DRAW	8.00 INSAT
7.00 20/20 match - Australia v Pakistan	8.27 EMTV TOKSAVE
8.57 EMTV TOKSAVE	8.30 APPRENTICE
9.00 CHM SUPER SOUND	9.30 C.S.I. CRIME SCENE INVESTIGATION
10.00 KING OF QUEENS	10.30 NEWS REPLAY
10.30 EMTV NEWS REPLAY	11.00 CHM SUPER SOUND
11.00 WALKER TEXAS	12.00 NIGHTLINE
00.00 NIGHTLINE	12.30 CLOSE
0.30 STATION CLOSE	

5.29 STATION OPEN	5.29 STATION OPEN
5.30 JOYCE MEYER MINISTRY	5.30 JOYCE MEYER MINISTRY
6.00 TODAY SHOW	6.00 TODAY SHOW
9.00 MALOLO CLUB	9.00 MALOLO CLUB
11.10 CREFFLO DOLLAR	11.00 CREFFLO DOLLAR
11.30 DR PHIL	11.30 DR PHIL
12.30 EMTV PRIME TIME LINE UP	12.30 EMTV PRIME LINEUP
1.00 ONE DAY SERIES - AUST V PAKIS	4.57 EMTV TOKSAVE
4.57 EMTV TOKSAVE	5.00 THE PRICE IS RIGHT
5.00 THE PRICE IS RIGHT	6.00 NATIONAL EMTV NEWS
\$100,000 SUPER SHOWCASE	6.30 A CURRENT AFFAIR
AUSTRALIA V PAKISTAN CONT...	6.58 TOK PISIN NEWS UPDATE
6.00 NATIONAL EMTV NEWS	6.59 LOTTO DRAW
6.30 A CURRENT AFFAIR	7.00 BACK YARD BLITZ
6.58 NEWS UPDATE TOK PISIN	7.30 HOLIDAY SHOWDOWN
6.59 LOTTO DRAW	8.27 EMTV TOKSAVE
7.00 AUST V PAKIS CONT...	8.30 JAG
9.30 FRIDAY FIGHT NIGHT	9.30 THIRD WATCH
9.27 EMTV TOKSAVE	10.30 EMTV NEWS REPLAY
10.00 FRIDAY NIGHT MOVIE: FOREVER YOUNG	11.00 ER
00.00 EMTV NEWS REPLAY	00.00 NIGHTLINE
00.30 NIGHTLINE	00.30 STATION CLOSE
00.30am STATION CLOSE	

7.00 IT'S HI-5	6.29 STATION OPEN
7.30 JAYJAY THE JET PLANE	5.30 JOYCE MEYER MINISTRY
8.00 PLANET FANTA	6.00 TODAY SHOW
9.30 DOWNLOAD	9.00 TOUR MATCH CRICKET WEST INDIES V PAKIS
10.00 SO FRESH	12.30 SOME CALL IT SPORT
11.30 X-TEAM	1.00 WEST INDIES V PAKIS CONT...
12noon SURF SPORT	4.57 EMTV TOKSAVE
1.00 CHURCHILL MAN OF DES TINY, PART 1	5.00 THE PRICE IS RIGHT
2.00 CHURCHILL MAN OF DES TINY PART 2	\$500,000 SUPER SHOWCASE
5.00 ESCAPE WITH E.T	6.00 NATIONAL EMTV NEWS
5.30 FISHING AUSTRALIA	6.30 A CURRENT AFFAIR
6.00 NATIONAL NEWS EMTV	6.57 TOK PISIN NEWS UPDATE
6.30 SPECIAL PRESENTATION CIRCUS DU SOLEIL	6.59 LOTTO DRAW
NOUVEAU EXPERIENCE-CIRCUS SHOW	7.00 WORLD OF WILD LIFE
8.00 SOUTH PACIFIC MUSIC	7.30 WIFE SWAP- NEW SERIES
8.57 EMTV TOKSAVE	8.57 EMTV TOKSAVE
9.00 XENA WARRIOR PRINCES	9.00 WEDNESDAY NIGHT MOVIE: CURLY SUE
10.00 HECULES	11.00 SOUTH PACIFIC MUSIC
11.30 THE LEGENDARY HIDDEN CITY	11.30 EMTV NEWS REPLAY
0.00am KING OF QUEENS	12.00 NIGHTLINE
00.30 CLOSE	12.30 STATION CLOSE

6.59 STATION OPEN	6.59 STATION OPEN
7.00 IT IS WRITTEN	7.00 IT IS WRITTEN
7.30 WORLD OF WILDLIFE	7.30 WORLD OF WILDLIFE
8.00 AMERICAN CINEMA	8.00 AMERICAN CINEMA
8.30 GOOD SPORT	8.30 GOOD SPORT
9.00 ONE DAY SERIES AUST VS PAKIS	9.00 ONE DAY SERIES AUST VS PAKIS
12.30 SPEED MACHINE	12.30 SPEED MACHINE
1.00 AUST V PAKIS...	1.00 AUST V PAKIS...
5.00 THE PACIFIC WAY	5.00 THE PACIFIC WAY
6.00 NATIONAL EMTV NEWS	6.00 NATIONAL EMTV NEWS
6.30 TOUCH BY AN ANGLE	6.30 TOUCH BY AN ANGLE
7.30 PREMIER SPECIAL: THE TRUTH BEHIND THE MOON LANDING	7.30 PREMIER SPECIAL: THE TRUTH BEHIND THE MOON LANDING
8.27 EMTV TOKSAVE	8.27 EMTV TOKSAVE
8.30 MOVIE: SECOND CHANCE	8.30 MOVIE: SECOND CHANCE
10.30 EMTV NEWS REPLAY	10.30 EMTV NEWS REPLAY
11.30 PRAISE	11.30 PRAISE
00.00 STATION CLOSE	00.00 STATION CLOSE



Movie: Forever young 10.00pm Friday



Crime Scene Investigation 9.30pm Monday

NATIONAL WEEKLY HIT PARADE

YUMI FM NATIONAL WEEKLY HITPARADE

Sarere Jenuari 8, 2005 Twisties i sponsa

Singsing	Musik Atis	Dispela Wik
Sweet Karanas	O-shen	1
Towescop	Itambu	2
Lili	Itambu	3
Hi Bayama	Armstrong	4
Dimigura	Bits & Pieces	5
Sigi Mangi	Grumo Masalai	6
Lareva	Ex Hollie Maea	7
Lewa	Hausboi	8
Kina.com.pg.au Simbary		9
Jombie Kunex	New Painim Wok	10
S Sharon	Uralom Kania	11
Pasin Tasol	Luke Banag	12
Hard Life	X-Anats	13
Naikie	Hausboi	14
Na Wonde	Tom Lari	15
Meri Siwi	K-Mala	16
Sugar Meri	Kuri Rup	17
Parasite	Minica Malbak	18
Sikui Sepik	Julius Moab	19
Nellien	Uralom Kania ft Moses20	



Laikim Penpren

Nem: George Alit
Krismas: 17 (man)
Adres: P.O. Box 1190 Wewak ESP
Save laikim: Mekim penpren wantaim ol arapela Pasifik Ailans lain na ol penpren bilong ovasis.

Nem: Anem Charich
Adres: Gabensis Primary School P.O. Box 315 Lae, Morobe Province
Krismas: 16 (man)
Save laikim: Paitim gita, painim abus, wok gaden, stadi na go lotu.

Nem: Semion Senes
Adres: Gabensis Primary School P.O. Box 315 Lae Morobe Province
Krismas: 16 (man)
Save laikim: Pilai ragbi, paitim gita, tok pilai na raun wantaim ol manki.

Nem: Eliah Lucas
Adres: Gabensis Primary School P.O. Box 315 Lae, Morobe Province
Krismas: 15 (man)
Save laikim: Pilai volibol, tok pilai, skelim musik, go lotu na raun wantaim ol manki.

Nem: Otile Eleanor Lantu'e
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Harim musik, pilai basketbol na volibol, ritim buk na mekim pren.

Nem: Raymond Billy
Adres: Gabensis Primary School P.O. Box 315 Lae, Morobe Province
Krismas: 14 (man)
Save laikim: Pilai soka, raun wantaim ol poro na tok pilai.

Nem: Arem Gerry
Adres: Gabensis Primary School P.O. Box 315 Lae, Morobe Province
Krismas: 15 (man)
Save laikim: Raun long bus, harim musik na pilai soka.

Nem: Evelyn Sorseng
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Pilai soka, danis, div, swim, pul kanu, na tok pilai.

Nem: Martina Morosma
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Pilai soka, danis, div, swim, pul kanu, na tok pilai.

Nem: Krishna K. Tagoe
Adres: #BJ 106, Awutu-Bawjase, Yr, Ghana, WA
Krismas: 18 (man)
Save laikim: Spot, komputa gem, lukim piksa, harim musik, tenis poto na presen, go lukim ol pren, na laikim penpren namel long 18 na 40 krismas.

Nem: Ernese Awuah Barrister
Adres: Achiasse Senior Secondary School P.O. Box 33 Achiasse, Ghana
Krismas: 18 (man)
Save laikim: Kisim poto

Nem: Fred Bonna Agyemang
Adres: Achiasse Senior Secondary School P.O. Box 33 Achiasse, Ghana
Krismas: 16 (man)



STORI TUMBUNA

BIPO tru tupela brata i stap long wanpela ples long hap bilong Mendi, insait long Sauten Hailans. Wanpela i man bilong wokim gaden na arapela i man bilong painim abus. Gaden bilong tupela i bikpela hap tru. Insait long gaden bilong tupela man, kain kain kaikai i pulap tru. Wanpela de tupela i wok i stap long gaden. Man bilong painim abus i tokim brata, "Ating nau yumi i nogat abus ya, ating bai mi go painim tumora."

Tupela i redim ol kaikai. Tupela i brukim kumu na kamautim taro, kaukau, brukim pitpit na paiawut, na lip ti. Narapela i sapim kaukau na taro na narapela i wokim paia na kukim ston. Tupela i mumu pinis na man bilong painim abusi redim ol sup-sup, spia, akis, banara, tanget na wanpela rabis malo. Olgeta samting i redi na tupela i stat long rausim mumu bilong tupela. Tupela i rausim pinis na tupela i stat long skelim. Olgeta samting tupela i skelim long tupela hap tasol.

Narapela de man bilong painim abus i putim tanget na rabis malo bilong em na em i holim ol samting bilong sutim abus. Em stat long wokabaut i go long bus. Em i wokabaut i go na kalapim wanpela maunten na kamap long hap sait long narapela maunten gen. Long dispela trep i pulap tru long kapul. Em i kilim planti kapul na em i karim long bilum. Em i wokabaut i go longwe liklik na kam kamap long wanpela diwai bipo i pundaun. Em i tanim na lukim, man graun malumalum i pulap tru antap long dispela diwai.

Em i tingting planti. Em i wanem samting? Ating bai mi lukim na i go bek long haus. Olsem na em i go aninit long dispela diwai. Em i no larim hap bodi o tanget i go ausait liklik. Em i no stap long-taim yet na man diwai i stap long mov, o seksek. Em i tromoi nek. Em i wokim trep pinis na em i slip long dispela ples. Narapela de em i sindaun long dispela

Mama kamap long we stret?



ples em i save sindaun long en.

Ol meri i singsing i kam gen na ol arapela i wok long kalapim dispela trep tasol. Man em i lukim ai nogut, lek nogut, gutpela na i no gutpela man i pulap tru na inapim dispela longpela diwai. Wanpela bilong ol i lukim em pinis na olgeta i ranawe i go. Man ya i kirap lukluk tasol em i no lukim ol i go long wanem rot. Man ya i tingting planti tru. Ating bai mi mekim wanem samting? Ating moabeta mi putim trep tasol.

Man i kirap karim bilum kapul bilong em na wokabaut i go bek long ples. Em i kamap long ples na brata i amamas long brata i kam bek long ples. Em i amamas long ol abus tu. Wanpela samting em, em i no tokaut long wanem samting em i bin

lukim. Narapela de em i go long dispela ples pastaim em i go long en.


Em i mekim olsem pastaim em i mekim. Ol yangpela meri i singsing i kam, na las tru wanpela naispela meri tru i singsing i kam. Ol i lukim em gen na ol i ranawe i go. Long dispela taim tasol em i stat long wokim trep. Las tru dispela naispela meri i kam na i hagamap long trep. Boi ya i kirap tasol holim pasin em. Meri ya i tanim long ston tasol boi ya i kirap holim pas. Em i wok long tanim long kainkain samting.

Tasol boi i kirap holim pas tasol. Olsem na meri i tok. "Mitupela i ken go long ples bilong yu." Tupela i kamapim planti famili. Em yumi olgeta i pikinini bilong dispela tupela manmeri tasol.

Mi wari long Famili bilong mi

Dia Lalplain
 Mi stap long wanpela kos long Mosbi na mi wok long wari long famili bilong mi long ples.
 Bel bilong mi i hevi tru na sampela taim mi laik kisim olgeta kago bilong mi na go bek long ples. Klostu meri bilong mi bai karim tu namba wan pikinini bilong mitupela. Olsem na mi wari tru long em.

Dia Pren,
 Yu stap longwe long ples long taim meri bilong yu i karim namba wan pikinini bilong yutupela na olsem yu wok long wari. Dispela i soim olsem yu gat strongpela laik long meri na pikinini bilong yu.
 I luk olsem yu no bin lusim meri bilong yu na go stap longwe. Na tu long taim mi i laik kisim namba wan pikinini papamama i save amamas, tasol ol i save tingting planti tu. Olsem na yu no mas wari



tumas long dispela.
 Planti bilong yumi i save pilim olsem long taim man o meri bilong yumi i stap longwe, na yumi salim pas i go na i kam bai yumi i no inap long wari tumas. Sapos yu save olsem meri bilong yu i stap long ples, em i ken raitim pas i kam long yu, orait, em i gutpela long yu tu long salim pas oltaim long em. Na sapos yu laik, orait, yu ken katim toktok bilong yu long keset na salim i go long em.
 Long taim em i karim pikinini, wanpela wantok o pren

bilong yu wanpela o pren bilong yutupela i ken ring o salim feks na toksave long yu.
 Na ol arapela marit man husat i stap long kos wantaim yu i pilim olsem wanem? Yu traim toktok wantaim ol tu o nogat Sapos sampela bilong ol i gat pikinini, orait, yu ken askim ol ol i save pilim olsem wan em taim ol i stap longwe na ol i stap insait long wankain situesen bilong yu, moa yet taim meri i laik karim pikinini.
 Yu gat sampela wanpela bilong yu i stap long Mosbi o nogat? Sampela taim yumi gat wari long ol lain i stap long ples, ol wantok i ken helpim yumi long pinisim dispela wari.
 Planti manmeri i no laik lusim famili bilong ol na go longwe long wanpela kos. Tasol planti man i no laki olsem yu. Na tu i gat planti samting i save kamap long laip bilong yumi na yumi i no inap long sentisim.

Mipela i bilip olsem yu yet i stretim pinis rot bilong meri bilong yu long go karim pikinini. Olsem na nau yu mas tingting long stadi bilong yu. Tasol bai yu amamas sapos yu pas long kos bilong yu na go bek lukim meri na nupela pikinini bilong yu.
Laipplain
 Sapos yu gat wari o askim, salim i kam long Lifeline, P O Box 6074, Boroko, NCD. Mipela i no inap autim trupela nem bilong yu tasol ol samting we yu toktok long em bai mipela i bekim. Olsem na salim trupela nem na adres na mipela bai salim bekim long wari bilong yu i kam stret long yu.
Laipplain



Laikim Penpren

Nem: George Alit
Krismas: 17 (man)
Adres: P.O. Box 1190 Wewak ESP
Save laikim: Mekim penpren wantaim ol arapela Pasifik Ailans lain na ol penpren bilong ovasis.

Nem: Anem Charich
Adres: Gabensis Primary School P.O. Box 315 Lae, Morobe Province
Krismas: 16 (man)
Save laikim: Paitim gita, painim abus, wok gaden, stadi na go lotu.

Nem: Semion Senes
Adres: Gabensis Primary School P.O. Box 315 Lae Morobe Province
Krismas: 16 (man)
Save laikim: Pilai ragbi, paitim gita, tok pilai na raun wantaim ol manki.

Nem: Eliah Lucas
Adres: Gabensis Primary School P.O. Box 315 Lae, Morobe Province
Krismas: 15 (man)
Save laikim: Pilai volibol, tok pilai, skelim musik, go lotu na raun wantaim ol manki.

Nem: Otile Eleanor Lantu'e
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Harim musik, pilai basketbol na volibol, ritim buk na mekim pren.

Nem: Raymond Billy
Adres: Gabensis Primary School P.O. Box 315 Lae, Morobe Province
Krismas: 14 (man)
Save laikim: Pilai soka, raun wantaim ol poro na tok pilai.

Nem: Arem Gerry
Adres: Gabensis Primary School P.O. Box 315 Lae, Morobe Province
Krismas: 15 (man)
Save laikim: Raun long bus, harim musik na pilai soka.

Nem: Evelyn Sorseng
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Pilai soka, danis, div, swim, pul kanu, na tok pilai.

Nem: Martina Morosma
Adres: Mercy Secondary School P.O. Box 580 Wewak ESP
Krismas: 17 (meri)
Save laikim: Pilai soka, danis, div, swim, pul kanu, na tok pilai.

Nem: Krishna K. Tagoe
Adres: #BJ 106, Awutu-Bawjase, Yr, Ghana, WA
Krismas: 18 (man)
Save laikim: Spot, komputa gem, lukim piksa, harim musik, tenis poto na presen, go lukim ol pren, na laikim penpren namel long 18 na 40 krismas.

Nem: Ernese Awuah Barrister
Adres: Achiasse Senior Secondary School P.O. Box 33 Achiasse, Ghana
Krismas: 18 (man)
Save laikim: Kisim poto

Nem: Fred Bonna Agyemang
Adres: Achiasse Senior Secondary School P.O. Box 33 Achiasse, Ghana
Krismas: 16 (man)



STORI TUMBUNA

BIPO tru tupela brata i stap long wanpela ples long hap bilong Mendi, insait long Sauten Hailans. Wanpela i man bilong wokim gaden na arapela i man bilong painim abus. Gaden bilong tupela i bikpela hap tru. Insait long gaden bilong tupela man, kain kain kaikai i pulap tru. Wanpela de tupela i wok i stap long gaden. Man bilong painim abus i tokim brata, "Ating nau yumi i nogat abus ya, ating bai mi go painim tumora."

Tupela i redim ol kaikai. Tupela i brukim kumu na kamautim taro, kaukau, brukim pitpit na paiawut, na lip ti. Narapela i sapim kaukau na taro na narapela i wokim paia na kukim ston. Tupela i mumu pinis na man bilong painim abusi redim ol sup-sup, spia, akis, banara, tanget na wanpela rabis malo. Olgeta samting i redi na tupela i stat long rausim mumu bilong tupela. Tupela i rausim pinis na tupela i stat long skelim. Olgeta samting tupela i skelim long tupela hap tasol.

Narapela de man bilong painim abus i putim tanget na rabis malo bilong em na em i holim ol samting bilong sutim abus. Em stat long wokabaut i go long bus. Em i wokabaut i go na kalapim wanpela maunten na kamap long hap sait long narapela maunten gen. Long dispela trep i pulap tru long kapul. Em i kilim planti kapul na em i karim long bilum. Em i wokabaut i go longwe liklik na kam kamap long wanpela diwai bipo i pundaun. Em i tanim na lukim, man graun malumalum i pulap tru antap long dispela diwai.

Em i tingting planti. Em i wanem samting? Ating bai mi lukim na i go bek long haus. Olsem na em i go aninit long dispela diwai. Em i no larim hap bodi o tanget i go ausait liklik. Em i no stap long-taim yet na man diwai i stap long mov, o seksek. Em i tromoi nek. Em i wokim trep pinis na em i slip long dispela ples. Narapela de em i sindaun long dispela

Mama kamap long we stret?



ples em i save sindaun long en.

Ol meri i singsing i kam gen na ol arapela i wok long kalapim dispela trep tasol. Man em i lukim ai nogut, lek nogut, gutpela na i no gutpela man i pulap tru na inapim dispela longpela diwai. Wanpela bilong ol i lukim em pinis na olgeta i ranawe i go. Man ya i kirap lukluk tasol em i no lukim ol i go long wanem rot. Man ya i tingting planti tru. Ating bai mi mekim wanem samting? Ating moabeta mi putim trep tasol.

Man i kirap karim bilum kapul bilong em na wokabaut i go bek long ples. Em i kamap long ples na brata i amamas long brata i kam bek long ples. Em i amamas long ol abus tu. Wanpela samting em, em i no tokaut long wanem samting em i bin

lukim. Narapela de em i go long dispela ples pastaim em i go long en.


Em i mekim olsem pastaim em i mekim. Ol yangpela meri i singsing i kam, na las tru wanpela naispela meri tru i singsing i kam. Ol i lukim em gen na ol i ranawe i go. Long dispela taim tasol em i stat long wokim trep. Las tru dispela naispela meri i kam na i hagap long trep. Boi ya i kirap tasol holim pasin em. Meri ya i tanim long ston tasol boi ya i kirap holim pas. Em i wok long tanim long kainkain samting.

Tasol boi i kirap holim pas tasol. Olsem na meri i tok. "Mitupela i ken go long ples bilong yu." Tupela i kamapim planti famili. Em yumi olgeta i pikinini bilong dispela tupela manmeri tasol.

Mi wari long Famili bilong mi

Dia Lalplain
 Mi stap long wanpela kos long Mosbi na mi wok long wari long famili bilong mi long ples.
 Bel bilong mi i hevi tru na sampela taim mi laik kisim olgeta kago bilong mi na go bek long ples. Klostu meri bilong mi bai karim tu namba wan pikinini bilong mitupela. Olsem na mi wari tru long em.

Dia Pren,
 Yu stap longwe long ples long taim meri bilong yu i karim namba wan pikinini bilong yutupela na olsem yu wok long wari. Dispela i soim olsem yu gat strongpela laik long meri na pikinini bilong yu. I luk olsem yu no bin lusim meri bilong yu na go stap longwe. Na tu long taim mi i laik kisim namba wan pikinini papamama i save amamas, tasol ol i save tingting planti tu. Olsem na yu no mas wari



tumas long dispela.
 Planti bilong yumi i save pilim olsem long taim man o meri bilong yumi i stap longwe, na yumi salim pas i go na i kam bai yumi i no inap long wari tumas. Sapos yu save olsem meri bilong yu i stap long ples, em i ken raitim pas i kam long yu, orait, em i gutpela long yu tu long salim pas oltaim long em. Na sapos yu laik, orait, yu ken katim toktok bilong yu long keset na salim i go long em.
 Long taim em i karim pikinini, wanpela wantok o pren

bilong yu wanpela o pren bilong yutupela i ken ring o salim feks na toksave long yu. Na ol arapela marit man husat i stap long kos wantaim yu i pilim olsem wanem? Yu traim toktok wantaim ol tu o nogat Sapos sampela bilong ol i gat pikinini, orait, yu ken askim ol ol i save pilim olsem wan em taim ol i stap longwe na ol i stap insait long wankain situesen bilong yu, moa yet taim meri i laik karim pikinini.
 Yu gat sampela wanpela bilong yu i stap long Mosbi o nogat? Sampela taim yumi gat wari long ol lain i stap long ples, ol wantok i ken helpim yumi long pinisim dispela wari. Planti manmeri i no laik lusim famili bilong ol na go longwe long wanpela kos. Tasol planti man i no laki olsem yu. Na tu i gat planti samting i save kamap long laip bilong yumi na yumi i no inap long sentisim.

Mipela i bilip olsem yu yet i stretim pinis rot bilong meri bilong yu long go karim pikinini. Olsem na nau yu mas tingting long stadi bilong yu. Tasol bai yu amamas sapos yu pas long kos bilong yu na go bek lukim meri na nupela pikinini bilong yu.
Laipplain
Sapos yu gat wari o askim, salim i kam long Lifeline, P O Box 6074, Boroko, NCD. Mipela i no inap autim trupela nem bilong yu tasol ol samting we yu toktok long em bai mipela i bekim. Olsem na salim trupela nem na adres na mipela bai salim bekim long wari bilong yu i kam stret long yu.
Laipplain



**Bisnis bilong Groim Diwai
insait long PNG
- Planim samting insait
long renfores eria**

**Stori baksait long
planim ol diwai spisis
insait long renfores**

Taim ol manmeri i stat long planim ol diwai insait long renfores, ol i mekim bilong sanapim ol lokol diwai spisis we inap kisim bikpela mani. Olsem:

-Toona australis (red cedar) long Isten Australia; Balanocarpus heimii (chengal) long Malaysia; Khaya na Entandrophragma spp. (African mahoganies) long Nigeria na Swietenia spp (true mahoganies) long ol hap long tropikel America na Fiji.

We ol i planim ol diwai spisis bilong arapela kantri long stat bilong em stret, ol i planim bilong kisim bikpela mani long ples ol i kam long en. Olsem teak Tectona grandis na mahogany. Swietenia sp.

Dispela pasin i go yet inap fete - taim moa diwai i wok long kisim luksave long ol timba maket, na moa lukluk i go long planim bilong ol dispela diwai spisis. Olsem Flindersia brayleyana (Queensland Maple) em ol i planim long Malaysia.

I gat ol arapela spisis we i save groa nating na long ol bikpela namba insait long ol netserel renfores, tasol i hat long groa ol yet.

Ol dispela kain diwai i save groa bikpela insait long ol renfores eria. Ol dispela diwai i karamapim Araucaria spp olsem hoop na klinki pain we ol i planim long Bulolo long PNG.

Olsem mipela i toktok long en pinis, taim ol man i luksave long manimak bilong ol diwai, i bin i gat wanwan timba tasol ol man i painim.

Tasol mak bilong ol maket long ol arapela diwai spisis we yu ken yusim long ol kain kain wok, na we i save groa hariap, i wok long go antap. Olsem terminalias sop long Africa na PNG.

Wanpela arapela developmen we i wok long strongim luksave long planim ol jenerel pepes o wok diwai.

Dispela i wok long go bikpela bilong wanem i gat ol nupela diwai we i save groa hariap na i no save groa insait long ol renfores tasol olsem Pinus spp. na Eucalyptus spp.

Ol dispela planim i wk long kamap insait long Hailans rijon

bilong PNG wantaim P na Eucalyptus spp na E. deglupta (kamerere) long Open Bay long Is Nu Briten. Wankain tasol long Brazil; ol i planim planti Eucalyptus bilong kisim timba na mekim pepa.

Planti long ol dispela diwai spisis i bin kamap olsem plante-sen taim renfores i bin bagarap taim ol manmeri i painim paiawut.

Nau insait long tropiks, ol manmeri i wok long lukim ol bikpela hap planim long pinus, eucalyptus, acacia mangium (long Madang) i wok long bikpela long kisim ol rop bilong diwai, paiawut na mekim haus.

Ol foresta i painimaut olsem i gat wanwan kain diwai spisis we inap long givim bek gris long graun bilong mekim wok agrikalsa. Olsem Pinus spp. (long Hailans bilong PNG) i wok long win long daunim ol ples we bipo i gat planti kunai i sanap long en.

**Long bungim olgeta toktok,
i gat planti kain kain as long
ol man i save planim diwai
insait long ol renfores eria:**

**-Long groim ol fores we i
gat planti moa diwai i ken
kisim mani;**

**-Kamapim ol fores plante-
sen wantaim ol diwai i save
groa hariap na ol i ken yusim
long planti kain we;**

**-Senisim ol diwai na spisis i
save groa isi, ol spisis bilong
kantri yet we i hat long groa
bek gris long ol plantesen
wantaim ol arapela spisis;**

**-Sanapim bilong ol plante-
sen long givim bek helpim
long ol manmeri i stap we
renfores i bin bagarap;**

**-Groim bek ol diwai long ol
ples we ol manmeri i bagara-
pim pastaim; na long**

**-Strongim bek ol fores we i
nogat inap ikonmik spisis.**

*• Neks wik - Ol hevi
bilong planim diwai
insait long ol renfores eria.*

Ol kopra groa kros long Siune

...I laikim tok klia

MINISTA bilong Agrikalsa na Laipstok, Mathew Siune, i bin stopim tupela bung em i bin tok em bai holim wantaim ol niustlain (midia) long toktok long ol toktok we i wok long kamap olsem pasin bilong paolim mani i wok long kamap insait long Kopra Industri Koperesen (KIK) na wok bung wantaim bilong em wantaim bos bilong dipatmen, Mathew Wela Kanua.

Opis bilong Mista Siune i bin tok olsem em i bin stap long wanpela bung wantaim Praim Minista, Sir Michael Somare, na i no inap lukim ol niustlain.

Midia Yunit bilong Sir Michael na opis bilong Mista Siune i tok olsem tru tupela i bin bung long Mista Siune long toksave long Sir Michael long dispela hevi we i stap nau, na ol bai toksave long ol pipel long kaikai bilong toktok bilong ol long, ating long pinis bilong dispela wik.

Tupela bung we Mista Siune i bin laik holim long Tunde i no bin kamap.

Namba wan bung i bin long kamap long 10 kilok long moning

na ol i bin surikim i go long 2 kilok long apinun. Tasol bihain Mista Siune i bin stopim dispela bung long 2 kilok tu.

Wanpela man insait long kopra indastri, husat i no laik autim nem bilong em, i tok olsem Mista Siune, husat i bin kam bek long Kimbe, Wes Nu Briten provins long Mandé, i bin tokim Mista Kanua long holim dispela bung wantaim ol niustlain, tasol stopim bilong dispela namba tu bung i paolim olgeta manmeri long indastri na opis tu bilong Mista Siune.

"Mipela i wok long traim skelim pasin bilong em na traim long save wanem tru i wok long kamap, tasol mipela i no inap," em i tok.

Ol kain hevi bilong indastri i bin stap long taim yet, na sampela ol man pastaim i bin tokaut long dispela ol hevi.

Ol groa na Transparency International i bin autim wari

bilong ol long we we opis i bin yusim mani bilong ol groa long baim wanpela ka bilong Mista Siune.

PNG Groas Asosiesen i bin putim ol edvetisemen long ol niuspepa we i toktok long we KIK i wok long yusim ol bikpela mani mak, na menesmen i bin mekim ol disisen long dispela long kamap.

Asosiesen i bin askim Mista Siune long tok klia long ol dispela hevi long ol kopra groa bilong kantri.

Pasin bilong paolim mani insait long ol gavman dipatmen i wanpela bikpela hevi we i wok long stapim developmen bilong kantri.

Planti sevis i save lus long ol pipel taim dispela kain pasin i save kamap, na planti taim, nogat wanpela wok i save kamap long stretim ol dispela kain hevi, na sindaun bilong ol pipel i save bagarap.

PABLIK NOTIS




BANK OF PAPUA NEW GUINEA

Further to the Governor's announcement at the 8th Mining Conference in December 2004 on the liberalisation of exchange control regulation, proposed for implementation in January 2005, I wish to advise the public that the Central Banking (Foreign Exchange and Gold) regulation continues in full force and effect until such time as provisions of the regulation may be changed by the Bank of Papua New Guinea. The Bank will publicly announce the effective date of these changes.

**Benny B. Popoitai, MBE
Acting Governor**

McCARTHY & ASSOCIATES (FORESTRY) PTY. LTD.
National & International Forest Consultants
mccaf@datec.net.pg

"Long kisim tok stia long olgeta wok diwai"



• Buldosa fowet bilong Warriors i brukim difens bilong West Kange long Morata ov sisen lig. Dispela ol pilai i kamap long Kone Tigers pilai graun.




• Sori tumas...fowet bilong Warriors i laik skoa tasol difens bilong West Kange i strong na i mekim em i lusim bal long takol.

Ol spot poto wantaim ANDREW MOLEN



• Straik...Stanley Tavul bilong Ice Kopex i abrusim bal em kesa bilong Brown Eagles i holim long taim bilong Pot Mosbi sofbol pilai long wiken.



• Redi tasol...Stanley Tavul bilong Kopex i redi long ron i gol long las bes tasol pilai bilong Brown Eagles tu i putim bikpela was.



• Bai yu aut o nogat? Boula bilong United Kohu Dai i tromoi bal long pilai bilong ol TSTA Coasters long Pot Mosbi Kriket resis long Colt oval.



• Wina bilong Pot Mosbi baik resis Gibson Maraga (l) i amamas wantaim Lum Gum (namel) namba tri ples man na namba tu pies Nelson Huarongo.

Kriket turangu pilai kamapim K34 milien

WOL kriket pilai long Mande apinun namel long Wol XI wantaim Asia XI tim long Melbourne Kriket Graun long Australia i kamapim K34 milien long sunami apil.

Long dispela pilai Wol XI i winim Asia XI wantaim 112 ran.

Na long dispela pilai ol pilaia bilong Australia olsem Wol tim kepten Ricky Ponting na boula Shane Warne i bin helpim gut.

Pastaim long dispela pilai ol opisel i wok long ting long kamapim K28 milien tasol dispela i abrusim na kisim K34 milien.

Moa yet klostu 70,000 manmeri i bai tiket long kamap long dispela pilai.

Long pilaia bilong Asia husat i kamap na stap long dispela pilai em Sri Lanka pilaia Sanath Jayasuriya husat i lusim mama bilong em.

Long dispela pilai tu nius i kamap olsem olgeta Australia i givim lewa bilong ol long kamapim mani long pilai.

Ausait long pilai graun ol manmeri husat i sanap long lain long baim tiket i tromoi mani bilong ol i go insait long ol pot we ol manmeri husat i kisim mani long dispela tingting inap long taim bilong ol long baim tiket i kamap.

Na long insait ol bikpela bisnis man i wok long sainim ol K10,000 sek mani na traim resis husat bai winim husat na sainim planti mani.

Melbourne Kriket Graun we ol i holim Olimpik Gems na ol Wol Kap pilai bai i no inap lusim tingting long dispela wanpela de pilai we i kamap long helpim ol turangu.

Long dispela taim ol manmeri i no tingting long ol yet tasol i tingting moa long helpim narapela.

"Mi bin ridim olsem mipela bai kisim olsem Aus\$5 milien (olsem mani em ol i ting bai kamapim) na sapos mipela i bin kisim \$6 milien mipela i mekim gut. Mi amamas tru," Wol Vison sif eksekutiv Revren Tim Costello i tok.

Ol Australi i kisim tripela de long givim mani long kamapim dispela pilai.

Dispela i lukim mani i go antap long K46 milien olgeta.

Papa bilong Nine Network Kerry Packer



• Mutthiah Muralitharan (r) Adam Gilchrist na Daniel long Wol Kriket fanesing pilai long Melbourne long Mande nait. Wol XI tim winim Asia XI long 112 ran. Poto na stori i kam long SYDNEY MORNING HERALD

i givim K7 milien, bia kampani Foster i givim K2.33m na kriket pilai yet i kamapim K21m.

Long dispela pilai ol pilaia i no wari wanem wei ol i paitim bal o boul tasol bikpela samting em ol i pilai long kamapim sampela gutpela wok.

Niu Silan pilaia Chris Cairns i mekim 69 ran long 47 bal bilong em.

Na long Asia tim Rahul Dravid bilong Sri Lanka i mekim 75 ran long 71 bal bilong em.

Wol XI i bet pas we ol i mekim 344 ran na Asia i mas pilai long abrusim dispela

na kisim 345 tasol nogat. Ol i mekim tasol 232 ran.

Ol pilaia bilong Wol XI em Ricky Ponting (kepten), Stephen Fleming, Chris Cairns, Chris Gayle, Adam Gilchrist, Darren Gough, Matthew Hayden, Brian Lara, Glen McGrath, Daniel Vettori, Shane Warne na Dwayne Bravo.

Asia XI tim em Sourav Ganguly (kepten), Rahul Dravid, Sanath Jayasuriya, Zaheer Khan, Anil Kumble, Yousuf Youhana, Abdul Razzak na Alok Kapali. Bai moa pilai i bihain kain pasin long kamapim turangu mani.

Sir Alex i no wanbel long M/United pilai

MANCHESTER United bos Sir Alex Ferguson i givim wanpela apologi long ol sapota bilong klab bihain long ol i dro wantaim Exeter 0-0 long FA pilai bilong tupela.

Sir Alex i mekim dispela tok taim em i no amamas long kain pilai ol i kamapim long wiken na dro wantaim daunbilo tim Exeter.

Tasol Exeter i mas kamapim kain mak long wanem ol i pilai gut long dispela de.

Na ol inap long win sapos United i no bin was gut.

"Mi tok sori long ol sapota. Ol i no mas lukim dispela kain mak," em i tok.

"Long las 18-ya bilong mi long klab dispela em i wanpela rabis pilai em mipela i kamapim.

"Em i hat long yu traim long lus tingting. Mipela olgeta i no amamas. Sapos sampela lain bipo long pilai i stat i tokim mi olsem skoa bilong pilai bai kamap olsem 0 - 0 mi ating bai paitim em pinis.

"Mi save mipela i bin pilaim sampela ol yangpela bilong mipela tasol dispela i no mas eskus bilong mipela. Mipela i lukluk moa long ol i kamap gutpela pilai.

"Ating mi mas kisim i kam Paul Scholes na Alan Smith long hap-taim. Sapos ol i sasim long mi long sampela kain samting olsem kilim man i dai dispela kain asua i wankain long dispela asua mi mekim.

"Wanpela samting em mipela i ken kisim long dispela pilai em long mipela i stap yet long kompetisen.

"Dispela em i de bilong Exeter tasol mi bai kamapim gutpela pilai long narapela pilai bilong mi long oraitim dispela hevi," Sir Alex i tok.

Tszyu redi long bungim Hatton long Ingran pait

BIHAIN long ol toktok bilong Wol junia-weltawet sempion Kostya Tszyu i tokaut olsem em bai givim sampela taim long redim em yet pastaim long em i bungim Ricky Hatton bilong Ingran.

Dispela 35-ya man husat i kam bek long ring long autim tiket bilong wantok Amerika man Sharmba Mitchell long Phoenix long las Novemba i sel paia na i stap.

Em i kisim malolo long 22 mun olgeta bihain long bagarap em i gat long tasol nau olsem em i winim Wol junia-weltawet taitol long Novemba em i lukluk tasol long pinisim win bilong Hatton long Jun 5 bung bilong tupela long Manchester long Ingran.

"em i gutpela tru olsem dil i kamap long narapela pait bilong mi," Tszyu i tok. "Dispela i givim taim long redim mi gut.

"Mi laikim tru long pait wantaim Ricky long wanem mi bilip em i gutpela man long mi pait wantaim.

Dispela pait i luk olsem bai kos Aus\$5 milien (K11m) bai kamap long Ingran.

Na Hatton husat Tszyu bai pait wantaim i gat 38 stret win na 28 bilong dispela ol pait em insait long ol raun yet. Hatton em i gat 27 krismas.

Cameron kisim strong gen

KRISTY Cameron i painim gen strong bilong em taim em i mekim gut long Sydney surf.

Long pastaim em i bin tingting planti long wanem samting tru em bai mekim long bipo surf bilong em we em i kamap long namba 13 ples.

Tasol long Sande em i winim olgeta tripela resis bilong em.

Long dispela resis bilong ol ain meri long Australia namba wan 10-pela meri i gat sans long go insait long ol fainol we prais mani bilong win i sanap olsem long K110,000.

long namba tri raun Cameron, 22, i kamap pas long meri husat i pilai strong egensim em Kristy Manroe na Naomi Flood. Na West Australia meri Emma Wynne husat i gat 16 krismas tasol i kamap long foa ples.

"Taim mi kam daun long moning na lukim wara i silip sore mi save mi bai mekim gut," Cameron i tok.

Ol top 10 meri em Kristy Munroe 38 poin, Hayley Bateup, Naomi Flood, Kristyl Smith, Gemma Newbiggin, Kristy Cameron, Emma Wynne, Chelsea MacKenzie, Britt Collie na Sheree Merryfull.

Schild winim wol kap ski

MARLIES Schild bilong Austria i mekim gut tru long abrusim Amerika meri Kristina Koznick long long winim Wol Kap ski long las Sande.

Schild i sot long namba wan ran bilong em long Koznick tasol i kam gut moa long bod long ol narapela ski bihain.

Em i win long taim 1 29.96 seken.


Em i kamap pas long Koznick .15 seken.

Dispela 23 meri husat i winim Wol Kap pastaim long salom iven long Semmering long Austria long Disemba 29 i wok long traim strongim ples top faiv ples long wol renk. 437 poin bilong em i stap bihain long ski meri bilong Jemeni Hilde Gerg husat i stap long namba faiv ples wantaim 441 poin.

Na long resis bilong las Sande Monika Bergmann-Schmuderer bilong Jemeni i stap kamap namba tri ples long taim 1:30.20 long lukim namba siks gutpela mak bilong em.

Tanja Poutianen bilong Finlen i kamap namba siks ples long surukim mak bilong em i kamap antap wantaim 93 poin.

Em i abrusim Croatia meri Janica Kostelic husat i no bin mekim gut gut namba wan ran bilong em.



• Janne Ahonen i namba wan meri bilong ski long dispela taim. Tasol em i no mekim gut long dispela taim we Schild i ski gut na winim em. Poto na stori i kam long SYDNEY MORNING HERALD

Anja Paerson bilong Sweden husat i kamap namba tri ples em ol i autim em long namba tu raun.

Na Tina Maze bilong Slovenia husat i traipela slalom iven long Sarere i mekim nogut tru we em i stap long 26 ples i gat 352 poin. Sapos ais i stap ski i gutpela pilai long kamap tu.

9 Mail Soka bungim ol Morobe long NCD

Joe Ivaharia i lukluk raun na tokaut long wanem samt-ing em soka i mekim long ol Morobe long 9 Mail Morobe Blok.

SAPOS yu raun i go antap long 9 Mail na klostu long Morobe Blok yu bai lukim bikpela soka pilai i kamap long ol Sarere na Sande.

Dispela soka pilai em Evedahana Soka Asosiesen i kamapim bilong bungim ol Morobe husat i stap long dispela blok na husat arapela Morobe i stap insait long Nesenel Kapitel Distrik (NCD). Na dispela em i gutpela tingting tru.

Na long ol tim husat i stap insait long dispela kompetisen olgeta i makim wanwan ol distrik long long provins - Finshaffen, Kabwum, Garaina, Markham, Mumeng, Buang, Wain, Nabak, Sialum na Salamaua.

Ol lain Morobe husat i stap long dispela Morobe Blok long 9 Mail i sanap olsem 2000 olgeta. Olsem yumi tok pinis taim bilong pilai olgeta arapela Morobe husat i stap long NCD i save kamap na pilai.

Insait long dispela asosiesen nau igat moa long 26 tim bilong ol man na 20 bilong ol meri. Long kompetisen bilong ol man ol i kamapim tupela pul. Pul A bilong ol primia divisen na B bilong risev divisen na long ol meri i gat wanpela divisen tasol.

Pilai graun i stap arere long 9 Mail matmat we i gat tupela soka pilai graun i stap.

bilong ol yet olsem K2.00 we ol i baim ol pepa na ol arapela samt-ing long ronim pilai.

Em i tok wanpela kandidate husat i bin sanap long Mosbi Not Is bai elek-sen Norman Fernandez i bin helpim ol long baim ol sil na tropi olsem prais bilong gren fainol.

"Mipela yet i wok long mekim ol fan resing i stap long sapatim kompetisen. Na tu ol klab yet i painim ol sponso o nogat ol yet i baim ol yuni-fom bilong ol.

"Mipela i pilai wanpela raun tasol na nau mipela i stap long pinisim olgeta pilai we dispela em i gem namba 17," em i tok.

Pilai bilong ol meri i pinis na ol i wetim ol fainols tasol we bai i kamap long nupela yia.

Ol nem bilong ol klab husat i stap insait long kompetisen em: Junction, Gara United, Not-na, Zee Neps, Capsen Imindos, D-Amba, Finka, BS Natives, B2 Bao, Graveside, Names, Liwale, Nen Konok, Sulu, Jungle Parrots, Dogura Rats, Namagawi, Wopa United, San Kamap, Gaia Konok, Nalas, Texas na Kilengs.

"Mipela bai no inap long malolo long krismas na niu yia wiken long wanem mipela i mas pinisim olgeta pilai bilong mipela hariap pastaim



• Pilaia bilong BS Natives tim i salens long kisim bai wantaim birua bilong em bilong Finka.

Texas (28), Kilengs (28), Junctions (26), Gala Konok (24), Graveside (24) na Namagawi (23).

Long divisen B em; BS Natives (43), Graveside (32), Siale (32), Nalas (30), Zee Neps (29), Kilengs (27), Sulu (25), Liwale (25), Names (24) na Gara United (24).

Wantok i traim long kisim poms lada bilong ol meri tasol i no inap.

Taim bilong fainols i kam klostu we planti bilong ol tim i stap klostu liklik long poms lada.

Na dispela bai i mekim ol tim i soim tru strong bilong ol long traim na stap insait long fainols insait long ol las gems.

Long lukim ol pilai i pinis gut Maikepe wantaim eksekutiv bilong em i mekim singaut i go long olgeta

wanwan klab long toksave na stretim ol pilaia bilong ol long pilai long gutpela pasin bilong spot na noken mekim nabaut long bagarapim ol pilai.

Em i tok dispela kompetisen em bilong ol Morobe na ol i mas soim amamas na gutpela spirit long pilai wantaim wanbel pasin wantaim narapela narapela.

Moa yet em i mekim singaut i go long ol bisnis haus sapos ol inap long helpim wantaim sampela mani bilong baim prais bilong ol wina.

Dispela em i namba wan yia kain kompetisen i kamap we i bin stat long Ogas, 2004.

Nau bai klostu ol fainols i kamap. Ol opisa i ting narapela sisen bai i bikpela moa.



• Kilengs A gret soka tim husat i traim hat long mekim long top 5 i stap long namba 6 ples long kompetisen.

Taim Wantok Niuspepa i raun long kisim dispela stori, Presiden bilong ESA, Amut Maikepe, i bin tok olsem ol i kamapim dispela asosiesen long laik bilong ol pipel long kamapim gutpela amamas na mekim pasin bilong stap wantaim olsem brata na susa na wan famili.

Maikepe i tok soka em i bikpela pilai bilong ol Morobe na olsem em i no hat long kamapim kain pilai.

"Mipela ol eksekutiv bilong asosiesen i voluntia tasol long ronim asosiesen bikos long bikpela laik bilong soka," Maikepe i tok.

Em i tok olsem pastaim long stat bilong kompetisen ol memba yet i bin putim sampela mani long poket

long ol fainols i ken kamap long nupela yia," Maikepe i tok.

Em i tok ol i save pilai narapela ol spot olsem basketbol, volibol na netbol tasol dispela i save kamap long wanwan taim.

"Tasol soka em i bikpela pilai bilong mipela.

Nau yet ol tim i wok long pait strong i stap long lukim husat bai i pilai insait long ol fainols we presiden i tok bai ol top 8pela tim tasol bai i stap long en.

Long taim dispela ripot i kamap ol pilai i go insait long raun 17 bilong ol pilai. Na long dispela taim poms lada bilong ol top 10 i sanap olsem divisen A - BS Natives (40), Finka (32), Dogura rats (29), Zee Neps (29),



• Ol manki Gravesaid long B gret divisen. Ol i stap long namba tu ples long taim ripota i kisim dispela stori.

Morata Stet ov Orijin bungim hevi

Stori na poto Andrew Molen

STET ov orijin gem namba tu bilong Morata Lig kompetisen i no bin pinis gut bihain long refri na ol tupela tas jas bilong em i lusim fil na go ausait.

Dispela em bilong wanem refri i no amamas long wanpela sapota bilong ol Maroons i paitim em.

Refri i bin go insait long trai lain bilong Maroons long givim wanpela trai na dispela sapota i paitim em.

Dispela samting i kamap klostu long pinis bilong seken hap bilong gem we i lukim ol Morata 2 Blues i wok long go pas wantaim 10-6 skoa na 5 minit tasol i stap yet.

Presiden bilong Morata Lig i no amamas long dispela pasin i kamap na em yet i holim wanpela stik na traim long ronim na stopim ol sapota bilong Maroons long ol i noken mekim moa trabel.

I nogat klia toktok i kamap yet sapos bai ol i pilaim dispela gem namba tu gen o nogat tasol to bilong kompetisen i stap olsem wanem tim i wok long go pas taim gem i bagarap o stop na i no pinis gut em bai winim gem.

Olsem na dispela i min olsem Morata 2 Blues i winim Patron's kap na K1000 prais mani maski sapos ol Maroons i winim namba tri pilai o nogat.

Gem i bin ron gut tru we i lukim Cedric Belo na Aaron Mulunga bilong ol Maroons i kirapim paia long atek bilong ol.

Ol Blues i kisim sans long skoa pas bihain long refri i painim ol Maroons i opsait insait long 20 mita eria bilong ol yet tasol kik bilong Blues ful-bek, Nixon Nagle i pundaun sot long gol pos.

Bihain long dispela ol Maroons i kisim wanpela penolti taim ol Blues i holim Mulunga na i no lusim em hariap bihain long ol i takolim em.

Dispela i lukim faiv-eit bilong Maroons, Philip Kuman i kikim gol na kisim tu pouns bilong ol long putim ol i go pas 2-0.

Gem i strong tru na refri i salim ful-bek Geua Enosi na Huka Gola John bilong



• Winga bilong Warrior i laik traim abrusim fowet pek bilong, West Kange tasol i no inap. Warriors win 16-4.

Maroons i go long sin bin bihain long ol i spia takol long Peter Ramson.

Ol Blues i wokim wanpela rong ken klostu long gol bilong ol na Kuman isi tasol i kikim wanpela moa gol long kisim ol i go 4-0.

Blues i bekim wantaim planti hai bom kik na wanpela bilong dispela ol kik i lukim Enosi i pundaunim bal we Joshua Lapa i kisim na givim long winga Dapsy Buru long putim trai we kik tu i bin i go insait long kisim ol i pas 6-4 long hap-taim.

Long stat bilong seken hap i lukim

Kuman i kikim wanpela moa penolti kik long putim ol i go 6-6 tasol dispela i no stap long taim.

Blues i go pas long gem ken taim Joshua Lapa i wokim wanpela tiklik kik we winga Stanley Waku i kisim na skoa long putim ol i go 12-6.

Faiv minit bilong gem i stap yet na Waku i go putim seken trai bilong em we bai i nap kisim ol i go 16-6 tasol taim refri i go long givim trai, dispela trabol i kamap.

Long taim dispela stori i kamap Wantok i traim long kisim moa stori tasol i no inap.

PNG bai no inap kamap long U20 soka pilai

Bustin Anzu long Honiara, Solomon Ailan i raitim

PAPUA Niugini Futbol Asosiesen bai i no inap salim tim bilong em i go pilai, PNG Futbol Asosiesen teknikal opisa Joe Turia i tok.

Dispela long wanem hevi i stap long taim.

Turia i tok taim i sot long PNG long pilai long wanem namba wan samting em i no redim tim. Na tu samting em dispela em i ov sisen taim na planti ol pilaia i no stap long ol pilai. Long dispela as PNG bai i no kamap long ol pilai.

Tasol long pilai yet i kamap polis long Honiara i tok dispela Oceania Futbol Konfederesin (OFC) Under 20 Sempionship bai i go het yet long narapela wik olsem ol i bin-makim long en.

Na polis bai lukautim dispela sempionsip long kamap gut long Solomon Ailan.

Dispela tok i kam bihain long planti kantri husat bai pilai insait long dispela bikpela soka resis i pret long trabel bihain long dai bilong wanpela polisman bilong RAMSI long yia i go pinis.

Ol kantri husat bai kamap em Australia, Niu Silan, Fiji, Vanuatu, Niu Caledonia, American Samoa, Samoa, Tonga na Solomon Ailan yet.

Deputi Polis Komisina bilong Royal Solomon Ailan Plis (RSIP) na Komanda bilong Regional Assistance Mission Solomon Ailan (RAMSI) Sandi Peisley i tok ol bai sapotim dispela bikpela pilai insait long region wantaim sikuriti. Tasol plening na ogonaisim dispela sikuriti, em RSIP yet bai i go pas long en.



• PNG intanesenel soka pilaia Reggie Davani i stopim bai em pilaia bilong Fiji i hetim long wanpela pilai bilong ol. Reggie nau i stap na pilai long Nu Silan. Em i stap long PNG Anda 21 skwat. FAIL POTO

"Mipela bai givim olgeta sapot bilong mipela long dispela pilai we bai kamap long narapela wik long Honiara. Mipela bai helpim ol RSIP, we ol bai plenim dispela sikuriti operesen bilong pilai," Komanda Peisley i tok.

Toktok bilong em i sapotim toktok bilong Polis Komisina RSIP William

Morrell long las wik olsem ol plis bai lukautim dispela pilai long sait bilong sikuriti.

Morrell i tok Solomon Ailan polis wantaim RAMSI bai sapotim dispela pilai wantaim na was long olgeta lain pilaia insait long dispela resis.

Tim bilong Solomon Ailan i redi stap.

Ol masel at i ken bung na pait

Joe Ivaharia i raitim

BIHAINIM pait bilong NCD Open taekwondo sempionsip long las yia ol oganaisa bilong tonamen i salim open invetesen i go long ol arapela masel at skul long pait insait long ol tonamen long dispela yia.

Ol opisel bilong NCD taekwondo union i tok dispela open askim i ken strongim kompetisen namel long ol wantaim ol sumatin bilong ol arapela masel at skul tu.

Mausman bilong NCD na kompetisen dairekta Edward Kassman i bin tok olsem ol pait man o sumatin bilong em i tren gut i stap we em yet i lukim olsem bai ol i ken pait long ol arapela stail teknik tu.

Kassman i tokaut tu long namba wan kompetisen we bai i kamap long Februari 27-28, 2005 long Pot Mosbi.

Kassman wantaim ol oganaisa bilong em i autim tim bilong ol pinis we planti memba em ol gol medal wina long tim spot long las Saut Pasifik gems olsem Ivan Kassman, Anton Aitsi, Keidy Kave na Onne Valu.

Bai i gat ol arapela intanesenel paitman tu bai i pait egensim dispela SP gems tim we bai kukim stret tonamen.

Kassman tu i tok olgeta pait bai i gat wanwan divisen bilong ol yet na bai i stat wantaim anda 10 divisen we bai lukim pikinini bilong Edward yet Maximillion Salvator Kassman i pait long fes taim.

Dispela divisen (u10) ol i kolim supa-fin weit divisen.

Long tonamen bai i gat 8-pela open weit divisen we wanem kala o kain belt level i ken pait insait long en na tu i gat fopela krismas (age) divisen stat wantaim anda 10..

Kassman i tok mipela i bin lukluk long tupela yia pinis stat long 2002 long lainim ol yangpela pait manmeri rupela pasin na stail long pait long Intenesenel Taekwondo lo we i karamapim olgeta masel ats stail na teknik.

"Wantaim dispela tingting em bai i gutpela long ol arapela masel ats skul long kam insait na pait wantaim ol taekwondo sumatin bilong mipela we mipela i ken glasim na skelim strong bilong ol", NCD Presiden Cratsee Tito i tok sapot long Kassman.

Presiden Tito i tok mipela lukluk long kamapim gutpela tonamen wantaim ol klab long Central provins olsem Bereina Taekwondo klab na Marianville Hai Skulk lab wantaim ol arapela klab tu insait long NCD.

Kassman i tok ol arapela senta o provins tu i ken salim tim bilong ol i kam tasol ol i mas tok klia long laik bilong ol hariap.

Long kisim moa toksave long tonamen ol i ken ringim mi tupela Cratsee Tito long telepon 325 1411, Kassman i tok.

Praivet netbol no kamap gut

Joe Ivaharia i raitim

PRAIVET kampani netbol resis i kam bek wantaim liklik hevi long wiken we i lukim tupela gem tasol i bin kamap.

Tasol dispela em bikos long ren i bin pudaun na ol eksekutiv i bin kenselim ol arapela pilai. Nau i lukim raun namba tu bilong ol we planti bilong ol tim i mas winim ol gems bilong ol ssapos ol i laik pilai insait long fainols.


Long divisen wan pilai i lukim ANZ tim i kam bek wantaim gutpela na namba wan win bilong ol taim ol i nekim Airlines PNG 21-10. Dispela win i makim fes win bilong ol we long raun wan ol i no bin kamapim wanpela win tru. Tasol long pouns lada ol i stap daunblo yet. Pouns i sanap olsem; Fairdeal igo pas long 18 pouns wantaim gutpela pesentes na BSP (18) i stap long namba tu ples.

Namba tri em Brian Bell (17), foa em BAT (15), STC Fainens (9), Pryde Furniture (6), APNG (3) na ANZ (2). Long pilai gol suta bilong ANZ Edna Ereman wantaim gol atekVavine lamo i bin go pas long dispela win we Ereman i bin skorim moa long 17 pouns. Long hap taim ol i bin go pas long APNG 12-7.

Long narapela gem i lukim tupela tim Brian Bell na BAT i pait long lukim husat tru bai kisim namba tri posisen. Pastaim tupela i bin pas wantaim long pouns. Bihain long pilai Brian Bell i bin strong tru na autim ol BAT long 21-15 skoa na kalap igo antap long namba tri ples. Ol eksekutiv nau i wok long singaut long ol arapela klab long makim taim namel long wik na pilaim ol was-aut gems.



WANTOK Spots



Morata Ragbi Lig bai holim turangu Stet ov Orijin pilai

Paul Zuvani i raitim

MORATA ov sisen ragbi lig pilai bal holim namba tri Stet ov Orijin pilai long helpim ol turangu lain husat i kisim bagarap long dispela bikpela solwara long Esia.

Presiden bilong lig Billy Yaki i tok lig i laik givim dispela mani i go long ol lain husat i kisim bagarap long Indonesia.

"Mipela i sori long ol bratasusa bilong mipela long Esia na olsem mipela i laik helpim ol long sampela kain liklik wei we mipela inap long mekim," Yaki i tok.

"Mipela i raitim pas pinis long Indonesia Embasi na askim tu sapos sampela opisa bilong ol i ken kamap na lukim dispela pilai," em i tok.

"Mani mipela i kisim bai go stret long han bilong Embasi.

Dispela lig maski em i liklik setelmen lig tasol lewa bilong em i bikpela.

"Planti ol lain i ting olsem mipela i setelmen lig na olsem ol i no tingting tumas long mipela.

"Dispela lig i stap 23 yia olgeta na dispela ol taim mipela i stap long strong bilong mipela.

"I nogat wanpela kampani o bisnis lain i kam helpim mipela, maski amas taim mipela i bin askim tasol nogat helpim.

Yaki i tok mani ol bai givim bai kam long mani ol i kisim long get.

"Mipela i no bin askim sapos sampela ol bikman i laik helpim long putim mani long dispela pilai tasol sapos ol i laik ol i ken kamap long dispela taim na lukim mi o namba tu bilong mi John Mauwi.

Namba bilong lain husat i save kamap em olsem 2000 i go inap long 3000.

Get fi em K1 na olsem c' i lukluk long kamapim kain mani long K2000 i go inap long K3000 o moa sapos sampela lain i go givim helpim.

Dispela pilai bai kamap long Kone Tigers pilai graun long 3 kilok long dispela Sande.

Long wankain taim Mauwi i tok pastaim long dispela Stet ov Origin pilai i kamap ol narapela pilai bilong lig bilong ol bai kamap tu wantaim volibol pilai bilong ol meri.

Long wankain nius Papua Niugini Futbol Asosiesen presiden David Chung i tok Futbol i tingting tu long kamapim mani long dispela turangu apil.

Em i tok mani ol i kisim long Osenia



• Fulbek bilong West Kange Willie Palex i traim bun wantaim difens bilong Warriors long Morata lig pilai. Warriors win 16-4. Foto: ANDREW MOLEN

Futbol Konfederesen (OFC) kwalifaing klab sempionsip pilai namel long sempion klab bilong kantri Sobou na klab bilong ol Samoa long tupela pilai long Mas 4 na 6 long Lae bai go long ol turangu long Manam Ailan, Madang na Esia sunami apil.

Chung i tok em i no save amas tru ol bai kamapim long dispela tupela pilai tasol em i tok dispela i stap long namba bilong ol manmeri husat i kamap long dispela ol pilai.

Narapela spot husat i tingting long kamapim kain pilai em PNG Kriket Kaunsel.

I bin gat ol toktok olsem PNG Kriket bai holim sampela ol pilai long kamapim mani na salim i go long turangu apil.

Tasol jenerol seketeri bilong PNG Kriket Kaunsel Wayne Satchell i tok dispela ol tok-

tok long holim wanpela pilai bihainim dispela turangu tingting i hariap tumas.

"Opisel toktok bilong Kaunsel bai mas kamap pastaim," Satchell i tok.

"Nau yet siaman (William Maha) i maiolo long ples na i no save long dispela ol toktok," em i tok.

"Tru em i gutpela tingting tasol Bod i mas sindaun na paitim toktok pastaim.

"Sapos kain samting bai i mas kamap em i mas kamap aninit long gutpela lukaut.

"Mipela i no inap hariap long ol samting. Mipela i mas skelim olgeta samting pastaim bihain mipela i kamap wantaim kan tingting na pilai olsem.

"Nau yet bikpela tingting bilong kaunsel em long lukim PNG i kwalifai long Wol Kap.

Sapos mipela i kwalifai mipela bai kisim sampela mani long helpim wantaim kain tingting olsem.

Em i tok Kaunsel i no save kisim mani long get o kisim ol bikpela mani na olsem ol i no redi yet.

Narapela man husat i tingting long helpim em PNG Swima Ryan Pini.

Pini i tokim *Wantok Spot* aste olsem em i laik long helpim long dispela turangu apil tasol bai i mas lukim ol swim bilong em pastaim.

"Em i no hat long mi mekim olsem tasol bai gutpela sapos wanpela gutpela swim i kamap," Pini husat i winim pinis 200m bataflai resis long Kwinslan Sempionsip na tumoro i redi long 50m flai i tok.

WIDE VARIETY OF HYBRID VEGETABLE SEEDS

IDEAL TIME FOR PLANTING YOUR FAVOURITE VEGETABLE SEEDS

Brian Bell's Shop with a friend

PLAZA 200, LAE HOME CENTRE CITY, GORDONS LAE HOME CENTRE CITY, DISCOUNT HAUS, GOSOKA, KOKORO, MT HAGEN, MADANG